

ሃዋሬታ ኦሶ ጊዶ ቆፋ

ሃዋሬታ ኦሶ ማፃፋዚ ሉቃስ ሚሺራች ቃላፔ ካሊዛይሳ። ሃ ማፃፋዛሰ አይፌ ቆፋይ ኮይሮ ዬሱሳ ካሊዛይቲ ዓሎ አያናይ ካሌሊን ኢዛ ገሽ የቲዛ ሚሺራች ቃላ “ዬሩሳላሜን፥ ዩሁዳ ዴሬ ኡባን፥ ሳማሪያንኔ ቢታ ጋፃ ጋካናሰ” 1:8 ሚሺራች ቃላ ኢስቲ ዋስቲ ወርሲ ጋሊዳኮኔ ሄሳ የታናሳ። ማፃፋዚ አማኖይ አይሁዳታ ጋርሳን ደሚዲ ኩሜላ አላሜ አሳይ አማኖና ጋካናሰ ኢዚ ዋኒ ዋኒ እኪ እኪ ቢዳኮኔ የቲዛይሳ። ሃይሳ ማፃፋ ፃፊዳይሲ አማኒዛይቲ ኦሮሜ ካዋራ ኤቄታናሰ ጋርሳራ የፆ ቃቺዛይታ ጊዶንታይሳኔ አማኒዛይታ አማኖይ ሃንኮ አይሁዳታ አማኖ ፖሎኮ ጋሊዛዝ ጊዲዳይሳ ኤሪሳናሰ ዳሮ ባፃቲዴሰ።

ሃዋሬታ ኦሶ ማፃፋይ ዬሱሳ ገሽ ሚሺራች ቃላይ ጋኪዛሶይ ዋዴን ዋዴን እኪ እኪ ቢዛይሳኔ ዋሳ ኬሌይ ሚኒ ፃጲዳይሳ ቤሲዛ ሂቹ ጌታ ኪፊሊታን ቫኬታናሰ ዳንዳዬሰ።

1. አማኒዛይታ አማኖይ ዬሱሲ ዴንዲዲ ፑዴ ሳሎ ቢዳፔ ጉዬ ዬሩሳላሜን ደሚዴሰ።

2. ኢሰራዔሌ ዴሬ ኩሜላ ጋኪዴሰ።

3. ኦሮሜ ጉጂ ኤኪዲ ሜዲቴራኔ አባ ዩሽን ዲዛ ዴራ ጋካናሰ ኦይኮይሳ የቲሰ።

ሃዋሬታ ኦሶ ማፃፋን ኬሂ ቆንጪ ቤቲዛይ ዓሎ አያና ኦሶ ጊዲሺን ጴንፃቆስቲ ባዓሌ ጋላሰ ዬሩሳላሜን አማኒዛ አሳ ቦላ ዋልቃራ ዋዶይሳ፥ ሄሳሶካ ሄ ማፃፋዛን የቲቲዳ የታን ኡባን ቆንጪዳ ማላ ዓሎ አያናይ ዋሳ ኬላኔ ዋሳ ኬላ ካሌሊዛይታ ካሌሊዳይሳኔ ሚንሌሊዳይሳ ጉጂሰ። ቤኒ ዋዴ የቲቲዛ አማኖ ቃላይ ዱማ ዱማ ኦጌራ ሳባኬቲዴሰ። ሃዋሬታ ኦሶ ማፃፋን ፖሌቲዳ ኦሶቲካ ኪታዚ አማኒዛይታ ዴዖኔ ኢሰታ ኢሲፊቴላን ዲዛ ዋልቃይ አይ ማላ ሚኖኮኔ ኤሪሴቲሰ።

ሃ ማፃፋይ ኦይኪዳ ኩሜላ ቆፋ

ማርካቴላሰ ጊጌቲላ 1:1-26

ዬሩሳላሜን የቲቲዳ ማርካቴላ 2:1-8:3

ዩሁዳኒ ሳማሪያን የቲቲዳ ማርካቴላ 8:4-12:25

ጳውሎሳ ሃዋሬቲላ ኦሶ 13:1-28:31

ሚሺራች ቃላ የታናሰ ጳውሎሳሰ ኮይሮ ቡሰ 13:1-14:28

ዩሩሳሌም ሺቆ 15:1-35

ሚሺራች ቃላ የታናሰ ጳውሎሳስ ናሞዓንሉ ቡስ 15:36-

18:22

ሚሺራች ቃላ የታናሰ ጳውሎሳስ ሄዻንሉ ቡስ 18:23-21:16

ጳውሎሲ ዩሩሳሌምን፥ ቂሳሬኒኔ ኦሮሜን ቃሼቲዴስ 21:17-28:31

ሃዋሬታ ኦሶ ጌሻ ማፃፋ

1 ቶፊሎሳ፥ ዩሱሲ ኦላናሲኔ ታማርሳናስ ኦይኪዳይሳ ወርሳ ታ ኔስ ኮይሮ ማፃፋን ፃፋዲስ። * 2 ሄሲካ ኢዚ ፑዴ ዴንላ ጋላስ ጋካናስ ባ ዶሪ ኪቲዳይታስ ፂሎ ኣያና ባጋሪ ኢዚ ኢስታስ ኢሚዳ ኣዛዞኮ። 3 ኢዚ ዳሮ ዋዬ ቤዪዳፔ ጉዬ ኢስታኮ ሺቂዲ ሃይቆፔ ዴንዳናይሳ ኢስታስ ዳሮ ማርካራ ቆንጨሲሼ ኦይዱ ታሙ ጋላስ ጋካናስ ኢስታስ ጋላስ ጋላስ ቤቲሼ ፆሳ ካዎቴላ ጊሽ የቲዴስ። 4 ኢስታሪ ኢሲፌ ማዳን ኡቲ ዲሼ ኢስታ “ዩሩሳሌምፔ ኬዞፒቴ፤ ጊዶ ኣቲን ታ ኢንቴስ የቲሺን ኢንቴ ሲዪዳይሳ ታ ኣዋይ ኢሚዳ ኡፋይሳ ናጊቴ።” * 5 የሃኒሲ ሃላን ፃማቂዴስ ሺን ኢንቴ ቃስ ጉላ ዋዴፔ ጉዬ ፂሎ ኣያናን ፃማቂታና” ጊዲ ኣዛዚዴስ። *

6 ኢስቲካ ኢሲ ቦላ ሺቂቲ ዲሼ “ሳዶ! ኔ ኢስራዔሌታ ካዎቴላ ዛራዳ ሃዒ ኤሳኔ?” ጊ ኦይቲዳ።

7 ኢዚካ ኢስታስ “ኣዋይ ባ ሺኔን ዋሒዳ ዋዴ ኤሮይ ኢንቴስ ኢሜቲቤና። 8 ጊዶ ኣቲን ፂሎ ኣያናይ ኢንቴ ቦላ ዋዲዳ ዋዴ ኢንቴ ዋልቃ ኤካና። ዩሩሳሌምንካ፥ ዩሁዳኒካ፥ ሳማሪያንካ ኡባሶን ቢታ ጋፃ ጋካናስ ኢንቴ ታስ ማርካታ ጊዳና” ጊዴስ። *

9 ሄሳ ጊ የቲዳፔ ጉዬ ኢስቲ ፂሊሺን ፑዴ ሳሎ ዴንዲዴስ። ሳሎ ሻራይካ ኢስታ ኣይፌፔ ኢዛ ጌንሒዴስ። *

10 ኢዚ ቢሺን ኢስቲ ኢዛ ቲሺ ሂስቲ ፑዴ ሳሎ ፂሊሺን ቦላ ማይፆ ማይዲዳ ናሞዑ ኣሳቲ ቆፖንታ ኢስታ ኣታን ኤቂዲ፤

11 “ኢንቴኖ ጋሊላ ኣሳቶ! ኢንቴ ፑዴ ሳሎ ፂሊሺ ሃይሳን ኣዛስ ኤቂዴቲ? ሃይሲ ኢንቴ ማታፔ ፑዴ ሳሎ ዴንዲሺን ኢንቴ ቤዪዛ ዩሱሲ ሳሎ ኬዚሺን ኢንቴ ቤዪዳ ማላ ሄሳሳካ ኢዚ ሃ ሲሚ ያና” ጊዳ።

* 1:1 ሉቃ 1:1-4 * 1:4 ሉቃ 24:49 * 1:5 ማቶ 3:11፤ ማር 1:8፤ ሉቃ 3:16፤ ዮሃ 1:33 * 1:8 ማቶ 28:19፤ ማር 16:15፤ ሉቃ 24:47-48 * 1:9 ማር 16:19፤ ሉቃ 24:50-51

የሁዳ ሶሆን ማቲያሲ ደሬቲዳስ

12 ሄሳፌ ጉዬ ዳብራዛይቲ ጌቲቲዛ ዙማ ቦላፌ ዋጂዲ ዩሩሳላሜ ሲሚዱ። ሄ ዙማይካ ዩሩሳላሜ፤ ኢሲ ኪሎ ማትራ ማላ ሃኬስ። 13 ጌዴ ካታማዮ ጌሊዳ ዋዴ ካሴ ባ ዲዛ ኬላ ፖቄ ቦላ ኬዚዳ፤ ሄይቲካ ጴፅርሳ፤ ዮሃኒሳ፤ ያቆቤ፤ ኢንዲራሳ፤ ፒሊጶሳ፤ ቶማሳ፤ ባርቴሌሞሳ፤ ማቶሳ፤ ኢልፊዮሳ ና ያቆቤ፤ ባ ባጋ ማዲዛዴ ጌቲቲዛ ሲሞናኔ ያቆቤ ና ዩሁዳ። * 14 ሄይቲ ዉሪካ ማጫሳታ፤ ዩሱሳ ኣዮ ማራሚራ ሄሳፊካ ኢዛ ኢሻታራ ኢሲ ዋዝናን ኢሲ ቦላ ቃንፆንታ ሚኒ ዋሲዳ።

15 ሄ ጋላሳታን ጴፅርሲ ፄታኔ ናሞዑ ታሙ ኣማኒዛ ኣሳ ጊደን ኤቂዲ፤ 16 “ታ ኢሻቶ! ዩሱሳ ኦይኪዳ ኣሳታ ካሌሊ ኤሂዳ። ዩሁዳ ጊሽ ዒሎ ኣያናይ ካሴቲዲ ዳዉቲ ዲናን ሃሳዩዳ ጌሻ ማፃፋ ቃላይ ፖሊታና ኮሼስ። 17 ኢዚካ ኦፔ ኢሳዴ ማላ ታይቤቲዲ ሃይሳ ሃ ኦሶዛን ጌላናስ ቃዳ ዴሚዳስ” ጊደስ።

18 ጊዲኮካ ሃይሳዴይ ባ ኢታ ኦሶን ዴሚዳ ሚሻን ጋዴ ሻሚዴስ፤ ሄንካ ባ ሊጶን ጉፋኒ ኩንዲን ኢዛ ኣሳቴላይ ጊዶፌ ጳልቄቲ ዋጂዴስ፤ ኢዛ ማራጩይ ቢታ ቦላ ዛዘቲዳስ። * 19 ሄሲካ ዩሩሳላሜን ዲዛ ኣሳስ ኡባስ ሲዬቲዳስ። ቢታይካ ኢስታ ቃላራ “ኣኬልዳማ” ጌቲቲዳስ፤ ሄሳስ ቢርሼላይካ ሱላ ቢታ ጉሳ።

20 ጉጂዲካ ጴፅርሲ “ማዛሙሬ ማፃፋን
ኢዛ ጋዴይ ሜላ ኣቶ፤ ኢዛን ኣይ ኣሲካ ዶፖ፤
ቃሴካ ኢዛ ዳናቴላ ሃራ ኣሲ ኤኮ”

ጌቲቲ ፃፊቲዳስ። *

21 “ሄሳ ጊሽ ጎዳ ዩሱሲ ኦናራ ዲዛ ዋዴ ኡባን ኦናራ ኢሲፌ ዲዛይታ ጊዶፌ ኦ ኢሳዴ ዶራናስ ኮሼስ። 22 ሄሲካ ዮሃኒሳ ፂንቃቴ፤ ሃ ሲሚን ዩሱሲ ኦፔ ሻኬቲ ዴንዲ ባና ጋካናስ ኦናራ ዲዛዴ ጊዳናስ ቤሴስ። ጋሶይካ ሃ ኣሳታ፤ ኢሳዴይ ኦናራ ዩሱሳ ዴንሳስ ማርካ ጊዳና ኮሼስ” ጊደስ። *

23 ሄሳ ጊሽ ባርሳባሳ ዋይኮ ዮስፆሳ ጌቲቲዛ ዮሴፌኔ ማቲያሳ ናሞዳታ ሺሺዲ፤ 24 “ጎዶ! ኔ ኣሳ ኡባ ዋዝና ኤራሳ፤ ሃይታ ናሞዳታ ጊዶፌ ኔ ኦና ዶሪዳኮ ኢሳዴ ኦና ቤሳ። 25 ዩሁዳይ ዩጊ ቢዳሶን ሃ ኦሳ ኦላናዴኔ ሃዋሪ ጊዳናዴ ኔ ዶራ” ጊ ዋሲዳ።

* 1:13 ማቶ 10:2-4፤ ማር 3:16-19፤ ሉቃ 6:14-16 * 1:18 ማቶ 27:3-8

* 1:20 ማዛ 69:25፤ 109:8 * 1:22 ማቶ 3:16፤ ማር 1:9፤ 16:19፤ ሉቃ 3:21፤ 24:51

26 ሄሳፌ ሳማ ዩጊን ሳማይ ማቲያሳስ ኬዚዳስ። ኢዚካ ታማኔ ኢሲ ሃዋሬታራ ኢሲፌ ታዩቤቲዳስ።

2

ዒሎ አያናይ አማኒዛ አሳ ቦላ ዋዲዳስ

1 ጳንፃቆስቲ ጌቲቲዛ ባዓሌ ጋላሲ ጋኪዳ ዋዲ አሳይ ወሪካ ኢሲ ሶን ሽቂ ዲሺን፤ 2 ቆፋይ ባይንዳ ዳሮ ሚኖ ጎቲ ጫርኮ ማላ ገሪሲ ዩዳስ፤ አሳይ ዲዛ ኬላካ ኩሚዳስ። 3 ታማ ላጮ ኢንፃርሳ ማላይ አሳስ ቤቲዲ ሻኬቲ ሻኬቲ ኢሲ ኢሲ አሳ ቦላ ኡቲዳስ። 4 አማኒዛይቲ ወሪ ዒሎ አያናን ኩሚዲ አያናይ ኢስታስ ሃሳያናስ ኢሚዳይሳ ኬና ሃራ ቃላራ ሃሳያ ኦይኪዳ።

5 ሄ ዋዲ ሳሎ ጉፋንሶን ዲዛ ዴሬፔ ዩዳ ያሳስ ባቢዛ አይሁዳቲ ዩሩሳላሚን ዳቲስ። 6 ሄ ገሪሳ ሲይዲ ዴሬይ ሽቂዳስ። ኢሲ ኢሲ አሳይ ባ ቃላራ ሃሳዩዛይሳ ሲይዲ ማላሌቲዳ። 7 ማላሌቲዲኔ ጋናዚ ጳዩን “ሃይቲ ሃሳዩዛይቲ ወሪካ ጋሊላ አስ ዳቲኔ? 8 ሂስቲን ኑኒ ኑ ዩሌቲዳ ኑ ዴሬ ቃላራ ኢስቲ ሃሳዩሺን ዋስቲ ሲዩዛኒ? 9 ኑኒ ጳርቲና አሳይ፡ ሜዳ አሳይ፡ ኤላሚ አሳይ፡ ሜሶፖቶሚያን፡ ዩሁዳን፡ ቆጶዳቂያን፡ ጳንያሳን፡ ኢሲያን፡ 10 ፊርጊያን፡ ጳንፊሊያን፡ ጊብፂን፡ ቃሬና አቻን ዲዛ ሊቢያፔኔ ኦሮሜፔ ዩዳይቲ 11 አይሁዳቲኔ ጌዳ አይሁዳቲላን ጌሊዳ ቃርፄሴ አሳኔ አራቤ አሳታ ጊዲሺን ያሳ ዋልቃማ ኦሶዛ ሃይቲ ኑ ቃላራ ሃሳዩሺን ኑ ሲዮስ” ገዳ።

12 ወሪካ ኬሂ ማላሌቲዲኔ ጋናዚ ጳዩን ባ ጊዶን “ሃይሲ አዜሻ?” ጌቲቲዳ። 13 ባጋ አሳይ “ሃይቲ ዳሮ ዋይኔ ጫጃ ኡዩዳ” ገዲ ኢስታ ቂዲዳ።

14 ሄ ዋዲ ጳፅርሲ ታማኔ ኢሲኔታራ ኤቂዲኔ ባ ቃላ ቶቂ ሂስቲዲ ዴራስ ሂዝጊዳስ “ኢንቴኖ ዩሁዳ አሳቶ! ዩሩሳላሚን ዲዛይቶ! ኢንቴ ወሪካ ሃይሳ ኢሲ ሚሽ ኤሪቲኔ ታ ጊዛይሳ ሲዩቲ። 15 ሃዒ ጋዴይ ዋንቲን ቡሮ ሄዡ ሳቲ ጊዲዳ ጊሽ ኢንቴ ቆፒዛ ማላ ሃይቲ አሳቲ ማሳቲቤቲና። 16 ጊዶ አቲን ሃይሲ ካሴ ናቤ ኢዩዔሌን ሂዝጊ ዮቲቲዳ ቃላይ ፖሌታናሳ።

17 ‘ዮሲ ወርሴላ ጋላስ

ታ አያና አሾ ማይዒዳ ኡባ ቦላ ታ ጉሳና፤

ኢንቴ ማጫ ናይቲኔ ኢንቴ አቱማ ናይቲ ቲንቢቲ ሃሳያና፤

ዩላጋ ናይቲ አጃታ ቤያና፤

ጨማቲ አጉሞ አጉሜታና። *

18 ሄ ዎዴ ታ ማጫ አሽካራታ ቦላኔ ታ አቱማ አሽካራታ ቦላ
ታ አያናፔ ታ ጉሳና።

ኢስቲካ ቲንቢቲ ሃሳያና።

19 ቦላ ሳሎን ማላሊሲዛ ሃኖታ ታ ቤሳና፥

ጋርሳ ሳዓን ማላታታ ታ ቤሳና፤

ሱላ፥ ታማይኔ ቱላላይ ሃናና።

20 ጊታኔ ቦንቾ ጊዲዳ

ጎዳ ጋላሲ ያናፔ ካሴቲዲ

አዋ አርሼይ ቋማና፤

አገናይካ ሱላ ሚሳታና።

21 ጎዳ ሱንሐ ዳይጊዛይ ወሪ አታና፣ ጊዴስ።

22 “ኢስራዔል ናይቶ! ሃይሳ ቃላ ሲዩቲ፤ አንቴ አንቴ ባጋራ
ኤሪዛይሳ ማላ አንቴ ጊዶን ማላታኔ አሲ ሲዩ ኤርንታ ሚሻታ
ኢዛ ኩሼን ኦሊዲ ያሲ ናዚሬቲ ዩሱሳስ ማርካቲዴስ። 23 ያሲ
ካሴ ባ ቃቲዳይሳ ኢዛስ ቤኒ ኤራቲላ ማላ ሃይሳዴ አንቴ ኩሼን
ኦሊ አሚዴስ። አንቴካ ኢታ አሳታ ኩሼን ካቄቲ ሃይቃና ማላ
ኦሊዴታ። * 24 ጊዶ አቲን ያሲ ኢዛ ቦላፊ ሃይቆ ዎልቃ ዲጊዲ
ሃይቆፔ ዴንሊዴስ። ሃይቆይካ ኢዛ ኦይኪ አሻናስ ዳንዳይቤና።

* 25 ዳወቲይካ ኢዛ ጊሽ

‘ታኒ ጎዳ ኡባ ዎዴ ታ ሲንላን ቤያይሰ፤

ኢዚ ታ ኡሻቻን ዴስ፤ ሙሌካ ሂርጊኬ።

26 ሄሳ ጊሽ ታ ዎዝናይ ኡፋዬቲስ፤

ታ ዲናይካ ጋላቲስ፤

ታ አሾይ ኡፋይሳን ዳና።

27 ኔ ታ ሼዎፖዮ ዲፎን አጋካ፤

ኔ ና ጌሻዛ ዎቃና ማላ አጋጋካ።

28 ኔ ዴዎ ኦጌ ታ ኤራና ማላ ኦላዳሳ።

ኔ ታናራ ዲዛ ጊሽ ታ ኡፋይሳይ ኩሜላ’

29 “ታ አሻቶ! ቤኒ አዋታፔ ዳወቲይ ሃይቂ ዎጌቲዳይሳኔ ኢዛ
ዲፎይ ሃቾ ጋካናስ ኑ አቻን ዲዛይሳ ባቦንታ ታ አንቴስ ዮታና
ዳንዳይሰ። 30 ኢዚ ናቤ ጊዲዳ ጊሽ ያሲ ኢዛ ዜሬላፊ አሳዴ
ኢዛ ካዎቲላ አልጋ ቦላ ዎላናይሳ ካሴ ጫቆ ቃላን ዮቲዳይሳ

* 2:17 ኢዩ 2:28-32 * 2:23 ማቶ 27:35፤ ማር 15:24፤ ሉቃ 23:33፤ ዮሃ

19:18 * 2:24 ማቶ 28:5-6፤ ማር 16:6፤ ሉቃ 24:5

ኤሪደስ። * 31 ሄሳ ካሴቲዲ ኤሪዳ ጊሺኔ ኢዛ አሾይ ዋቂ ዱፎን አቶንታ ዶሬቲዳ ኪርሰቶሳ ዴንፋ ጊሽ ሃሳዪደስ። 32 ሄ ዬሱሳ ያሲ ሃይቆፔ ዴንፋደስ። ኑካ ወሪ ሃይሳስ ማርካታ። 33 ሄሳ ጊሽ ኢዚ ያሳ ኡሻቻን ቶቁ ቶቁ ጊዳፔ ጉዬ ዊሎ አያና ኡፋይሳ ባ አዋፔ ኤኪዲ ሃዒ አንቴ ቤዩዛይሳኔ ሲዩዛይሳ ዱጌ ጉሲደስ። 34-35 ዳወቲይ ፑዴ ሳሎ ኬዚቤና፤ ኢዚ ባ ዱናን

“ጎዳይ ታ ጎዳስ “ታ ኔ ሞርኬታ
ኔ ቶሆ ጋርሳን ዬቋሳና ጋካናስ

ታ ኡሻቻን ኡታ” ጊደስ። *

36 “ሄሳ ጊሽ ያሲ አንቴ ካቂዳ ዬሱሳ ጎዳኔ ኪርሰቶሳ ሂስቲዳይሳ ኢሰራዔል አሳይ ወሪ ሎዔል ኤሮ” ጊደስ።

37 ዴሬይ ሄሳ ሲዩዳ ማላ ዋዝናይ ቦሽቲደስ። ጴፀርሳኔ ሃንኮ ዬሱሲ ኪቲዳይታ “ኑ አሻቶ! ሂስቲን ኑ አይ ኦልና?” ጊዳ።

38 ጴፀርሲካ “ማርቲላን ጌሊቴ፤ አንቴ ናጋራይ ማሬታና ማላ አንቴፌ ኢሲ ኢሲ አሲ ዬሱስ ኪርሰቶሳ ሱንፋን ፃማቂቲቴ፤ ኢዚ አሚዛ ዊሎ አያና አንቴ ኤካና። 39 ኡፋይሳ ቃላይ አንቴሲኔ አንቴ ናይታሳ፤ ቃሴካ ጎዳ ያሲ ባኮ ዪይጊዛ ሃሆን ዲዛይታሳራ ኡባሳ” ጊደስ።

40 ሃራ ዳሮ ቃላራ ኢስታስ ማርካቲሽ “ሃይሳ ጌላ ዬሌቴፋፌ አንቴና አሽቴ” ጊዲ ኢስታ ቆፊሲደስ። 41 ሄ ጋላስ ቃላ ኤኪዳይቲኔ ፃማቂቲዳይቲ ሄዙ ሺ ማላ አሳይ ካሴይታ ቦላ ጉጃቲደስ። 42 ኢስቲካ ሃዋሬታ ቲሚርቴን፤ ኢሲፌ ቁማ ሙሳኒኔ ዋሳን ሚኒዳ።

43 ሃዋሬታ ኩሼን ዳሮ ማላታቲ ኦሴቲዳ ጊሽ አሲ ኡባይ ኢስታስ ባቢደስ። 44 አማኒዳይቲ ወሪካ ኢሲፌ ዴዒዳ፤ ባስ ዲዛዚካ ኡባ ኢሲ ቦላ ጎዔቲዳ። * 45 ባስ ዲዛ ሚሼኔ ሜሄ ባይዚ ባይዚ ባ ጊዶን ኮሺዳ ማላ ጊሹቺዳ። 46 ጋላስ ጋላስ ያሳ ኬፋን ኢሲፌ ሺቂቲስ። ባ ኬፋንካ ቁማ ኢሲፌ ኡፋይሳኒኔ ሱሬ ዋዝናራ ሜቲስ። 47 ኢስቲ ያሳ ጋላቲሽ ዴሬ ሲንፋን ቦንቺቲዳ። ጎዳይካ ኢስታ ቦላ ጋላስ ጋላስ ኦራል አማኒዛይታ ጉጃደስ።

3

ጴፀርሲ ኢሲ ቶሆይ ሲሊዳዴ ፓሊደስ

* 2:30 ማዛ 132:11፤ 2ሳሜ 7:12-13 * 2:34-35 ማዛ 110:1 * 2:44 ሃዋ 4:32-35

¹ ኢሲ ዋዴ ጋላሳፌ ኡዱፋን ሳቲ ቦላ ጳፅርሲኔ የሃኒሲ ዋሳ ሳቲን ያሳ ኬፍ ባና ኬዚዳ። ² ኢሲ ዩሌቶሳፕ ዶሚዲ ቶሆይ ሲሊዳዴ ያሳ ኬፍ ጌሊዛ አሳፕ ሚሼ ዋሳና ማላ አሳይ ጋላስ ጋላስ ቶኪ ኤፊዲ ዋሊን ኢሲ “ሎዎ” ጌቲቲዛ ያሳ ኬፍ ፔንጌን ዋሲዛዴይ ዴስ።

³ ኢዚካ ጳፅርሲኔ የሃኒሲ ያሳ ኬፍ ጌሊሺን በዪዳ ኢስታፊ ሚሼ ዋሲዴስ። ⁴ ጳፅርሲኔ የሃኒሲ ኢዛ ቲሺ ሂስቲ ያሊዳ። ጳፅርሲካ ኢዛ “እኔ ሃ ኑና ያላ” ጌዴስ። ⁵ አዴዚካ ኢስታፊ አይኮ ዴማና ጌዲ ኢስታ ቲሺ ሂስቲ ያሊዴስ። ⁶ ጌዶ አቲን ጳፅርሲ ኢዛስ ዛሪዲ “ታስ ቢራይኔ ዋርቃይ ዴና፤ ጌዲኮካ ታስ ዲዛዝ ታ ኔስ አማይስ፤ ናዚሬቲ ዩሱስ ኪርስቶስ ሱንፋን ዴንዳዳ ኔ ቶሆራ ሃሙታ” ጌዴስ። ⁷ ኢዛስ ኡሻቻ ኩሼ አይኪዲ ዴንፊዴስ። ሄራካ አዴዛ ቶሆይኔ ቶሆ ቂርጾይ ሚኒዴስ። ⁸ ጉፒ ዴንዲ ኤቂዲ ሃሙላ አይኪዴስ። ያኔ ሃኔ ሃሙቲሼኔ ጉፒሼ ያሳካ ጋላቲሼ ኢስታራ ኢሲፌ ያሳ ኬፍ ጌቤ ጌሊዴስ። ⁹ ኢዚ ያሳ ጋላቲሼ ያኔ ሃኔ ሲሜሬቲሺን አሳይ በዪዴስ። ¹⁰ ሃይሳዴይ ሃኒፌ ካሴ “ሎዎ” ጌቲቲዛ ያሳ ኬፍ ፔንጌን ኡቲዲ ሚሼ ዋሲዛይ ኢዛ ጌዲዳይሳ ኤሪዴስ። ኢዛ ቦላ ሃኒዳይሳፌ ዴንዲዳይሳን አሳይ ኬሂ ማላሌቲዴስ።

ጳፅርሳ ሃሳያ

¹¹ ሃ ፓዲዳ ዋሳንቻይ ጳፅርሳኮኔ የሃኒሳኮ ሺጽ ጌዲ ኢስታራ አይኬቲ ዲሺን ዴሬይ ወሪ ማላሌቲዲ ኢስታኮ “ሶሎሞኔ ሲሜሬቲዳሶ” ጌቲቲዛሶ ዋሳን ዪዴስ። ¹² ጳፅርሲ ሄ አሳ በዪዲ “ኢንቴና ኢስራዴሌ ዴሬቶ! ሃይሳን አዛስ ማላሌቲቲ? ቃሴካ ሃይሳ አዴዛ ኑኒ ኑ ዋልቃን ዋይኮ ኑኒ ኑ ዲሎቲዳን ፓሊዲ ሃሙቲሲዳ ማላ ቆዲዲ ኑና አዛስ ቲሺ ሂስቲ ያሊቲ? ¹³ ኑ አዋንታ አብራሃሜንታ፣ ዪሳቃንታ፣ ያቆቤንታ ያሲ ባ ናዛ ዩሱሳ ቦንቺዴስ። ኢንቲ ቃስ ኢዛ ሃይቆስ አሊ አሚዴታ፤ ጲላዖሲ ኢዚ ቢርሻና ኮይንካ ኢንቲ ‘ኮዮኮ’ ጌዴታ። * ¹⁴ ጌሻኔ ዲሎዛ ኢንቲ ካዲዲ ሽምፖ ዋጲዛይሲ ቢርሼታና ማላ ዋሲዴታ። * ¹⁵ ዴዖ አሚዛዴ ኢንቲ ዋጲዴታ፤ ጌዶ አቲን ያሲ ኢዛ ሃይቆፕ ዴንፊዴስ፤ ሄሳስ ኑኒ ማርካ። ¹⁶ ሃይሲ ኢንቲ በዪዛይሲኔ ኢንቲ ኤሪዛይሲ ሚኒ ኤቂዳይ ዩሱሳ ሱንፋን አማኒዳ ጌሻሳ። ኢንቲ ወሪካ በዪዛ

* **3:13** ኬሳ 3:15 * **3:14** ማቶ 27:15-23፤ ማር 15:6-14፤ ሉቃ 23:13-23፤ የሃ 19:12-15

ማላ ኢዚ ኩሜላ ፓፃ ዳሚዳይ ዩሱሳ ሱንፋኒኔ ኢዛ ሱንፋን ቤተዛ አማኖና።

17 “ሃዒካ ታ ኢሻቶ! ኢንቴ ሄሳ ኦሊዳይ ኢንቴ ሃላቃታ ማላ ኤሮንታ ጊዲዳይሳ ታ ኤራይሰ። 18 ጊዲኮካ ኪርሰቶሲ ዋዬ ኤካናይሳ ያሲ ካሴ ናቤታ ዱናን ሃሳዪዳይሳ ፖሊዴሰ። 19 ሄሳ ጊሽ ኢንቴ ናጋራይ ቁጨቲ ጳያና ማላ ማርቴላን ጌሊቴ። ኢንቴ ቢዛ ኦጌፔ ሰሚቴ፤ ጎዳ ማታፔ ኢንቴ ኦራፃና ዋዴይ ኢንቴሰ ያና። 20 ቃሴካ ያሲ ካሴ ኢንቴሰ ዶሪ ዋሊዳ ዩሱሰ ኪርሰቶሳ ኢዚ ኢንቴሰ ዩዳና። 21 ያሲ ካሴ ጌሻ ናቤታ ዱናን ሃሳዪዳይሳ ማላ ሃኒዛይሳ ዉርሲ ኦራፂሳና ዋዴይ ጋካናሰ ኢዚ ሳሎን ጋምዳናሰ ኮሺሰ። 22 ሙሴይካ ‘ኢንቴ ጎዳ ያሳይ ኢንቴ ጊዶፌ ታ ማላ ናቤ ኢንቴሰ ዳንፋና። ኢዚ ኢንቴሰ ዮቲዛይሳ ሲዪቴ። * 23 ሄ ናቤዛ ሲዮንታ ኢፃዳ ሺምፖይ ዉሪ ዳሬ ጊዶፌ ሻኬቲ ጳዮ’

24 “ቱማፔ ሳሚላፔ ሃ ሲሚን ዳንዲዳ ናቤቲ ዉሪ ሃይታ ዋዴታ ጊሽ ሃሳዪዳ። 25 ኢንቴካ ናቤታ ናይታ። ቃሴካ ያሲ አብራሃሜሰ ‘ኔ ዜሬላን ቢታ አሲ ዉሪ አንጄታና’ ጊዲ ኢዚ ጫቂዳ ጫቆዛ ኢንቴ ላታና። * 26 ያሲ ናዛ ዳንፊዳ ዋዴ ኢንቴና ኢሳ ኢሳ ኢንቴ ኢታቴላፌ ዛሪዲ አንጃና ማላ ካሴቲዲ ኢንቴኮ ኪቲዴሰ” ጊዴሰ።

4

ጴጥሮስን ዮሃንሲ አይሁዳ ዱላታሶ ሺቂዳ

1 ጴጥሮስን ዮሃንሲ አሳሰ ሃሳያን ዲሺን ቄሴታ ሃላቃቲኔ ያሳ ኬላ ናጊዛይታ ሃላቃይ ቃሴካ ሳዱቃዊቲ አኬኮንታ ኢሰታኮ ዪዳ።

* 2 ዪዲኔ ሃዋሪቲ አሳ ታማርሲዛይሳሲኔ ዩሱሳ ባጋራ ቤቲዳ ሃይቂዳይታ ዳንላ ጊሽ ሳባኪዛይሳሰ ኬሂ ሃንቄቲዳ። 3 ጴጥሮስን ዮሃንሳ ጋዴይ ቃሚሺን ኦይኪዲ ዋንታና ጋካናሰ ቃሾ ኬላን አይሲዳ። 4 ጊዶ አቲን ቃላ ሲዪዳ አሳፔ ዳሪዛ ባጋይ አማኒዴሰ። አማኒዛ አቲማ አሳታ ቆዳይ ጌዴ ኢቻሹ ሺ ጋካናሰ ጶቁ ጊዴሰ።

5 ዋንቴላ ጋላሰ ኢሰታ ሃላቃቲኔ ጨማቲ ቃሴካ ሙሴ ዋጋ ታማርሲዛይቲ ዩሩሳላሜን ሺቂዳ። 6 ኢሰታ ቄሴታ ሃላቃ ሃናይኔ ቃያፋይ፥ ዮሃንሲ፥ ኢሰኪንዲርሲኔ ቄሴታ ሃላቃሶ አሳይ ዉሪ ሄ ጋዳን ቤቲዳ። 7 ኢሰቲካ ጴጥሮስን ዮሃንሳ ባ ጊዶን አሊ ኤሲዲ

* 3:22 ዛሬ 18:15፤18 * 3:25 ሜዴ 22:18 * 4:1 ቄሴታ ኢሲ ኢሲ ጌሻ ማፃፋቲ ቄሴታ ሃላቃ ጌቲሰ።

“ሃይሳ እንቴ ኦሊዛይ ኣዛ ዋልቃኔ? ዋይኮ ኦና ሱንፋኔ?” ጊዲ ኦይቺዳ።

8 ሄ ዋዴ ጴፅርሲ ዒሎ ኣያናን ኩሚዲ “እንቴኖ ዴሬ ሃላቃቶ! ዴሬ ጨማቶ! 9 እንቴ ሃች ሃ ቶሆ ሰላ ኣዴዛሰ ኦሴቲዳ ሎዎ ኦሶይ ዋኒ ኢዚ ፓዒዳኮ እንቴ ኦና ኦይቺዛ ጊዲኮ። 10 እንቴ ካቂን ያሲ ሃይቆፔ ዴንፊዳ ናዚሬቴ ዬሱስ ኪርሰቶሳ ሱንፋን ኢዚ ፓዒዳይሳኔ እንቴ ሲንፋን ኢዚ ኤቂዳይሳ እንቴካ ኢሰራዔሌ ዴሬ ኣሳይ ወሪ ሃይሳ ኤሪቴ። 11 ኢዚካ እንቴ ኬላ ሂላቲ ለቂ ኣጊዳ ሹቻይ ገንቤ ኬላሰ ጉላ ቦላ ቦላራ ዋሊዛ ሹች ጊዲዴሰ። †* 12 ኣቶቴሊ ሃራ ኦናንካ ባ፤ ሳሎፔ ጋርሳ ባጋራ ኦ ኣሳ ናይቲ ኣታና ማላ ኦሰ ኢሜቲዳይ ሃይሳፊ ሃራ ሱንፊ ዴና” ጊዴሰ።

13 ኣይሁዳታ ዱላታ ኣሳይካ ጴፅርሲኔ ዮሃንሲ ሄሳዳ ዓሊ ሃሳዩዛይሳ በዪዲ ኢሰቲ ታማርንታ ኣሰ ጊዲዳይሳ ኤሪዲ ማላሌቲዳኔ ኢሰቲ ካሴ ዬሱሳራ ዲዛይታ ጊዲዳይሳ ኣኬኪዳ። 14 ሄ ፓዒዳ ኣዴዚ ኢሰታራ ኤቂዲሺን በዪዳ ጊሽ ኢሰታሰ ሃራ ኦላናሰ ጋሶይ ቆዩዴሰ። 15 ሄሳ ጊሽ ኢሰታ ዱላታፔ ኬሳና ማላ ኣዛዚዳ። ሄሳፊ ቃሴካ ሸቄቲዲ ባ ጊዶን ዘሬቲዳ። 16 ባ ጊዶን “ሃይታ ኣሳታ ዋሰቲኖ? ዬሩሳላሜን ዲዛ ኣሳይ ወሪ ኢሰታ ኩሼን ሃኒዳ ገታ ማላታ ኤሪዴሰ። ሄሳ ጊሽ ኦ ሃ ዮዞዛ ኣሳ ባሌላናሰ ዴንዳዮኮ። 17 ጊዶ ኣቲን ሃይሲ ዮዞዚ ዴሬ ጊዶን ኬሂ ኣኮንታ ማላኔ ሃይቲ ኣሳቲ ናሞዓንፉ ሃይሳ ሃ ሱንፋን ሃራ ኦናሰካ ዮቶንታ ማላ ኢሰታሰ ሎዔሊ ዮታና” ጊዳ።

18 ኢሰታ ዒይጊዲኔ ሙሌካ ዬሱሳ ሱንፋን ሃሳዮንታ ማላኔ ታማርሶንታ ማላ ኣዛዚዳ። 19 ጴፅርሲኔ ዮሃንሲ ቃሴ ዛሪዲ “ኦኒ ያሳፊ ቦላራ ኢንቴሰ ኣዛዜታናሰ በሲዛኮኔ ኣኔ እንቴ ያሳ ሲንፋን ፒርዲቴ። 20 ኦኒ ኦ በዪዳይሳኔ ኦ ሲዪዳይሳ ሃሳያናፔ ጉዬ ጎኮ” ጊዳ።

21 ቃሴካ ኢሰታ ቦላ ማንዲዲ ዬዲዳ። ጋሶይካ ሃንኮ ዴሬይ ወሪ ሃኒዳ ዮዞዛ ጋሶን ወሪካ ያሴ ጋላቲዛ ጊሽ ኢሰታ ቃፃያናሰ ዴንዳይበቴና። 22 ሄ ገታ ማላታን ፓዒዳ ኣዴዛሰ ላይሊ ኦይዱ ታማፊ ቦላ።

23 ጴፅርሲኔ ዮሃንሲ ቃሾፔ ቢርሼቲዲ ጌዴ ባ ኣሳታኮ ሲሚዲ ቄሴታ ሃላቃቲኔ ዴሬ ጨማቲ ኢሰታ ጊዲይሳ ወርሲካ ዮቲዳ። 24 ኢሰቲካ ሄሳ ሲዪዳ ማላ ባ ቃላ ቆቁ ሂሰቲዲ ኢሲፊ ያሳኮ

† 4:11 ጉላ ገዛይሳ ኢሲ ኢሲ ባጋ ጋሞ ኣሳይ ማጋላ ዋይኮ ሹቻ ሹች ጌሰ።

* 4:11 ማዛ 118:22

“ዋጋ ጎዳወ! ኔኒ ሳሎኔ ሳዓ፥ አባኔ አባ ጊደን ዲዛይታ ወርሳ ሜዳዳሳ። * 25 ኔ አሸካራ ኑስ አዋ ዳወቴ ዱናራ ዒሎ አያናን ‘ዳሬ አሳይ አዛስ ሃንቄቲ ዴንዲዴ?”

ዴሬይ አዛስ ሜላ ማቄቲዜ?

26 ቢታ ካዎቲ ኢሲፌ ጋጊዲ

ቢታ ሃሪዛይቲ ኢሲ ቦላ ሸቄቲዲ

ጎዳ ቦላን ኔ ዶሬቲ ቲዬቲዳይሳ ቦላ ዱላቲዳ’

ጊዲ ዋሲዳ።

27 “ቱማፔ ሄርዶሲኔ ጳንፆሳ ጰላፆሲ ኢስራዔላታራኔ ሃራ ዴሬ አሳራ ሃኖ ካታማይን ኔ ዶራ ቲዬዳ ጌሻ ናዛ ዬሱሳ ቦላ ዮፆ ቃቻናስ ሸቄቲዳ። * 28 ሃይሳንካ ኔ ዋልቃኒኔ ኔ ሸኔን ካሴ ኔ ቆፒዳይሳ ኢስቲ ፖሊዳ። 29 ጎዶ! ሃዒካ ኢስታ ማንዴዛ ኔ ቤያ፤ ኑኒ ኔ አይሌቲ ኔ ቃላ ባቦንታ ኩሜላ ፃላቴላራ ዮታና ማላ ዳንዳዪሳ። 30 ፓላናስ ኔ ኩሼ ሚጫ። ኔ ና ጌሻዛ ሱንላን ጌታ ማላታ አላ” ጊዳ።

31 ኢስቲ ዋሲዳፔ ጉዬ ኢስቲ ዲዛሶይ ቃዒዴስ። ወሪካ ዒሎ አያናን ኩሚዲ ፆሳ ቃላ ፃላቴላን ዮቲዳ።

አማኒዛይታ ኢሲፌቴላ ዱስ

32 አማኒዛይቲ ወሪካ ኢሲ ዋዝናኒኔ ኢሲ ቆፋን ጋጊ ዴቲስ። ኢስታስ ዲዛይ ወሪ ኢሲ ቦላ ዴስ አቲን ባስ ዲዛዝ “ሃይሲ ታስ ቡዘ ሚሻ” ጊዛይይ ዴና። * 33 ሃዋሪቲካ ጎዳ ዬሱሳ ዴንላ ጌታ ዋልቃን ማርካቴላ ኦይኪዳ። ኡባ ቦላ ጌታ ፆሳ ኪያቴላ ዴስ። 34 ኢስታ ጊደን ሜቶታንቻይ አሳዴይካ ባዋ። ጋሶይካ ጋዴ ጊዲን ኬፊ ጊዲን ባስ ዲዛ ወርሲ ባይዚ ባይዚ ሸሺዳ ሚሽ 35 ሃዋሪታ ኩሼን ዋሊዲ ኢሲ አሳዴስ ኢዛስ ኮሺዛ ማላ ጊሼቲስ።

36 ቆጶሮሴ ጌቴቲዛሶን ዲዛ ዮሴፌ ጌቴቲዛይይ ኢሲ ለዌ ባጋ አሲ ዴስ። ኢዚካ ሃዋሪታን “ባርናባሳ” ጌቴቲ ሱሚዴስ። ሄሳስ ቢርሸላይ “ሚንሉሶ ና” ጉሳ። 37 ኢዚካ ባ ጋዴ ባይዚዳ ሚሻ ኤሂዲ ሃዋሪታ ኩሼን ዋሊዴስ።

5

ሃናኒያኔ ሳጺራ

* 4:24 ኬሳ 20:11፤ ናሂ 9:6፤ ማዛ 146:6 * 4:27 ሉቃ 23:1፥7-11፤ ማቶ

27:1-2፤ ማር 15:1፤ ዮሃ 18:28-29 * 4:32 ሃዋ 2:44-45

1 ኢሲ ሃናኒያ ጌቲቲዛ አሲ ሳጺራ ጌቲቲዛ ባ ማቼይራ ባ ጋዴ ባይዚዴስ። 2 ማቼያ ሳጺራይ ሎዔላ ኤሪሺን ጋዴዛ ባይዚዳ ሚሻፌ ባጋ ሻኪ አሺዲ ባጋ ኤሂዲ ሃዋሬታ ኩሼን ኢሚዴስ። 3-4 ቃሴ ጴፀርሲ “ሃይሶ ሃናኒያ! ኔኒ ዓሎ አያና ቦላ ዋርዶታናሲኔ ጋዴ ሚሻፌ አሻና ማላ ዓላዔይ አይሰ ኔ ዋዝናን ጌሊዴ? ባይዛናፔ ካሴ ጋዴዚ ኔይሳ ጌዴኔ? ኔ ባይዚዳፔ ጉዬ ቃሴ ሚሻይ ኔ ኩሼን ዴኔ? ሂሰቲን ኔ ሃይሳ ማላ ዋሰታ ኔ ዋዝናን ቆፓዲ? ኔ ያሳ ቦላ ዋርዶታዳሳ አቲን አሳ ቦላ ጌዴና” ጌዴስ።

5 ሄሳ ሲዪዳ ማላ ሃናኒያይ ኩንዲ ሃይቂዴስ። ሄሳ ሲዪዳ አሳይ ወሪ ዳር ባቢዴስ።

6 አቱማሳይ ዴንዲዲ አሃ ዓዲዲኔ ሄራካ ኤፊዲ ሞጊዴስ።

7 ሄዡ ሳቴፔ ጉዬ ማቼያ ኢዚ ዋኒዳኮኔ ኤርንታ ዳሼ ያዱስ።

8 ጴፀርሲካ “እኔ ታሰ ዮታ፤ እንቲ ጋዴዛ ባይዚዳ ዋጋይ ሃኖ ዓላ?” ጌዴስ። ኢዛካ “ኤ ሃኖ ሃ ዋጋይን ባይዚዳስ” ጋዴስ።

9 ጴፀርሲካ “እንቲ ያሳ አያና ፓጫናሰ አይሲ ኢሲ ዲና ጌዲዴቲ? ሄኮ ኔ አዚና ሞጊዳ አሳቲ ሞጊ ሰሚዲ ካሬን ፔንጌ ቦላ ዴቴስ። ኢሰቲ ኔናካ ኬሲ ኤኪ ኤፋና” ጌዴስ።

10 ኢዛ ሲዪዳ ማላ ሄራካ ኢዛ ቶሆ ቦላ ኩንዳዳ ሃይቃዱስ። አቱማሳይካ ሶ ጌሊዳ ማላ ሃይቂዳር ቤዪዲ ኬሲ ኤፊዲ ኢዚ አዚና አቻን ሞጊዳ። 11 ኩሜላ ዋሳ ኬላ አሳይኔ ሄሳ ሲዪዳ አሳይ ወሪ ዳር ባቢዴስ።

ሃዋሬታ ኩሼን ዳር አሲ ፓዲዴስ

12 ሃዋሬቲካ ዴሬ ጌዶን ዳር ማላታኔ ማላሊሲዛ ሚሽ ኦሊዳ። አማኒዛይቲ ወሪ “ሶሎሞኔ ሲሜሬቲላሶ” ጌቲቲዛ ፔንጌን ሽቄቲስ።

13 ኢሰታሰ ባቢዳ ጊሽ ኦኒካ ኢሰታራ ዋላኬታናሰ ኮዪቤና። ጌዶ አቲን ዴሬይ ኢሰታ ኬሂ ቦንቹስ። 14 ዳር ማጫሳቲኔ አዴቲ ዋዴፔ ዋዴን ጎዳን አማኒ አማኒ ኢሰታ ቦላ ጉጃቲዳ።

15 ሄሳ ጋሶን ጴፀርሲ አጁሺን ሃራይ አቲን ኢዛ ኤሾይ ሃርጋንቻታፔ ባጋ ሃርጋንቻታ ቦላ ዋቆና ማላ ሃርጊዛይቲ ኢቺዛ አልጋ ቦላኔ ሃላ ቦላ ካሬን ኢሺሴቴስ። 16 ዩሩሳላሜ ዩሾን ዲዛ ካታማታፔ ሃርጊዛይታኔ ቱና አያናይ ዋይሲዛይታ ኤሂን ወሪ ፓዲዳ።

ሃዋሬታ ቦላ ጋኪዳ ጎዴቲሊኔ ዋዬ

17 ሄሳ ዋዴ ቄሴታ ሃላቃይኔ ኢዛራ ዲዛ ሳዱቃዊታ ባጋቲ ወሪካ ቃናቲ ቃናቲዛይታ ዓላ ጌዲዳ። 18 ሃዋሬታ ኦይኪዲ ቃሾ

ከሐጢአት፡፡ 19 ገደ አቲን ጎዳ ከታገቻይ ቃማራ ቃሾ ከሐጢአት ደደዱ ኢስታ ከሲዲ፡፡ 20 “ቢዲ ያሳ ከሐጢአት ገቢ ገደን ኤቂዲ ሃይሳ ደዎ ቃላ ኡባ ዳሪስ ዮቲቲ” ገደሰ፡፡

21 ጋዴይ ዋንቲዳ ማላ ኢስታስ ዮቲዳይሳ ያሳ ከሐጢአት ገቢ ደደዱ ዳሪዳ ታማርሶ ኦይኪዳ፤ ቄሴታ ሃላቃይኔ ኢዛራ ዲዛይቲ ዩዲ አይሁዳታ ዱላታኔ ኢስራዔል ዳሪ ጨማታ ኩሜል ኢሲ ቦላ ሺሺዳ፡፡ ሃዋርያት ቃሾ ከሐጢአት ኤኪ ያና ማላ አሰ ዩዲዳ፡፡

22 ከቲቲ ቢዳ አሳቲ ቢዲ ኢስታ ቃሾ ከሐጢአት ዳሚቤቲና፤ ሲሚዲኔ

23 “ቃሾ ከሐጢአት ሎዔል ቁልፊቲ ዳሰ፤ ናገዛይቲካ ፔንጌ ቦላ ኤቂ ዲሺን ቤደደሰ፤ ገደ አቲን ኦ ደይ ገሊሺን ቃሰ ከሐጢአት ኦኒካ ባ” ገደ፡፡ 24 ያሳ ከሐጢአት ናገዛይታ ሃላቃይኔ ቄሴታ ሃላቃቲካ ሄሳ ሲዩዳ ማላ ሃናዛን ዳር ማላሌቲዳኔ ኢስታስ ሃናይ ወሪ ቲኪ ገደሰ፡፡ 25 ሄራካ ኢሲ አሲ ዩዲ “ሄኮ ኢንቲ ቃሾ ከሐጢአት አሳቲ ያሳ ከሐጢአት ገቢ ገደን ኤቂዲ ዳሪ ታማርሶን ዳቲስ” ገደሰ፡፡ 26 ያሳ ከሐጢአት ናገዛይታ ሃላቃይ ባ ኦሳንቻታራ ቢዲ ኢስታ ኦይኪ ኤኪ ዩዲዳ፡፡ ኦይኪ ኤሂዳይቲ አሳይ ባና ሹቻራ ጫደንታ ማላ ባቢዲ ዋልቃሶንታ ሎደራ ኤሂዳ፡፡

27-28 ሃዋርያት ኤሂዲ አይሁዳ ዱላታ ሲንላን ኤሲዳ፡፡ ቄሴታ ሃላቃይካ ኢስታ “ሃይሳ ሃ ሱንላን ኢንቲ ታማርሶንታ ማላ ኢንቲስ ሎዔል ዮቲደስኮሺን ኢንቲ ኢንቲ ቲሚርቲዛ ዩራሳላሜ ኡባን ከንሐታ፡፡ ቃሴ ኦናካ ሃ አዳዛ ሱላስ ኦይሺቲዛይታ ሂስታናስ ገደ ዳንዲዳታ” ገደሰ፡፡ *

29 ጴጥሮስኔ ሃንኮ ሃዋርያቲካ ዛሪዲ “ኦኒ አሳፔ አሊዲ ያሳስ አዛዜታናስ ቤሴስ፡፡

30 “ኢንቲ ኢዛ ሚላ ቦላ ካቂ ዋዲዳ ዩሱሳ ኦ አዋንታ ያሳይ ኢዛ ሃይቆፔ ዳንሊዳስ፡፡ 31 ኢዚካ ኢስራዔል ናይታስ ናጋራፔ ሲሚዲ ማሪታና ማላ ያሲ ኢዛ ኡባፊ ቦላኔ አሺዛዳ ሂስቲዲ ባ ኡሻቻን ቁቁ ቁቁ ሂስቲዳስ፡፡ 32 ኦኒካ ሃይሳስ ማርካታ፡፡ ቃሴካ ያሲ ባሰ አዛዜቲካ ኦናስካ አሚዳ ዪሎ አያናይካ ማርካ” ገደ፡፡

33 አሳቲ ሄሳ ሲይዲ ኢታ ሃንቆ ሃንቁቲዳ፡፡ ዋዳናካ ኮይዳ፡፡

34 ገደ አቲን ዳሪ አቻን ከሂ ቦንቹቲዳ ኢሲ ዋጋ አስታማፊ፡፡ ኢዚካ ጋማልያሌ ጌቲቲዛ ፋርሳዊታ ባጋይ ዳሪ ጨማታ ገደን ዳንዲ ኤቂዲ ሃዋርያት ጉላ ዋዳ ካሪን ጋምዓና ማላ አዛዜዳስ፡፡

35 ዳሪ ጨማታስ ሂዘገደሰ “ኢስራዔል አሳቶ! ኢንቲ ሃይታ አሳታ ቦላ ኦላናይሳ ዳር አኬካራ ኦላናስ ቤሴስ፡፡ 36 ሃይሳፊ ካሴ ኢሲ ቲዋዳሳ ጌቲቲዛይታ ባና ጌታ አሰ ሂስቲ ቆዲ ዳንዲን

* 5:27-28 ማቶ 27:25

አይዱ ዓቱ ዳሬይ ኢዛ ካሊዳሰ። ጊዶ አቲን ኢዚ አሳ ኩሼን ሃይቂዳሰ። ኢዛ ካሊዛይቲካ ጮ ላሊቲን ኢዛ ሃኖይ ጮ ማላ አቲዳሰ። ³⁷ ኢዛ፤ ጉዬካ ዳሬይ ታይቤቲካ ዋዴ ጋሊላ ዩሁዳይ ዴንዲዲ ዳር ዳሬ ባናራ ካሊዳሰ። ባና ካሊዛይታካ ዴሚዳሰ ሺን ኢዚካ ጳዪዳሰ። ኢዛ ካሊዛይቲካ ዉሪ ጳዪዳ።

³⁸ “ሄሳ ጊሽ ታ ሃዒ ኢንቴና ጊዛይ ሃይታ አሳታ አገቱ። ቦቾቹ። ኢሰታ ቆፋይ ዋይኮ ኢሰታ አሶይ አሳ፤ ጊዲኮ ጳያና። ³⁹ ያሳፊ ጊዲኮ ቃሰ ኢንቴ ኢሰታ ቱቃናሰ ዳንዳዬኬታ። ኦኔ ኤሪዛይ ኢንቴ ያሳራ ኦዩቲሼ ቤታናኮኔ” ጊዳሰ።

⁴⁰ ኢሰቲካ ኢዛ ዞሬዛ ኤኪዲ ሃዋሪታ ዪይጊዲ ጋሪፊሲዳ። ናምዓንሉ ዬሱሳ ሱንላን ሃሳዮንታ ማላ ኢዛዚዲ ዬዲዳ።

⁴¹ ሃዋሪቲካ ኢዛ ሱንላ ጊሽ ካዉያናሰ ቤሲዛ ጊሽ ዳር ኡፋዬቲሼ ዳሬ ጨማታ ኣቻፊ ኬዚ ቢዳ። ⁴² ጋላሰ ጋላሰ ያሳ ኬላኒኔ ኢሳ ኢሳ ኬላን ዬሱሲ ኢዚ ያሲ ዶሪዳዴ ጊዲዳይሳ ታማርሶፊኔ ሳባኮ፤ ሙሌካ ጉዬ ጊቤቴና።

6

ላፑን ዳቆኔታ ዶሬቴል

¹ ኣማኒዛይታ ቆዳይ ዳሪ ዳሪ ቢዛ ዋዴ ጊሪኬ ቢታፊ ዬዳ አይሁዳ አሳቲ ዩሁዳን ዲዛ አይሁዳ አሳ ጉዬራ ዚጊሬቲዳ። ጋሶይካ ኡባ ዋዴ ሚዛ ካል ጊሺሼ ኣምዔታ ዉዴቶንታ አገዳ ጊሻሳ። ² ሄሳ ጊሽ ኦ ታማኔ ናምዑ ሃዋሪቲ ኣማኒዛ ሃራታ ኢሲ ቦላ ሺሺዲ “ኦኒ ካላ ጊሹን ጌሊዲ ያሳ ቃላ ታማርሶ ኣጋናሰ ቤሴና። ³ ሄሳ ጊሽ ኦ ኢሻቶ! ኢንቴ ጊዶፊ ኤራንቻታ። ዪሎ ኣያናን ኩሚዳይታኔ ሎዎ ማርካቴል ዲዛ ላፑን አሳታ ዶሪቴ፤ ሃይሳ ኣላፊቴል ኦ ኢሰታሰ ኢማና። ⁴ ኦኒ ጊዲኮ ዋሳኒኔ ቃላ ዮቶን ሚናና” ጊዳ።

⁵ ኢሰቲ ጊዳ ዮዖይ ሲዩዳይታ ኡፋይሲዳሰ፤ ኣማኖኒኔ ዪሎ ኣያናን ኩሚዳይቲ ኢሰቲፋኖሴ፤ ፒሊጶሳ፤ ጲርሰቆርሳ፤ ኒቃርና፤ ዪሞና፤ ጳርሜናኔ ዩሁዳቲላን ጌሊዳ ኣንዶኪያ ዳሬ ኣሰ ኒቆሎሳ ዶሪዳ። ⁶ ሄይታ ኤሂዲ ሃዋሪታ ሲንል ሺሺዳ። ኢሰቲካ ባ ኩሼ ኢሰታ ቦላ ዋሊዲ ኢሰታሰ ዋሲዳ።

⁷ ያሳ ቃላይ ኣኪ ኣኪ ቢዳሰ። ኣማኒዛይታ ቆዳይ ዬሩሳላሜን ዳሪ ዳሪ ቢዳሰ። ቄሴታ፤ ዳርቲ ኣማኒዳ።

ኢሰቲፋኖሴ ኦይኬቴል

8 ሄ ዋዴ ኢስቲፋኖሲ ያሳ አሞቴላኒኔ ዋልቃን ኩሚዲ ዴሬዛ ጊዶን ጊታ ማላሊሲዛ ማላታታ ኦሴዴስ። 9 ዋዜቲ ኬዚዳ ጌቲቲ ያይጌቲዛሶፔ ኣይሁዳታ ዋሳ ኬላፌ ዪዳ ኣስ ጊዲዳ ቃሬናፔኔ ኢስኪንዲሪያፔ፤ ቃሴካ ኪልቂያፔኔ ኢሲያ ኣወራጃታፔ ዪዳ ኣሳቲካ ወሪ ኢስቲፋኖሴራ ማርሼቲዳ። 10 ጊዶ ኣቲን ኤራቴላን ኢዚ ሃሳዪዛ ሃሳያኔ ኢዛን ዲዛ ኣያና ኤቂታናስ ዳንዳዪቤቴና። 11 ሄሳ ጊሽ “ኢስቲፋኖሲ ሙሴኔ ያሴ ጫዪሺን ኑ ሲዪዶስ” ጊዛ ኣሳታ ጉዬራ ጊጊሲዳ።

12 ሄ ዋዴ ዴሬዛ፥ ዴሬ ጨማታኔ ዋጋ ታማርሲዛይታ ዴንፊሊዲኔ ኢስቲፋኖሴ ኦይሊዲ ዴሬ ዱላታኮ ሺሺዳ። 13 ኢዛ ቦላ “ሃይሲ ኣዴዚ ሃይሳ ያሳ ኬላ ቦላኔ ዋጋ ቦላ ጫሻ ቃላ ሃሳያ ሙሊካ ኣጊቤና። 14 ጋሶይካ ሃይሲ ኣዴዚ ናዚሬቴ ዬሱሲ ሃይሳ ያሳ ኬላ ጳይሳና ጊሺኒኔ ኑ ሙሴፔ ኤኪዳ ዋጋ ላማና ጊ ሃሳዪሺን ኑ ሲዪዶስ” ጊ ዋርዶራ ማርካቲዛ ኣሳታ ሺሺዲ ማርካሲዳ።

15 ዱላታ ኡቲዳ ኣሳይ ወሪ ኢስቲፋኖሴ ቲሺ ሂስቲ ያሊሺን ኢዛ ኣይፌሶይ ኢስታስ ኪታንቻ ኣይፌሶ ሚሳቲ ቤቲዴስ።

7

1 ቂሴታ ሃላቃይ ኢስቲፋኖሴ “ሃይሲ ኔ ቦላ ሺቂዳ ዮዖዚ ቱሜ?” ጊ ኣይቺዴስ።

2 ኢስቲፋኖሲካ ሂዝጊዴስ “ታ አሻቶ! ታ ኣዋቶ! ታ ጊዛይሳ ሲዪቴ! ኑ ኣዋ ኣብራሃሜይ ካራኔ ጌቲቲዛሶ ያናፔ ካሴ ቡሮ ሜሶፖቶሚያን ዲሺን ቦንቾ ጎዳይ ኢዛስ ቆንጨዲ፥ 3 ን ዴሬፔኔ ኔ ዳቦፌ ሻኬታዳ ታ ኔና ቤሲዛሶ ባ ጊዴስ። 4 ኢዚካ ካልዳዊታ ቢታፌ ኬዚዲ ካራኔ ጌቲቲዛ ቢታን ኡቲዴስ። ኢዛ ኣዋይ ሃይቂዳፔ ጉዬ አንቴ ሃዒ ዲዛሶ ሃ ዴሬ ኢዛ ኤሂዴስ። * 5 ሃራይ ኣቶሺን ኢሲ ቶሆይ ኤቂዛ ጋዴይ ኢዛስ ሃይሳፌ አሜቲቤና። ጊዶ ኣቲን ሄ ዋዴ ኢዛስ ኢሲ ናይካ ባይንዳ ዲሺን ኢዚኔ ኢዛፔ ጉዬን ኢዛ ዜሬሊ ቢታዮ ላታና ማላ ያሲ ኢዛስ ጫቂዴስ። * 6 ቃሴካ ያሲ ኢዛስ ሂዝጊ ዮቲዴስ ን ዜሬሊ ኣላጋ ቢታን ቤቴ ኣስ ጊዳና። ኦይዱ ያቴ ላይላ ኣይሌቴላ ቃምባራ ጊዶን ዋዩታና። * 7 ጊዶ ኣቲን ኢስታ ኣይሌ ማላ ሃሪዛ ዴሬ ታ ቃፃያና። ሂሳፌ ጉዬ ኢስቲ ሄ ቢታፌ ኬዚዲ ሃኖ ሃ ሶይን ታስ ጎይናና ጊዴስ።

* 7:4 ሜዴ 11:31፤ 12:4 * 7:5 ሜዴ 12:7፤ 13:15፤ 15:18፤ 17:8

* 7:6 ሜዴ 15:13-14

* 8 ሄሳፌ ጉዬ ቃፃራ ዋጋ ጫቆ ኢዛሰ አሟደሰ። አብራሃሚይካ ዩሳቃ ዩሊዲ ኢዛ ኦስፑንፋ ጋላሰ ቃፃሪደሰ። ዩሳቃይካ ያቆቤ ዩሊደሰ። ያቆቤይካ ታማኔ ናሞቡ ቆሞታ ዩሊደሰ። *

9 ሄ ቆሞታ አዋቲ ዮሴፌ ቦላ ቃናቲዲ ኢዛ አይሌቴላሰ ዱጌ ጊብፄ ባይዚዳ። ጊዶ አቲን ፆሲ ኢዛራ ደሰ፤ * 10 ሜቶ ኡባፌ ኢዛ አሺደሰ። ጊብፄ ካዋ ፓርኔ ሲንፋን ቦንቸ አሟደሰ። ፓርኔይ ዩሊዛ ጊብፄ ቢታኒኔ ባ ኬፋ አሳ ኡባ ቦላ አላፌቴላን ሹሟደሰ። *

11 “ሄ ዋዴ ካናኔኒኔ ጊብፄን ዳሮ ሜቶ ኡሂዳ ጌታ ኮሻይ ደንዲደሰ። ኑ አዋታሰካ ሚዛ ካሊ ቆዩደሰ። * 12 ያቆቤይ ጊብፄ ደራጌ ካሊ ዲዛይሳ ሲይዲ ኑ አዋታ ኮይሮ ጊብፄ ዩዲደሰ። 13 ኢሰቲ ናሞዓንፉ ቢዛ ዋዴ ዮሴፌይ ኢዚ እናኮኔ ባና ባ አሻታሰ ቆንጨሲደሰ። ፓርኔይካ ዮሴፌ አሻታ ኤሪደሰ። * 14 ሄሳፌ ጉዬ ዮሴፌይ ከቲዲ ባ አዋ ያቆቤኔ ላፑን ታማኔ ኢቻሹ ጊዲዛ ባ ዳቦታ ኩሜላ ኤሂሲደሰ። * 15 ያቆቤይ ዱጌ ጊብፄ ዋዲደሰ። ኢዚካ ኑ አዋቲካ ዉሪ ሄን ሃይቂዳ። * 16 ኢሰታ አሃይካ ሴኬሜ ጌቴቲዛሶ ኤፊን አብራሃሚይ ኤሞሪ ናይታፔ ባ ሚሻን ሻሚዳ ዱፎን ሞጌቲደሰ። *

17 “ዮሲ አብራሃሚሰ ጫቂዳ ቃላይ ፖሌቲዛ ዋዴይ ማቲሺን ጊብፄን ዲዛ ኑ አሳ ቆዳይ ዳሪ ዳሪ ቢደሰ። 18 ሄሳፌ ጉዬ ጊብፄ ቢታን ዮሴፌ ኤሮንታ ሃራ ካዋይ ካዋቲደሰ። 19 ኢዚካ ኑ አሳ ባ ጌኔ ኦሶን ሜቶሊደሰ። ቡሮ ዩሌቲዳ ጉፋ ናይቲ ሃይቃና ማላኔ ዩሊዳ ናይታ ካሬ ኬሲ ዋራ ዩጋና ማላ ዋልቃሊደሰ። * 20 ሄ ዋዴ ሙሴይ ዩሌቲደሰ። ኢዚካ ፆሳ አቻን ዶሴቲዳ ማላ ሎፆ ና ጊዲደሰ። ባ አዋ ኬፋን ሄሹ አገና አልዒሶን ዲጨደሰ። * 21 ኢዚ ጌዴ ዋራ ዩጌቲዳ ዋዴ ካዋ ፓርኔ ማጫ ናፆ ዳማዳ ባሰ ኤካደሰ። ባ ና ማላ አላዳ ዲቻደሰ። * 22 ሙሴይካ ጊብፄታ አቶ ኤራቴላ ዉርሲ ታማሪደሰ። ዮፆን ኤራ፤ ኦሶንካ ሚኖ ጊዲደሰ።

* 7:7 ኬሳ 3:12 * 7:8 ሜዴ 17:10-14፤ 21:2-4፤ 25:26፤ 29:31-35:18
 * 7:9 ሜዴ 37:11፤ 37:28፤ 39:2፤21 * 7:10 ሜዴ 41:39-41 * 7:11 ሜዴ 42:1-2 * 7:13 ሜዴ 45:1፤ 45:16 * 7:14 ሜዴ 45:9-10፤17-18፤ 46:27 * 7:15 ሜዴ 46:1-7፤ 49:33 * 7:16 ሜዴ 23:3-16፤ 33:19፤ 50:7-13፤ ኢያ 24:32 * 7:19 ኬሳ 1:10-11፤ 1:22 * 7:20 ኬሳ 2:2 * 7:21 ኬሳ 2:3-10

23 “ሙሴ ላይሴ ኦይዱ ታሙ ጊዲዳ ዋዴ ሙሴይ ባ አሻታ ኢስራዔል ናይታ ቤያናስ ባ ዋዝናን ቆፒዴስ። * 24 ኢዚካ ኢሲ ጊብፂ ኣሲ ሙሴ ባጋ ኣሳፔ ኢሳዴ ቦላ ቆሆ ጋሊሺን ቤዪዲ ባ ባጋ ኣዴዛ ማዲዴስ፤ ሄ ጊብፂ ኣዴዛ ዋዲዲ ሄ ቆሄቲዳይሳ ሃሎ ኬሲዴስ። 25 ሙሴስ ፆሲ ኢዛ ኩሺን ኢስታ ዋዛናይሳ ኢዛ ኣሳይ ኣኬኪዛ ሚሳቲዴስ። ጊዶ ኣቲን ኢስቲ ሄሳ ዩሺ ቆፒቤቴና። 26 ዋንቴላ ጋላስ ቃሴካ ኢስራዔል ናይታፔ ናምዓቲ ባ ጊዶን ኦዬቲሺን ጋኪዲ ኦዬቲዛይታ ገረሳናስ ኮይዲ ‘ሃይቶ! ኣሳቶ ኢንቴ ኢንቴ ጊዶን ኢሻንታኮ፤ ኢንቴ ዋኒዲ ኢሶይ ኢሳ ቆሄቲ?’ ጊዴስ።

27-28 “ባ ላጌዛ ቦላ ቆሆ ጋሊዳይሲ ሙሴ ሱጊ ዩጊዲ ‘ኔና ኑ ቦላ ኑና ሃሪዛዴኔ ኑ ቦላ ፒርዲዛዴ ኦሊ ሹሚዳይ ኦኔ? ዋይኮ ቃማ ጊብፂ ኣዴዛ ዋዲይሳታ ታናካ ዋዳና ኮያይ?’ ጊዴስ። 29 ሙሴይ ሄሳ ሲዪዳ ማላ ሚዲያማ ቢታ ቤቲዲ ሄን ቤቴ ኣስ ጊዲ ዴዲዴስ፤ ያንካ ናምዑ ኣቱማ ና ዩሊዴስ። *

30 “ሄሳፌ ኦይዱ ታሙ ላይሳፌ ጉዬ ሲና ዙማ ኣቻን ዲዛ ባዘ ቢታን ቂሪ ዋሪ ጊዶን ኤፂዛ ታማ ላጮን ኪታንቻይ ኢዛስ ቤቲዴስ። 31-32 ሙሴይካ ኢዛ ቤዪዳ ማላ ማላሌቲዴስ። ኣዛኮኔ ሻኪ ኤራናስ ኢዚ ሄን ኢዛኮ ሸቂሺን ጎዳ ቃላይ ‘ታኒ ኔ ኣዋንታ ፆሳ ኣብራሃማ፥ ዩሳቃኔ ያቆቤ ፆሳ’ ገሺን ሲይዴስ። ሙሴይካ ዳሮ ዳጋሚዴስ፤ ፃላናስካ ፃሊቤና።

33-34 “ጎዳይካ ኢዛስ ‘ሃይሲ ኔ ኤቂዳሶይ ጌሻሶ ጊዲዳ ገሺ ኔ ቶሆፔ ጫማ ሾዳ። ጊብፂን ዲዛ ታ ዴሬታ ዋዬ ታ ቱማፔ ቤያዲስ፤ ኢስቲ ዋሲዛ ዋዬ ዋሶዛ ታ ሲያዳ ኢስታ ኣሻናስ ዋዳዲስ። ኔ ሃዒካ ሃያ፤ ታ ኔና ዲጌ ጊብፂ ዛራዳ ኪታኖ’ ጊዴስ።

35 “ሂስቲን ሄይቲ ‘ኑ ቦላ ኔና ሃሪዛዴኔ ፒርዲዛዴ ሂስቲ ኦኒ ሹሚዴ?’ ጊዲ ኣሳይ ካሴ ካዲዳ ሙሴ ፆሲ ቂሪ ዋሪ ጊዶን ኢዛስ ቤቲዳ ኪታንቻ ባጋራ ኢስታ ሃሪዛዴኔ ኣሺዛዴ ሂስቲዲ ኢስታኮ ዛሪ ዩዲዴስ። 36 ኢዚካ ኢስታ ካሌሊዲ ጊብፂፔ ኬሲዴስ። ጊብፂን፥ ዘፆ ኣባኒኔ ባዘ ቢታን ኦይዱ ታሙ ላይሴ ዳሮ ማላሊሲዛ ሚሻታኔ ጊታ ማላታታ ኢስታስ ኦሊዴስ። * 37 “ኢስራዔል ናይታስ ‘ታ ማላ ናቤ ፆሲ ኢንቴ ጊዶፌ ዴንፋና’ ጊዳይሲ ሃይሳ ሙሴኮ! * 38 ኢዚካ ሲና ዙማ ቦላ ሃሳዪዳ

* 7:23 ኬሳ 2:11-15 * 7:29 ኬሳ 18:3-4 * 7:36 ኬሳ 7:3፤ 14:21፤ ታይ 14:33 * 7:37 ዛሬ 18:15፤18

ከታንቻራኔ ባዞ ቢታን ኑ አዋታራ ዳሬ ዱላታ ጊደን ዳሰ። ዴፆ ቃላካ ሃ ኑስ አላናሰ ኤኪዳሰ። *

³⁹ “ኑ አዋቲ ጊዲኮ ኢዛራ ኤቁቲዳ አቲን ኢዛሰ አዛዜታናሰ ኮዮንታ ጊሽ ባ ዎዝናራ ጉዬ ጊብፄ ሰሚዳ። ⁴⁰ አሮኔሰካ ኑ ሰንሳራ ቢዛ ኤቃ ኑስ ገጊሳ! ኑና ጊብፄፔ ካሌሊ ኬሲዳ ሙሴይ ዋኒዳኮ ኑ ኤሮኮ፣ ጊዳ። * ⁴¹ ሄ ዎዴ ማራ ሚሲሌ ሜዲዲ ኤቃሰ ያርሾ ሺሺዳ። ባርካ ሜዲዳ ባ ኩሼ ኦሶን ኡፋዬቲዲ ጉፒዳ። *

⁴² “ጊዶ አቲን ያሲ ኢሰታሰ ዞኮ ዛሪዳሰ። ኢሰቲ ሳሎ ያለንቲታሰ ጎይናና ማላ አሊ ኢሚዳሰ። ሄሲካ ናቤታ ማፃፋን ‘ኢንቴኖ ኢሰራዔሌ ናይቶ!

ኢንቴ ባዞ ቢታን ኦይዱ ታሙ ላይሳ ዲዛ ዎዴ ኢንቴፌ ያርሾኔ ሙፀዋታ ታሰ ሺሺ ኤሬቲ?

⁴³ ሃራፔካ ኢንቴ ጎይናናሶ ኦሊዳ ኤቃ ሞሎኬ ዱንካናኔ

ኢንቴ ኤቃ ራፋኔ ያለንቴ ሚሲሌዛ ቶቁ ቶቁ ሂሰቲ ኦይኪዳታ።

ሄሳ ጊሽ ታ ኢንቴና ኢንቴ ዲዛሶፔ ዴንላዳ ባቢሎኔራ አላ ዬዳና፣ ጌቲቲዲ ፃፌቲዳሰ።

⁴⁴ “ያሲ ሙሴ ቤሲዳ ለሚሶዛ ማላኔ አዛዚዳይሳ ማላ ኦሴቲዳ ያሲ አሳራ ጋጊዛ ዱንካኔያ ኑ አዋታራ ባዞ ቢታን ዴዓዱሰ። * ⁴⁵ ኑ አዋቲ ዱንካኔዮ ኤኪዳይሳፌ ጉዬ ያሲ ኢያሶ ካሌሊን ካሴ ኢሰታ ጎዲዳ ዴሬታ ላቲዳ ዎዴ ዱንካኔዮ ኤኪ ጌሊዳ። ዳዉቲ ዎዴ ጋካናሰ ዱንካኔያ ሄ ቢታን ዴዓዱሰ። *

⁴⁶ ዳዉቲይካ ያሳ ሲንላን ቦንቾ ዴሚዲ ያቆቤ ጎዳሰ አቆሶ ገጊሳናሰ ዎሲዳሰ። * ⁴⁷ ጊዶ አቲን ሶሎሞኔይ ኢዛሰ አቆሶ ኬፂዳሰ።

⁴⁸⁻⁵⁰ “ጊዶ አቲን ዎጋ ጎዳይ አሳ ኩሼይ ኬፂዳ ኬላን ዴና። ሄሲካ ናቤይ

ካሴ ጌሻ ማፃፋን ፃፌቲዳ ማላ

‘ሳሎይ ታ ኡቲዛ አልጋ፤

ቢታይካ ታ ቶሆን ዬዲዛሶ፤

ሂሰቲን ኢንቴ ታሰ አይ ማላ ኬሊ ኬፂቲ?

ዎይኮ ታ ሸሞፓናሶይ አዋይሴ? *

* **7:38** ኬሳ 19:1-20:17፤ ዛሬ 5:1-33 * **7:40** ኬሳ 32:1 * **7:41** ኬሳ 32:2-6 * **7:44** ኬሳ 25:9:40 * **7:45** ኢያ 3:14-17 * **7:46** 2ሳሜ 7:1-16፤ 1ታር 17:1-14 * **7:48-50** ኢሳ 66:1-2

ሃይሳ ወርሲ ታ ኩሼይ ኦሊቤኔ?’

ጌስ ጎዳይ ያሳይ።”

51 “ኢንቴና ዋዝና ሙሜቶ! ሃይሳ ቱሌቶ! ኢንቴካ ኢንቴ ኣዋታ ማላ ኡባ ዋዴ ዒሎ ኣያናራ ኤቄቲታ። * 52 ናቤታፔ ኢንቴ ኣዋቲ ጎድንታ ናቤይ ኦኔ? ዒሎዛ ዮሃኒሳ ካሴቲ ዮቲዳ ናቤታካ ዋዲዳ፤ ኢንቴካ ሃሲ ኢዛ ኣሊ ኢሚዴታኔ ዋዲዴታ። 53 ኪታንቻ ባጋራ ኢንቴስ ኢሜቲዳ ዋጋ ኤኪዴታ ኣቲን ናጊቤኬታ” ጊዴስ።

ኢስቲፋኖሲ ሹቻን ጫዴቲ ሃይቂዴስ

54 ዱላታን ዲዛ ኣሳይ ሄሳ ሲዪዳ ማላ ዳር ሃንቄቲዲ፥ ኢዛ ቦላ ባ ኣቺ ጋርጨዴስ። 55-56 ጊዲንካ ኢስቲፋኖሲ ዒሎ ኣያናን ኩሚዲኔ ፑዴ ሳሎ ቲሺ ሂስቲ ያሊሺን ያሳ ቦንቻን ዩሱሲ ያሳ ኡሻቻን ኤቄዳይሳ ቤዪዲ “ሄኮ ታ ሳሎይ ዶዬቲዳይሳኔ ኣሳ ናይ ያሳ ኡሻቻን ኤቄዳይሳ ቤያይስ” ጊዴስ።

57 ሄሳ ዋዴ ኣሳይ ቃላ ቶቄ ሂስቲ ዋሲሽ ባ ሃይሌ ቱጨ ኦይኪዲ ኢዛኮ ኢሲፌ ዋዲዴስ። 58 ኢስቲፋኖሲ ኦይኪዲ ካታማፔ ጌዴ ካሬ ኦሊዳ። ሹቻን ጫቶ ኦይኪዳ። ሄሲ ወሪ ሃኒሺን ማርካቲካ ባ ማይያ ሳወሌ ጌቲቲዛ ፓንሳ ኣቻን ዋሊዳ። 59 ኢስቲ ሹቻራ ኢዛ ጫዲሺን ኢስቲፋኖሲ “ታ ጎዳ ዩሱሳ ታ ሸምፖዮ ኔኮ ኤካ” ጊዲ ዋሲዴስ። 60 ቃሴካ ጉልባቲዲ ቶቃ ቃላን “ጎዶ! ሃይታንታ ናጋራ ቆዶፓ” ጊዲ ዋሲዴስ። ሄሳ ጊዳፔ ጉዬ ሃይቂዴስ።

8

1 ሳወሌይካ ኢስቲፋኖሲ ሃይቆን ኢስታራ ቆፋን ጋጊዴስ። ሄ ዋዴ ዩሩሳላሚን ዲዛ ኣማኒዛይታ ቦላ ጊታ ጎዴቲሊ ዴንዲዴስ። ሃዋሬቲ ኣታፌ ኣማኒዛይቲ ወሪ ዩሁዳ ኣወራጃኒኔ ሳማሪያ ኣወራጃን ኡባን ላሌቲዳ። 2 ኣያና ኦሶን ሚኒ ኤቄዳ ኣሳቲ ኢስቲፋኖሲ ሞጊዲ፥ ኢዛስ ዳር ዩኪዳ። 3 ሳወሌይ ቃሴ ዋሳ ኬላ ቆይሳናስ ጊዲ ዴንዲዴስ። ኣማኒዛ ኣሳ ኢሳ ኢሳ ኬሌ ጌሊዲ ማጫታኔ ኣዴታ ጎቺ ጎቺ ኬሲዲ ቃሾ ኬላን ጌልሊዴስ። *

ፒሊጶሲ ሳማሪያ ዴሬን ሚሺራቾ ቃላ ማርካቲዴስ

4 ላሌቲዳይቲ ወሪ ባ ቢዳሶን ቢዳሶን ያሳ ቃላ ዮቲዳ። 5 ፒሊጶሲካ ሳማሪያ ጌቲቲዛ ካታማ ዋዲዲ ኣሳስ ኪርስቶሳ ሳባኪዴስ። 6 ዳር ዴሬይ ፒሊጶሲ ኦሊዛ ማላታ ቤዪዲ ኢዚ

* 7:51 ኢሳ 63:10 * 8:3 ሃዋ 22:4-5፤ 26:9-11

የቲዛ ቃላ ዋዝናፔ ሎዔሊ ሲይደሰ። ⁷ ቱና ኣያናቲካ ዳር ኣሳፔ ዋሲ ዋሲ ኬዚዳ። ዳር ቶሆ ሲላቲኔ ዋቤቲካ ፓዒዳ። ⁸ ሄሳ ጊሽ ሄ ካታማ ኣሳይ ዳር ኡፋዬቲደሰ።

⁹ ጊዶ ኣቲን ሄሳፌ ካሴ ሄ ካታማዪን ማር ማርቲዲ ሳማሪያ ኣሳ ዳር ማላሊሲዛዝ ኦሊዛ ኢሲ ሲሞና ጌቲቲዛ ማርይ ደሰ። ኢዚካ ባና ጊታ ኣሳ ማላ ቆዲዛደ። ¹⁰ ኣሳይ ወሪ ጉላታፔ ጊታታ ጋካናሰ ወሪካ “ሃይሲ ኣዴዚ ጊታ ዋልቃማ ጌቲቲዛ ያሳ ዋልቃ” ጊሹ ኢዚ ጊዛይሳ ወርሲ ዋዝናፔ ሲዩሰ። ¹¹ ዳር ዋዴ ባ ማርቲፋ ኦሶን ኣሳ ማላሊሲዳ ጊሽ ኣሳይ ኢዛ ዋዝናፔ ካሊሹ ጋምዒደሰ። ¹² ጊዶ ኣቲን ፒሊጶሲ ያሳ ካዋቲፋ ጊሺኔ ዩሱሰ ከርሰቶሳ ጊሽ ሳባኪዳይሳ ሲይዲ ኣማኒዳ ማጫሳይኔ ኣቲማሳይ ፃማቄቲደሰ። ¹³ ሲሞኒካ ኣማኒዲ ፃማቄቲደሰ። ፒሊጶሳካ ካሊ ቢዲ ሃኒዛ ጊታ ማላታ ቤዪዲ ማላሊቲደሰ።

¹⁴ ዬሩሳላሜን ዲዛ ሃዋሬቲ ሳማሪያ ኣሳይ ያሳ ቃላ ኤኪዲ ኣማኒዳይሳ ሲይዲ ጴፅሮሳኔ ዮሃኒሳ ኢስታኮ ከቲዳ። ¹⁵ ኢስቲካ ሳማሪያ ጋኪዲ ኣማኒዳ ኣሳይ ዒሎ ኣያና ኤካና ማላ ኣሳሰ ዋሲዳ። ¹⁶ ጋሶይካ ሄ ዋዴ ኢስቲ ጮ ዩሱሳ ሱንፋን ፃማቄቲዳ ኣቲን ቡሮ ዒሎ ኣያናይ ኢስታፌ ኢሳዴ ቦላካ ዋዲቤና። ¹⁷ ሄሳ ጊሽ ጴፅሮሲኔ ዮሃኒሲ ባ ኩሹ ኣሳ ቦላ ዋሊን ኣሳይ ዒሎ ኣያና ኤኪደሰ።

¹⁸ ሲሞኒካ ሃዋሬቲ ኩሹ ዋሊ ዋሲን ዒሎ ኣያናይ ኢማቲዛይሳ ቤዪዲ ጴፅሮሳሲኔ ዮሃኒሳሰ ሚሹ ኤኪ ዪዲ፥ ¹⁹ “ታ ኢዛ ቦላ ታ ኩሹ ዋሊዛዴይ ወሪ ዒሎ ኣያና ኤካና ማላ ሃይሳ ማላ ጎዳቲል ታሰካ ኢማቲ” ጊን፥

²⁰ ጴፅሮሲ ኢዛሰ ዛሪዲ “ያሳ ኢሞታ ኔ ሚሻን ሻማና ቆፒዳ ጊሽ ኔኒ ኔ ሚሻራ ኢሲፌ ጳያ። ²¹ ኔ ዋዝናይ ያሳ ሲንፋን ሱሬ ጊዶንታ ጊሽ ኔሰ ሃይሳ ሃ ኦሶዛን ጊሻይ ዋይኮ ቃዳይ ደና። ²² ሃይሳ ኔ ኢታቲፋ ጊሽ ሃዒ ኤሌ ማርቲፋን ጌላ፤ ኔ ዋዝና ቆፋ ኔሰ ኣቶ ጋናኮኔ ኔሰ ጎዳ ዋሳ። ²³ ጋሶይካ ኔኒ ኢታቲፋን ኩሚዳይሲኔ ማካላን ቃሹታ ኡቲዳይሲ ታሰ ቤቲሰ” ጊደሰ።

²⁴ ሲሞኒካ ዛሪዲ “ኢንቲ ጊዳ ዮዖታፔ ኣይኮይካ ታ ቦላ ጋኮንታ ማላ ታሰ ጎዳ ዋሲቲ” ጊደሰ።

²⁵ ጴፅሮሲኔ ዮሃኒሲ ጎዳ ቃላ ማርካቲዳይሳፌኔ ቆንጪሲ የቲዳይሳፌ ጉዬ ዳር ሳማሪያ ጉታታን ሚሹራቾ ቃላ ሳባኪሹ ዬሩሳላሜ ሲሚዳ።

ቶጲያ ካዋ ሚሻ ቦላ ሹማቲዳ ጉንዱላዛ ፒሊጶሲ ፃማቄደሰ

26 ጎዳ ኪታንቻይ ፒሊጶሳ “ዴንዳ! ዩሩሳላሜፔ ዱጌ ባጋራ ጌዴ ጋዛ ኤፊዛ ባዛ ኦጋራ ባ” ጌዴስ። 27 ኢዚካ ዴንዱ ቢዴስ። ሂንዴኮ ጌቲቲዛ ቶጲያፔ ጌዱዳ ካዎያ ባ ኬፋኒኔ ባ ካዎቲፋን ዱዛ ኡባ ሚሻ ቦላ አላፊቲፋን ዎሊዳ ኢሲ ቶጲያ ጉንዱላ አሲ ኢዛራ ጋጌዴስ። ሄ አዴዚ ያሳሰ ጎይናና ዩሩሳላሜ ቢዴስ። 28 ኢዚ ሄፔ ሲሚሼ ፓራ-ጋሬን ኡቲዱ ናቤ ኢሳያሳ ማፃፋ ናባቤስ። 29 ኢያናይ ፒሊጶሳ “ባ! ጌዴ ፓራ-ጋሬዛኮ ሺቃ” ጌዴስ።

30 ፒሊጶሲካ ኤሶቲዱ ፓራ-ጋሬዛኮ ቢዱ አዴዚ ናቤ ኢሳያሳ ማፃፋ ናባቤሺን ሲይዱ “ሄሲ ኔ ናባቢዛይሲ ኔስ ጌሊዜ?” ጌዴስ።

31 ጉንዱላ አዴዚካ “ታና ኤሪሲዛ አሲ ባይንዳ ታ ዎስታ ኤሮ?” ጌዴስ። ኢዚካ ጌዴ ኢዛ ጋሬዛን ጌልዱ ኢዛ አቻን ኡታና ማላ ዎሲዴስ። 32 ኢዚ ናባቢዛ ማፃፋይ

“ኢዚ ዶርሳ ማላ ሹኬታና ላጌቲዴስ፤ ዶርሳ ላቃይ ኢሲኬ ቃንፂዛይሳ ሲንፋን ጮቡ ጊዛ ማላ ሄሳዞካ ኢዚ ባ ዱና ፖጊቤና።

33 ባና ካዉሺዱ ፒርዳይ ባይንዳዴ ጌዱዴስ።

ኢዛ ሽዎፖይ ቢታ ቦላፌ ዲጌቲዴስ።

ኢዛ ዩሌቲፋ ጊሽ ሃሳያና ዳንዳዩዛይ ኦኔ?” ጌስ።

34 ጉንዱላ አዴዚካ ዛሪዱ ፒሊጶሳ “ናቤዚ ሃይሳ ኦና ጊሽ ጊዜ? ባ ጊሽ ጊዜዬ? ዎይኮ ሃራ አሳ ጊሽ ጊዜ? ሃያና፥ ታስ ዮታርኪ!” ጌዴስ። 35 ፒሊጶሲካ ባ ዱና ዶይዱ ሄ ማፃፋፔ ዶሚዱ ዩሱሳ ሚሺራቾ ቃላ ጊሽ ማርካቲዴስ።

36 ኢስቲ ኢሲፌ ቢሼ ሃሊ ዱዛሶ ጋኪዳ። አዴዚካ “ሄኮ ሃሊ ሃይሳን ዴስ፤ ሂስቲን ታ ፃማቄቶንታ ማላ ዲጊዛይ አዜ?” ጌዴስ።

37 ፒሊጶሲካ “ኔ ኩሜፋ ዎዝናፔ አማኒኮ ፃማቄታና ዳንዳያሳ” ጌዴስ። አዴዚካ “ዩሱስ ኪርሰቶሲ ያሳ ና ጌዱዳይሳ አማናይስ” ጌዴስ። *

38 አዴዚ ፓራ ጋሬዚ ኤቃና ማላ አዛዚን ናምዒይ ኢሲፌ ሃሳን ዎፏን ፒሊጶሲ አዴዛ ፃማቄዴስ። 39 ኢስቲ ሃላፌ ኬዚሺን ያሳ ኢያናይ ፒሊጶሳ ዴንሊ ኤፊዴስ። አዴዚ ሄሳፌ ጉዬ ኢዛ ቤይቤና። ጊዶ አቲን ኡፋይሳን ባ ኦጌ ቢዴስ። 40 ሄሳፌ ጉዬ

* 8:37 ኢሲ ኢሲ ገሻ ማፃፋቲ ፓይዶ 37 ቦላ ዱዛ ቆፋ ጉጃቲስ፤ ኢሲ ኢሶቲ ቃሲካ ቆፋ አይኪቤቲና።

ፒሊጶሲ አዛዎን ጌቴቲዛሶን ቤቴደስ። ቂሳሪያ ጌቴቲዛሶ ጋካናስ ኢዚ ቢዛ ኦጌ ቦላ ካታማን ኡባን ሚሺራቾ ቃላ ሳባኪደስ።

9

ሳዉሌይ አማኒደስ

(ሃዋ 22:6-16፤ 26:12-18)

¹ ሳዉሌይ ጎዳ አማኒዛ አሳ ዋቋናስ ጨቄቲሼ ቄሴታ ሃላቃኮ ቢደስ። ² ጎዳ ኦጌ ካሊዛይታ ማጫሳታኔ አዳታ ደሚ ቃቺዲ ዩሩሳላሜ ኤኪ ያናስ ደማስቆ ጌቴቲዛሶን ዲዛ አይሁዳታ ዋሳ ኬላስ ባብዳቤ ፃፋና ማላ ቄሴታ ሃላቃ ዋሲደስ።

³ ደማስቆ ጋካና ማቲሺን ቆፖንታ ሳሎፔ ፖጋይ ኢዛ ዩሾን ፖልዑ ጌደስ። ⁴ ኢዚካ ሄራካ ቢታ ቦላ ኩንዲዲ ሳሎፔ “ሳዉሌ፣ ሳዉሌ፣ ታና አዛስ ጎዳይ?” ጌዛ ቃላ ሲይደስ።

⁵ ሳዉሌይካ “ጎደ! ኔ ኦኔ?” ጌደስ። ኢዚካ ኢዛስ “ታኔ ኔ ጎዳሊዛ ዩሱሳኮ!” *† ⁶ ኔ ሃዒ ዳንዳዳ ጌዴ ካታማ ጌላ፤ ኔ ኦላናስ ቤሲዛዝ ኔስ ታ ዮታና” ጌደስ።

⁷ ሳዉሌራ ኢሲፌ ቢዛ አሳቲ ቃላ ጌሪስ ሲሳፌ አቲን ኦናካ ቤዮንታ ጊሽ ባ ዱና ኦይኪ ኤቂዳ። ⁸ ሳዉሌይ ባ ኩንዲዳሶፔ ዳንዲዲ አይፌ ዶዬ ፃሊዛ ዋዴ አይኮካ ደማናስ ዳንዳይቤና። ሄሳ ጊሽ ኢዛራ ዲዛ አሳቲ ኢዛ ኩሼ ኦይኪዲ ካሌሊ ኤኪዲ ደማስቆ ኤፊዳ። ⁹ ሄዡ ጋላስ ጋካናስ ቆቂዲኔ ካሕ ሃሌ ቤይቤና።

¹⁰ ደማስቆን ኢሲ ሃናኒያ ጌቴቲዛ አማኒዛደይ ደስ። ኢዛስ ጎዳይ አጁታን “ሃናኒያ” ጌዲ ፃይጌደስ፤ ኢዚካ “ዩ ጎደ!” ጌደስ።

¹¹ ጎዳይካ ኢዛ “ዳንዳ! ሱሬ ጌቴቲዛ ኦጌይራ ዩሁዳ ጌቴቲዛሶ ባ። ሄን ሳዉሌ ጌቴቲዛ ኢሲ ፃርሴሴ አሲ ዋሲሼ ደስ፤ ኔ ኢዛ ኮያ ደማ። ¹² ጋሶይካ ሃናኒያ ጌቴቲዛይሲ ሳዉሌይ ዲዛሶ ዩዲ ኢዚ ፃላና ማላ ኢዛ ቦላ ባ ኩሼ ዋሊሺን አጁታን ቤዩደስ።”

¹³ ሃናኒያይካ ዛሪዲ “ጎደ! ሃይሳደይ ዩሩሳላሜን ዲዛ ጌሻታ ቦላ አይ ማላ ኢታ ሜቶ ጋሊዳኮኔ ታ ዳሮ አሳፔ ሲያዲስ።

* 9:5 ኢሲ ኢሲ ጌሻ ማፃፋታ ቢርሼላይ “ቃራ ማሻ ቦላ ኔ ኤቂኮ ቆሄታና” ጌሻን ሃራይቲ ቃስ “ጫዲዛ ቢራታራ ኔ ኤቂቲኮ ኔስ ሃ ዳራና” ጌቲስ። † 9:5 ሳዉሊ ኮኮርዲኔ ያሻቲላን ማላለቲዲ “ጎደ! ታ ኔስ አይ ኦላና ማላ ደሳይ?” ጌደስ ጌዛ ቆፋ ጉጃቲስ። ሃይሳካ ሸምፖ 22:10 ኔ 26:14 ቦላ ፃፊቲ ቤቴስ።

14 እዚ ሃ ዪዳይ ኔ ሱንላ ዪይገዛይታ ወርሲ ቃቻናሰ ቄሴታ ሃላቃታፔ ጎዳቴላ ኤኪዲኮ” ገዴሰ።

15 ጎዳይካ እዛሰ “ኔ ባ! ሃይሲ አዴዚ አይዛቤታ ሲንላኒኔ ካዎታ ሲንላን ሄሳሉካ ኢሰራዔሌ ዳሬ ሲንላን ታ ሱንላ ቶካና ማላ እዚ ታሰ ደሬቲዳይሳ። 16 እዚ ታ ሱንላ ገሽ አይ ማላ ዋዬ ቤያናኮ ታ እዛ ቤሳና” ገዴሰ።

17 ሃናኒያይ ቢዲ እዛሰ ዮቴቲዳሶ ጌሊዴሰ። ሳዉሌ ቦላ ባ ኩሼ ዋሊዲ “ታ እሻ ሳዉሌ ኔ ሃ ዪሸን ኔሰ ኦጌ ቦላ ቆንጨዳ ጎዳ ዩሱሲ ኔ አይፌይ ያላና ማላኔ ኔኒ ያሎ አያናን ኩማና ማላ ታና ኔኮ ከቲዴሰ” ገዴሰ። 18 ሄራካ ሳዉሌ አይፌፔ ፖቆ ማላይ ፖቂቲ ዋዲን እዚ ያላና ዳንዳዪዴሰኔ ዴንዲዲ ዓማቂቲዴሰ። 19 ካሊካ ሚዲ ሚኒዴሰ። ኡንዴና ዋዴ አማኒዛይታራ ዳማሰቆን ጋምዒዴሰ።

ሳዉሌይ ዳማሰቆንኒ ዩሩሳላሜን ታማርሲዴሰ

20 ሄራካ ዩሱሲ ያሳ ና ገዲዳይሳ አይሁዳታ ዋሳ ከፋታን ታማርሶ ኦይኪዴሰ።

21 ሲዪዳ አሳይ ወሪ “ሃይሲ ዩሩሳላሜን ሃ ሱንላ ዪይገዛይታ ዳዩሲዛ አዴዛ ገዴኔ? ቃሴ እዚ ሃ ዪዳይ ሄ አሳታ ቃቺ ኤኪ ቄሴታ ሃላቃታኮ ኤፋናሰ ዴኔ?” ገሽ ማላሌቲዳ።

22 ሳዉሌይ ካሴፔ ሚኒ ሚኒ ቢዴሰ። ዳማሰቆን ዲዛ አይሁዳታሰ ዩሱሲ እዚ ያሲ ከቲዳዴ ገዲዳይሳ አማንሊሼ አሳ ዴና ኦይሊዴሰ።

23 ዳር ጋላሳታፔ ጉዬ አይሁዳቲ ሳዉሌ ዋዳናሰ ዴላቲዳ።

* 24 እዚካ ኢሰታ ቆፋ ኤሪዴሰ። ኢሰቲካ እዛ ዋዳናሰ ካታማ ጌልሊዛ ኦጌን ጋላሲኔ ቃማ ናገዳ። 25 አማኒዛይቲ ገዲኮ እዛ ገደላ ካታማ ዩሸን ዲዛ ማሰኮቴዛራ ከሼን ዴጌ ዋሊዳ።

26 ሳዉሌይ ዩሩሳላሜ ዪዲ አማኒዛይታራ ዋላኬታና ኮዪን እዚ ቱሙ አማኒዛዴ ገዲዳይሳ ኢሰቲ አማኔቶንታ ገሽ እዛሰ ባቢዳ። 27 ገደ አቲን ባርናባሲ እዛ ሃዋሬታኮ ኤፊን ሳዉሌይ እዚ ዳማሰቆ ኦጌ ቦላ ጎዳ ዋሰቲ ቤዪዳኮ፣ ጎዳይካ እዛሰ አይ ዮቴዳኮኔ ቃሴካ ዳማሰቆን ዲሼ እዚ አይ ማላ ዓላቴላራ ዩሱሳ ሱንላን ሳባኪዳኮ ኢሰታሰ ዮቴዴሰ።

28 ሄሳ ገሽ ሳዉሌይ ኢሰታራ ዲዴሰ። ዩሩሳላሜን ዩዪ ዩዪ አሰ ባቦንታ ጎዳ ሱንላን ታማርሲዴሰ። 29 ገሪኬ ዴሬፔ ዪዳ አይሁዳታራ ሃሳይሼ ፓላሜቲዴሰ፤ ገደ አቲን አሳይካ

* 9:23 2ቆር 11:32-33

ኢዛ ዋዳናሰ ኮዪዳሰ። ³⁰ አማኒዛይቲ ሄሳ ኤሪዲ ዱጌ ቂሳሪያ ጌቲቲዛሶ ዋሊዲ ፃርሴሴ ዬዲዲ።

³¹ ሄሳ ዋዳ ዩሁዳኒኔ ጋለላን፣ ሳማሪያንካ ዲዛ አማኒዛይቲ ሳርን ዲዲ ካሴፔ ሚኒዲ። ቃሴካ ያሳ ያሻቲላን ሲሜሬቲሼ ዪሎ አያናን ሚኔቲዳኔ ካሴፔ ቆዳን ዳሪ ዳሪ ቢዲ።

ኤኒያኔ ዶርቃ

³² ጴፀርሲ ዳሬፔ ዩዪሼ ሊዳ ካታማን ዲዛ አማኒዛይታ ቤያናሰ ዱጌ ዋዲዳሰ። ³³ ሄን ኤኒያ ጌቲቲዛይሳ ኦሱፑን ላይላ ሂፃን ቃሼቲ ኡቲዳ ኢሲ ጉንዳ አሰ ዳሚዳሰ። ³⁴ ጴፀርሲካ “ሃይሶ ኤኒያ! ዩሱስ ከርሰቶሲ ኔና ፓላና፤ ዴንዳ ኔ ሂፃ ዴንላ!” ጌዴሰ። ኤኒያይ ሄሪካ ፑሱኩ ጌ ዴንዲዳሰ። ³⁵ ሊዳኒኔ ሳርናን ዲዛ አሳይ ወሪ ኢዛ ቤዪዲ ጎዳን አማኒዳሰ።

³⁶ ኢዮጴ ጌቲቲዛሶን ፃቢታ ጌቲቲዛ ኢሲ አማኒዛራ ዳወሰ። ኢዚ ሱንላ ቢርሼሊ ጌሪኬ ቃላራ “ዶርቃ” ጌቲቲሰ። ኢዛ ኡባ ዋዳ ሎዖ ኦሶ ሚና ኦላሼኔ ማንቆታ ማዳሼ ዳወሰ። † ³⁷ ሄ ዋዳ ኢዛ ሃርጋዳ ሃይቂን አሳይ አሃ ሜጪ ፑዴ ፖቂን ኬሲ ዋሊዳሰ። ³⁸ ሊዳይ ኢዮጴሰ ማታ ጌዲዳ ጊሽ አማኒዛይቲ ጴፀርሲ ሊዳን ዲዛይሳ ሲይዲ ናሞዑ አሳታ ከቲዲ “ኤሌ ሃ ያርኪ!” ጌ ዋሲዲ።

³⁹ ጴፀርሲካ ዴንዲዲ ከቲቲዳ አሳታራ ጋኪዳ ዋዳ ኢዛ ፑዴ ሄ ፖቂ ቦላ ኬሲዲ። አምዔቲካ ወሪ ኢዛ ዩዪ አጁ ኤቂዲ ዶርቃይ ፓፃ ዳሼ ኢሰታራ ኦሊዳ ቃሚሴታኔ ማይዖታ ቤሲሼ ዩኪዳ።

⁴⁰ ጴፀርሲካ አሳ ወርሲ ከፍሌዛፔ ኬሲዲ ጉልባቲ ዋሲዳሰ። አሃኮ ሲሚዲ “ሃኔ ፃቢታ ዴንዳ!” ጌዴሰ። ኢዛካ ባ አይፌ ዶያዳ ፃላዱሰ። ጴፀርሳካ ቤያዳ ዴንዳ ኡታዱሰ። ⁴¹ ኢዚካ ኢዚ ኩሼ ኦይኪ ዴንሳዲዳሰ። አማኒዛይታኔ አምዔታ ፃይጊዲ ኢዞ ኢሰታሰ ፓሊዲ ኢሚዳሰ። ⁴² ሄ ሃኖይ ኩሜላ ኢዮጴን ኤሬቲዳሲኔ ዳር አሳይካ ጎዳ አማኒዳሰ። ⁴³ ጴፀርሲካ ኢሲ ሲሞና ጌቲቲዛ ጋልባ ቃጪዛዳራ ኢዮጴን ዳር ዋዳ ዴዒዳሰ።

10

ቆርናሎሲ ጴፀርሳ ፃይጊሲዳሰ

¹ ቂሳሪያ ጌቲቲዛ ዳሬን “ፃላኔ ዋታዳራታ” ኢሲ ቡቲ ጊዶን ማቶ ሃላቃ ጊዲዳ ኢሲ ቆርናሎሳ ጌቲቲዛይሲ ዴሰ። ² ኢዚካ ባ

† 9:36 ዶርቃ ሄሳ ጉሲ ጌሪኬ ቃላራ “ጌኔሳ ጉሳ”

ኬላ አሳ ኩሜላራ አያና ሃኖን ሚኖኔ ያሴ ባቢዛዴ፤ ማንቆታሰካ ዳሮ ሙጡዋታ አሚዛዴኔ ዳሮ ዋዴ ያሴ ዋሲዛ አሳ። ³ ኢሲ ጋላስ ጋላሳፌ ኡዱፋን ሳቲ ቦላ ያሳ ኪታንቻይ ኢዛስ አጁታን ቤቲዲ ኢዛኮ ዪዲ “ቆርኖሎሳ” ጊ ዪይጊሺን ቆንጩን ቤዪዴስ።

⁴ ቆርኖሎሲካ ዳጋማራ ቲሺ ሂስቲ ያሊሺ “ጎዶ ሃይሲ አዜ?” ጊዴስ። ኪታንቻይካ ዛሪዲ “ኔ ዋሳይኔ ኔ ሙጡዋታይ ቆፊታናስ ፑዴ ያሳ ሲንሐ ጋኪዴስ። ⁵ ኔ ሃዒ አስ ኢዮጴ ዬዳዳ ጴፅሮሳ ጌቲቲዛ ሲሞና ዪይጊሳ። ⁶ ኢዚካ አባ ማታን ዲዛ ጋልባ ቃጪዛ ሲሞና ሶን ኢማላቲሐ ዴስ” ጊዴስ።

⁷ ቆርኖሎሳ ሃሳይሲዳ ኪታንቻይ ኢዛፔ ሻኬቲዲ ቢዳፔ ጉዬ ባ አሽካራታፔ ናምዓታ ቃሴ አያና ዮዖስ ሚኖኔ ኢዛስ ዳሮ አማኔቲዛ ዋታዳራታፔ ኢሳ ዪይጊሲዲ፤ ⁸ ኢዚ ቤዪዳይሳ ዉርሲ ኢስታስ ዮቲዲ ኢዮጴ ኪቲዴስ።

ጴፅሮሲ ቤዪዳ አጁታ

⁹ ኪቲቲዳ አሳቲ ዋንቴላ ጋላስ ጌዴ ካታማይኮ ማቲሺን ጴፅሮሲ ኡሱፑን ሳቲ ቦላ ዋሳና ፑዴ ፖቄ ቦላ ኬዚዴስ። ¹⁰⁻¹¹ ሄሳ ዋዴ ኢዚ ጋፊዳ ጊሽ ቁማይ ቡሮ ካዲሺን ጴስኮ ማላ ሊጲጲ ሂስቲን አጁታራ ሳሎይ ዶዬቲን ኢሲ ጌታ ፃዳቲዳ ማይዖ ማላይ ኦይዱ ባጋራ ኦይኬቲዲ ዳጌ ቢታን ዋዲሺን ቤዪዴስ። ¹² ሄ ማይዖዛ ቦላ ኦይዱ ቶሆይ ዲዛ ዱማ ዱማ ዶዓቲ ቢታራ ጎሼቲዛ ሜዴቴላቲኔ ሳሎ ቦላ ፒራጲዛ ካፎቲ ዴቲስ። ¹³ ሄሳ ዋዴ “ጴፅሮሳ ዴንዳ ሃይታ ሹካዳ ማ” ጊዛ ቃላይ ኢዛስ ሲዬቲዴስ።

¹⁴ ጴፅሮሲ ቃሴ “ጎዶ ሃይሲ ሃኔና! ጌሽ ጊዶንታይሳ ዋይኮ ቱና ሚሻ ታ ሙሌራካ ማ ኤሪኬ” ጊዴስ።

¹⁵ ሄ ካሴ ቃላይ ቃሴካ ናምዓንሐ ኢዛኮ ዪዲ “ያሲ ጌሺዳይሳ ኔ ቱና ማላ ቆዶፓ” ጊዴስ። ¹⁶ ሄሲካ ሄሹቶ ሺሬቲ ሺሬቲ ኢዛኮ ዪዳፔ ጉዬ ማይዖ ሚሳቲዛይሲ ሄራካ ፑዴ ሳሎ ቢዴስ።

¹⁷ ጴፅሮሲካ ባ ቤዪዳ አጁታዛ ቢርሼላ ኤራናስ ዳሮ ሜቶቲዲ ኬሂ ቆፎ ቦላ ዲሺን ቆርኖሎሲ ኪቲዳ አሳቲ ሲሞና ኬሌ ኮዪሺ ዴሚዲ ፔንጌን ኤቂዳ። ¹⁸ ቃላ ቶቄ ሂስቲዲ “ጴፅሮሳ ጌቲቲዛ ሲሞኒ ዲዛሶይ ሃይሳን አዋኔ?” ጊ ኦይቺዳ።

¹⁹⁻²⁰ ጴፅሮሲ ባ ቤዪዳይሳ ኬሂ ቆፒሺን ያሎ አያናይ ኢዛ “ሄኮ ሄሹ አሳቲ ኔና ኮዬቲስ። ዴንዳ! ዳጌ ዋዳዳ ኢስታ ዬዲዳይ ታና ጊዲዳ ጊሽ ሲዴይ ባይንዳ ኢስታራ ባ” ጊዴስ።

21 ጴጥሮስና ዳዊድ ወደ “ሄኮ አንቲ ኮዩዛዴይ ታናኮ! አንቲ ዩዳይ ኣዛሴ?” ገደሰ። 22 ኢስቲካ ኢዛሰ “ኲ ማቶ ሃላቃ ቆርኖሎሳ ማታፔ ዩዶስ። ኢዚካ ፆሳሰ ባቢዛ ዊሎ ኣሳኔ ኣይሁዳ ኣሳ ኡባ ማታን ዳር ቦንቹቲዳ ኣሳ። ኔካ ኢዛ ኬፍ ባና ማላኔ ኔ ጊዛይሳ ኢዚ ሲያና ማላ ጌሻ ኪታንቻይ ኢዛሰ ኮቲዴስ” ገደ። 23 ጴጥሮስካ ኣሳታ ባ ዲዛሶን ሞኪ ኤኪዲ ኣይሲዴስ።

ጴጥሮስ ቆርኖሎሳ ኬፋን

ጴጥሮስካ ዋንቲፋ ጋላስ ዴንዲዲ ኢስታራ ቢዴስ። ኢዮጴፌ ዩዳ ኢሲ ኢሲ ኣማኒዛ ኣሳቲ ኢዛራ ኢሲፌ ቢዴ። 24 ቆርኖሎሳካ ባ ዳቦታኔ ማታ ላጌታ ባ ሶን ሺሺዲ ናን ቦላ ዲሺን ኢዚ ናሞዓንፋ ጋላስ ቀሳሪያ ጋኪዴስ። 25 ጴጥሮስካ ጌዴ ቆርኖሎሳ ኬፍ ጌሊን ቆርኖሎሲ ኢዛ ሞኪ ኤኪዲ ኢዛ ቶሆ ቦላ ሆኪ ጎይኒዴስ። 26 ገደ ኣቲን ጴጥሮስ “ታካ ኔ ማላ ኣሳኮ! ዴንዳ” ገዲ ዴንፊዴስ።

27 ጴጥሮስካ ኢዛ ሃሳይሲሼ ኢዛራ ሶ ጌሊሺን ዳር ዴሬይ ሺቂ ኡቲዳይሳ ቤዩዴስ። 28 ኢዚካ ኢስታስ “ኣይሁዳ ኣሲ ሃራ ዴሬ ኣሳራ ጋጎንታ ማላ ዋይኮ ሃራ ዴሬ ኣሰ ገዲዲይታ ማታ ሺቆንታ ማላ ኑ ዋጋይ ዲጊዛይሳ አንቲ ኤሬታ። ገደ ኣቲን ታ ኦናካ ቱና ዋይኮ ኢዚ ጌሽ ዴና ጎንታ ማላ ያሲ ታስ ቆንጨሲዴስ። 29 ሄሳ ጊሽ ታ ዪይጌቲዳ ዋዴ ሄኮ ሲቶንታ ያዲስ። ሂሰቲን አንቲ ታና ኣዛሰ ዪይጌዳኮኔ ኤራና ኮያይስ” ገደስ።

30 ቆርኖሎሳካ “ኦይዲ ጋላሳፌ ካሴ ሊኬ ሂኒ ዋዴ ጋላሳፌ ኡዲፋን ሳቲን ታኒ ታ ሶን ዋሲሺን ቆፖንታ ቦፋ ማይያ ማይዒዳ ኣሲ ዩዲ ታ ሲንፋን ኤቂዲ 31 ታና ‘ቆርኖሎሳ! ኔ ዋሳይ ሲዩቲዴስ፤ ኔ ማንቆታስ ኢሚዛ ሙፁዋታይ ያሳ ሲንፊ ጋኪዴስ። 32 ሄሳ ጊሽ ኢዮጴ ካታማ ኣሰ ኪታዳ ጴጥሮሳ ጌቲቲዛ ሲሞና ኤሂሳ። ኢዚ ኣባ ኣቻን ጋልባ ቃጨዛ ሲሞና ኬፋን ኢማፋቴል ዴስ” ገደስ። 33 ታካ ሄራካ ኔኮ ኣሰ ኪታዲስ። ኔ ዩሳይካ ሎያ። ሂሰቲኮ ጎዳይ ኔና ኣዛዚዳይሳ ኔ ኑስ ኮቲኮ ያሲ ኮቲዳይሳ ኔፔ ሲያናስ ኑ ዉሪካ ሃይሳን ያሳ ሲንፋን ዶስ” ገደስ።

34 ጴጥሮስካ “ያሲ ኦናካ ሻኪ ማዶንታይሳ ታ ቱማፔ ኤራዲስ። * 35 ገደ ኣቲን ያሳሰ ባቢዛይታኔ ዊሎ ኡፊዛይታ ዉርሲ ኦና ባጋፌ ገዲንካ ኢዚ ኤኬስ። 36 ያሲ ኡባስ ጎዳ ገዲዳ ዩሱስ ኪርስቶሳ ባጋራ ኢሰራዔሌ ኣሳስ ኪቲዳ ሳርቲፋ ሚሺራቾ ኪታይ ሃይሳ። 37 ኮሃኒሲ ዊንቃታ ጊሽ ሳባኪዳፔ ጉዬን

* 10:34 ዛሬ 10:17

ጋለላፔ ደሚዲ ኩሜላ የሁዳን ሃኒዳይሳ አንቲ ኤሬታ። 38 ያሲ ናዚሬቴ ዬሱሳ ዒሎ አያናኒኔ ዋልቃን ቲዩዴሰ። ኢዚካ ያሲ ኢዛራ ዲዛ ጊሽ ባ ጋኪዳሶን ኡባን ሎዎ ኦሴሼ ፃላዔ ጎዳቴላ ጊዶን ዲዛይታ ወርሲ ፓሊዴሰ።

39 “ኢዚ አይሁዳታ ዴሬኒኔ ዬሩሳሌም ካታማን ኦሴዳይሳ ኡባሰ ኑ ማርካ። ቃሴካ አሳይ ኢዛ ሚላ ቦላ ካቂ ዋዲዴሰ። 40 ጊዶ አቲን ያሲ ኢዛ ሄቫንሶ ጋላሰ ሄይቆፔ ዴንሊዴሰኒኔ አሲ ኢዛ ቤያና ማላ ኦሴዴሰ። 41 ኢዚ ቆንጪዳይ አሳ ኡባሰ ጊዶንታ ሃይቆፔ ዴንዲን ኢዛራ ሚዳይታሲኒ ኢዛራ ኡዩዳይታሰ ያሲ ኮይሮ ዶሪዳ ኑሰ ኢዛ ማርካታሳ። 42 ኢዚ ኑ ዴሬዛሰ ሳባካና ማላኔ ሃይቂዳይታ ቦላኔ ፓዎ ዲዛይታ ቦላ ፒርዳናሰ ያሲ ሹሚዳይ ኢዛ ጊዲዳይሳ ኑ ማርካታና ማላ ኑና አዛዚዴሰ። 43 ኢዛ አማኒዳዴይ ወሪ ኢዛ ሱንላን ናጋራ ማሬቲዲ ጌያናይሳ ናቤቲ ኢዛሰ ማርካቴቲሰ” ጊ ዮቶ ደሚዴሰ።

44 ጴፅሮሲ ሄሳ ሃሳዩሺን ቃላ ሲዩዛይታ ኡባ ቦላ ዒሎ አያናይ ዋዲዴሰ። 45 ቃዓሬቲዳይታ ባጋፌ ጴፅሮሳራ ዩዳ አማኒዛይቲ ዒሎ አያና ኢሞቴሊ አይዛቤታ ቦላ ዋዲሺን ቤዩዲ ማላሌቲዳ። 46 ሄሲካ ኢሰቲ ዲማ ቃላን ሃሳዩሺኒኔ ያሳ ጋላቲሺን ሲዩዳ ጊሻሳ። ሄ ዋዴ ጴፅሮሲ።

47 “ሃይቲ አሳቲ ኑ ማላ ዒሎ አያና ኤኪዳ ጊሽ ኢሰቲ ሃላን ፃማቂቶንታ ማላ ኢሰታ ዲጋናይ ኦኔ?” ጊዴሰ። 48 ሄሳ ጊሽ ዬሱሰ ኪርሰቶሳ ሱንላን ፃማቂታና ማላ አዛዚዴሰ። ሄሳፌ ጉዬ ጴፅሮሲ ጉላ ዋዴ ኢሰታራ ዳና ማላ ዋሲዳ።

11

ጴፅሮሲ አይዛቤታ ኬሌ አይሲ ጌሊዳኮኔ ዋላሲዳ

1 ሃዋሬቲኔ የሁዳን ዲዛ አማኒዛይቲ አይዛቤቲ ያሳ ቃላ ኤኪዳይሳ ሲዩዳ። 2 ሄሳ ጊሽ ጴፅሮሲ ፑዴ ዬሩሳሌም ኬዚን ቃዓሬቲዳ አይሁዳፔ አማኒዛይቲ ጴፅሮሳ። 3 “ኔ ቃዓሬቶንታ አሳታ ኬሌ ጌላዳ ኢሰታራ ካሐ ማዳሳ” ጊዲ ዋላሲዳ።

4 ጴፅሮሲ ቃሴ ኢሰታሰ ጌላና ማላ ማራራ ሂዘጊ ዮቲዴሰ። 5 “ታኒ ኢዮጴ ካታማን ዋሲሺን ዲሲኮ ማላ ታና ሊጲጲ ሂሰቲዲ አጁታን ጊታ ማይዎ ሚሳቲዛ ሚሺ ኦይዱ ባጋራ ኦይኬቲዲ ሳሎፔ ታ ዲዛሰ ዋዲሺን ቤያዲሰ። 6 ታ ቲሺ ሂሰታ ያሊሺን ኦይዱ ቶሆራ ዲዛ ሜሄታ፣ ዋራ ደዓታ፣ ቢታ ቦላ ጎሼቲዛ

ሜዴቴላታኔ ሳሎ ቦላ ፒራዲዛ ካፎታ ቤያዲስ። ⁷ ሄራካ ታና ‘ጴፅሮሳ ዴንዳ! ሃይሳ ሹካዳ ማ’ ጊዛ ቃላ ሲያዲስ።

⁸ “ታካ ጎዶ ሄሲ ሃኔና፤ ታኒ ቱና ዋይኮ ጌሽ ጊዶንታይሳ ሙሌካ ታ ዱናኮ ሽሻ ኤሪኬ’ ጋዲስ።

⁹ “ሄ ካሴ ቃላይ ቃሴካ ‘ዖሲ ጌሺዳይሳ ኔ ቱኒሶፓ’ ጊዲ ሳሎፔ ታስ ዮቲዴስ። ¹⁰ ሄሲካ ሄሹቶ ሸሬቲ ሸሬቲ ዮቲቲዳፔ ጉዬ ወሪካ ሲሚዲ ፑዴ ሳሎ ቢዴስ።

¹¹ “ቀሳሪያፔ ታኮ ኪቲቲዳ ሄሹ አሳቲ ሄራካ ሄ ሳቲይን ዪ ጋኪዲ ታ ዲዛ ኬላ ካሪን ኤቁዳ። ¹² ታ አይኔ ሲታንታ ኢስታራ ባና ማላ ዲሎ አያናይ ታስ ዮቲዴስ። ሄ ኡሱፑን አሻቲ ታናራ ኢሲፌ ቢዲ አዳዛ ኬሌ ጌልዶስ። ¹³ ኢዚካ ያሳ ኪታንቻይ ኢዛ ኬላን ኤቁዲ ኢዛስ ቤቲዳይሳኔ ‘ኢዮጴ ጌቲቲዛሶ አስ ዬዳዳ ጴፅሮሳ ጌቲቲዛ ሲሞና ያይጊሳ። ¹⁴ ኢዚ ዬዲ ኔና ኔሶ አሳ ወርሲ አሻና ቃላ ዮታና’ ጊዳይሳ ኑስ ዮቲዴስ።

¹⁵ “ታካ ባዳ ቡሮ ዮቶ ኦይኪሽን ኮይሮ ዲሎ አያናይ ካሴ ኑ ቦላ ዋዲይሳላ ኢስታ ቦላካ ዋዲዴስ። ¹⁶ ካሴ ጎዳይ ኑስ ዮቲሼ ‘ዮሃኒሲ ሃላን ፃማቂዴስ ሽን ኢንቴ ዲሎ አያናን ፃማቂታና’ ጊዳ ቃላይ ሄራካ ታስ ቆፌቲዴስ። * ¹⁷ ሄሳ ጊሽ ኑኒ ጎዳ ዬሱስ ኪርሰቶሳ አማኒሽን ኑስ ኢሚዳ ዲሎ አያና ዖሲ ኢስታስ ኢሚኮ ሂስቲን ያሳራ ኤቁታሪስ ታኒ ኦኔ?” ጊዴስ።

¹⁸ ኢስቲ ሄሳ ሲዬዳ ዋዴ ኢስታስ ጊዛዚ ቆዩን ጮቡ ጊ ሲሚዲ “ሃይሳ ማላ ጊዲኮ አይዛቤቲካ ሃ ኦራላ ዴዖኮ ያና ማላ ዖሲ አሳስ ማርቲላ ኢሚዴስ ጉሳ” ጊዲ ያሳ ጋላቲዳ።

አንዮኪያን ዲዛ ዋሳ ኬላዮ

¹⁹ ኢስቲፋኖሴ ቦላ ዴንዲዳ ጎዴቲላ ጋሶን ላሌቲዳ አማኒዛ አሳይ ቃላ አይሁዳታስ ፃላላ ዮቲሼ ፒንቄ፣ ቆጶርሴኔ አንዮኪያ ጌቲቲዛሶ ጋካናስ ካንሊ ቢዳ። * ²⁰ ቆጶርሴቴኔ ቃሬናፔ ዬዳ ኢሲ ኢሲ አሳቲ አንዮኪያ ቢዲ ጊሪኬታሲካ ጎዳ ዬሱሳ ሚሺራቾ ቃላ ዮቲዳ። ²¹ ጎዳ ማዶይካ ኢስታራ ዴስ፤ ቆዳን ኬሂ ዳሮ አሳይ አማኒዲ ጎዳኮ ሲሚዴስ።

²² ሄሳ ዋሬይካ ዬሩሳላሚን ዲዛ ዋሳ ኬላ አሳ ሃይላን ዋዲን ዋሳ ኬላያ ባርናባሳ አንዮኪያ ዬዳዴስ። ²³ ኢዚካ ሄ ቢ ጋኪዲ ዖሲ ባ ኦቶ ኪያቴላ ዴሪስ ኢሚዳይሳ ቤዬዲ ኡፋዬቲዴሲኔ አሳይ ወሪካ ኩሜላ ዋዝናፔ ጎዳ አማኖን ሚናና ማላ ዞሪዴስ።

* 11:16 ሃዋ 1:5 * 11:19 ሃዋ 8:1-4

24 ኢዚካ ዓሎ አያናኒኔ አማኖን ኩሚዳ ሎዎ አሳ። ዳር ዳሬይ ጎዳ አማኖን ጉጃቲዳሰ።

25 ሄሳፌ ካሊዲ ባርናባሲ ሳወሌ ኮያና ፃርሴሴ ቢዳሰ።

26 ኢዛ ዳሚዲ አንዮኪያ ኤኪ ዩዳሰ። ናምዓይካ ሄን ዲዛ ዋሳ ኬላ አሳራ ገዲዲ ላይላ ኩሜላ ዳር ዳሬ ታማርሲዳ። ሄን አንዮኪያን አማኒዛይቲ ኮይር “ኪርሳኔ” ጌቲቲ ያይጌቲዳ።

27 ሄ ዋዴ ኢሲ ኢሲ ናቤቲ ዩሩሳላሜፔ ዲጌ አንዮኪያ ዋዲዳ።

28 ኢስታ ገደፌ ኢሶይ አጋቦሳ ጌቲቲዛይሲ ዳንዲ ኤቂዲ ዓሎ አያናይ ኢዛ ቤሲን አላሜ ኡባን ጌታ ኮሻይ ዳንዳናይሳ ዮቲዳሰ። ሄሲካ ኦርሜ ካዎ ቃላዎደሳ ቁሳሬ ጌቲቲዛይሳ ካዎቲላ ዋዴ ፖሌቲዳሰ። * 29 አማኒዛይቲ ዉሪ ኢሶይ ኢሶይ ባ ዋልቃ ኬና ሚሼ ኬሴቲዲ ዩሁዳን ዲዛ አማኒዛ አሻታ ማዳናሰ ቃቺዳ።

30 ማዶ ሚሻ ኬሴቲዲ ባርናባሳኔ ሳወሌ ኩሼን ጨማታሰ ጋላና ማላ ዩዲዳ።

12

አማኒዛይታ ቦላ ጋኪዳ ጌታ ሜቶኔ ጎዴቲላ

1 ሄ ዋዴ ካዎ ሄርዶሲ ኢሲ ኢሲ አማኒዛ አሳ ጎዲ ጎዲ ሜቶሉዳሰ። 2 ዮሃናስ አሻ ያቆቤ ማሻን ዋዲሲዳሰ። 3 ኢዚካ ሄሳ ኦሉዳይ አይሁዳታ ኡፋይሲዳይሳ ቤዩዲ ጴፅርሳካ ኦይሉዳሰ። ሄሲካ ሃኒዳይ አይሁዳታሰ ኡኬላ ባዓሌ ጌቲቲዛ ባዓሌ ጋላሳ።

4 ጴፅርሳካ ቃሾ ኬሌ ጌልሲዳፔ ጉዩ ኦይዲ ኦይዲ ዋታዳራቲ ታራን ታራን ናጋና ማላ ጌጌቲዳ ዋታዳራታሰ አሚዳሰ። ኢዚ ሄሳላ ኦሉዳይ ፓዚጋ ባዓሌይ አዲዳ ማላ ኬሲዲ ዳሬይ ፒርዳና ማላ ሸሻናሳ። * 5 ሄሳ ጌሽ ጴፅርሳ ቃሾ ኬሌ ጌልሲዲ ናጌቲሰ። ጌዶ አቲን ዋሳ ኬላ አሳይ ኢዛሰ ኬሂ ሚኖ ዋሳ ዋሲዳሰ።

6 ሄርዶሲ ጴፅርሳ ዳሬዛ ሲንላ ሸሻና ቆፒ ኡቲ ዲሺን ሄ ቃማ ጌዶላ ናምዑ ሳንሳላታን ቃሼቲዲ ናምዑ ዋታዳራታ ጌዶን ኢቺዳሰ። ቃሾ ኬላ ናጌዛይቲ ኬላ ፔንጌ ቦላ ኤቂ ናጌሺን።

7 ጎዳ ኪታንቻይ ኤዚንጎታ ኢስታሰ ቤቲዳሰ። ኢስቲ ዲዛ ኪፊሌን ፖይይ ፖዒዳሰ። ኪታንቻዚካ ጴፅርሳ ሚሌ ቦቺ ቤጎሉዲ “ኤሌ ዳንዳ!” ጌዳሰ። ሄራካ ሳንሳላታይ ኢዛ ኩሼፔ ጋዴን ዋዲዳሰ።

8 ኪታንቻዚ ኢዛ “ኔ ማይዎ ማይዳ! ጫማካ አላ!” ጌን ጴፅርሲካ አዛዜቲዳ ማላ ኦሉዳሰ፤ ቃሴካ ኪታንቻይ “ኔ ጋቤ ማይዳ ታና ካላ” ጌዳሰ። 9 ጴፅርሲካ ቃሾ ኬላፌ ኢዛ

* 11:28 ሃዋ 21:10 * 12:4 ኬሳ 12:1-27

ካሊ ኬዚደሰ። ገደ አቲን ኢዛሰ አጉሞ ቤዪ ሚሳቲደሰ አቲን ኪታንቻዚ አሉዛይሲ ቱሙ ገዲዳይሳ ኤሪቤና። ¹⁰ ኮይሮ ዛቤታፔኔ ናሞዓንሉ ዛቤታፔ ኣጲዲ ጌዴ ካታማ ኬሲዛ ኦጌ ቦላ ዲዛ ቢራታ ፔንጋኮ ጋኪዳ። ፔንጌይካ ባርካ ዶዬቲ ዎጲደሰ። ኢስቲ ኬዚ ቢዳ። ኢስቲ ቄሪ ኦጌ ዲዛሮ ኣጲዳ ማላ ኪታንቻዚ ኢዛፔ ሻኬቲደሰ።

¹¹ ጳፅሮሳሰ ካሃይ ሲሚሺን “ኅዳይ ባ ኪታንቻ ከቲዲ ኢዛ ሄርዶሳ ኩሺፔኔ ኣይሁዳቲ ታ ቦላ ቆፒዳ ኡባፌ ታና ኬሲዳይሳ ታ ሃዒ ቱማፔ ኤራዲሰ” ገደሰ።

¹² ሄሳ ኣኬኪ ኤሪዳፔ ጉዬ ዳሮ ኣሳይ ኢሲ ቦላ ሸቀቲዲ ዎሲዛ ማርቆሳ ጌቲቲዛ ዮሃኒሳ ኣዮ ማራሚሶ ቢደሰ። ¹³ ኢዚ ሄ ቢዲ ካሬ ፔንጌ ቆፂን ኢሲ ሮዶ ጌቲቲዛ ጋራዴያ ካሬ ኦኒ ቆፂዛኮኔ ኤራናሰ ካሬ ማታ ባደሰ። ¹⁴ ቃላይ ጳፅሮሳይሳ ገዲዳይሳ ኤራዳ ኬሃ ኡፋዬቲዳ ጊሽ ካሬ ዶዮንታ ዎላን ጉዬ ሲማዳ “ጳፅሮሲ ካሬን ፔንጌ ቦላ ኤቂደሰ” ጋደሰ።

¹⁵ ኣሳይካ ኢዞ “ሃኔ ጎያይ!” ገዳ። ኢዛ ቃሰ ዛራ ዛራ ኢስታሰ ዮቲን “ሂስቲኮ ሄሲ ኢዛ ናጊዛ ኪታንቻ ገደንታ ኣጌና” ገዳ።

¹⁶ ጳፅሮሲ ቃሰ ፔንጌ ቆላ ጉጂደሰ። ኢስቲካ ፔንጋ ዶይዲ ኢዛ ቤዪዳ ማላ ማላሌቲዳ። ¹⁷ ኢዚካ ኢስቲ ጮው ጋና ማላ ባ ኩሺን ማላቲ ቤሲዲ ጎዳይ ኢዛ ቃሾሶፔ ዎስቲ ኬሲዳኮኔ ሎዔሉ ዮቲደሰ። “ሃይሳ ዉርሲ ያቆቤሰኔ ሃንኮ ኣማኒዛይታሰ ዮቲቱ” ገደሰ። ሄሳፌካ ጌዴ ሃራሶ ቢደሰ።

¹⁸ ዎንቲላ ጋላሰ ዎንታራ ዎታዳራቲ “ጳፅሮሲ ዋኒዳ?” ጊሽ ባ ገደን ቡልዓኬቲዳ። ¹⁹ ሄርዶሲ ጳፅሮሳ ኣሰ ዬዲ ኮይሲዲ ኢዚ ጳዪዳ ጊሽ ናጊዛይታ ሎዔሉ ኦይቺዳፔ ጉዬ ኢስታ ዎጳና ማላ ኣዛዚደሰ። ሄሳፌ ጉዬ ሄርዶሲ ዩሁዳፔ ዲጌ ቂሳሪያ ዎጲዲ ሄን ኡቲደሰ።

ሄርዶሳ ሃይቆ

²⁰ ሄርዶሲካ ዊሮሴ ኣሳራኔ ሲዶና ኣሳራ ኦሻ። ሄ ዴሬ ኣሳይ ካላ ዴሚዛይ ሄርዶሳ ዴሬፔ ገዲዳ ጊሽ ሄ ዴሬ ካዎ ያሊዛዴ ቢላሰዶሳፔ ማዶ ቃላ ዴሚዳ ማላ ኢሲ ቦላ ገዲዲ ሄርዶሳራ ማቃይንላናሰ ኦይቺዳ።

²¹ ጊጋና ባራቲዳ ጋላሰ ሄርዶሲ ካዎቲላ ማይዎ ማይዒዲ ካዎቲላ ኣልጋን ኡቲዲ ዴራሰ ሃሳዪደሰ። ²² ዴሬዚካ “ሃይሲ ዶሳ ቃላፔ ኣቲን ኣሳ ቃላ ዴና!” ጊ ዋሲደሰ። ²³ ሄርዶሲካ ዶሳሰ ቦንቾ ኢሞንታ ኣጊዳ ጊሽ ጎዳ ኪታንቻይ ሄራካ ሄርዶሳ ሾጪ ዬጊን ጉፁኒ ሃይቂደሰ።

24 ያሳ ቃላይ ገዲሶ ዲጪዲ አኪ አኪ ቢዴስ። 25 ባርናባሲኔ ሳወሌይ ባ ኤኪ ቢዴ ኪታ ፖሊዲ ዩሩሳላሚ ሲሚዲ ማርቆሳ ጌቲቲዛ ዮሃንሳካ ባናራ ኤኪ ሲሚዲ።

13

ባርናባሲኔ ሳወሌይ ከቲቲዳ

1 አንጾኪያን ዲዛ ዋሳ ከፋን ናቤቲኔ አስታማሪቲ ዴቲስ። ሄይቲካ ባርናባሲኔ ኔጌሬ ጌቲቲዛ ሲሞናሩ፤ ቃሬና ዴሬ አስ ሉቁዮሳሩ፤ ሄርደሳራ ኢሲፌ ዲጪዲ ሚናሄራኔ ሳወሌራ ወሪ ኢሲፌ ዴቲስ። * 2 ሄይቲ ወሪ ጎዳስ ጎይኒሼኔ ያሚሼ ዲሺን ዪሎ አያናይ “ባርናባሲኔ ሳወሌ ታ ኢስታ ዪይጊዳ ኦሶስ ታስ ሻኪ ኬሲቲ” ጊዴስ። 3 ኢስቲካ ያሚ ዋሲዲ ባ ኩሼ ኢስታ ቦላ ዋሊዳፔ ጉዬ ሞይዚዳ።

ባርናባሲኔ ሳወሌይ ቆጶሮሴ ጌቲቲዛሶን

4 ባርናባሲኔ ሳወሌይ ዪሎ አያና ኪታን ዲጌ ሴላወቂያ ዋዲዳ፤ ሄፔካ ማርካቤን ጌሊዲ ቆጶሮሴ ቢዴ። 5 ሳልሚና ጌቲቲዛሶ ጋኪዲ አይሁዳታ ዋሳ ከፋታን ያሳ ቃላ ሳባኪዳ፤ ማርቆሳ ጌቲቲዛ ዮሃንሲካ ኢስታራ ቢዲ ኢስታ ማዲዴስ።

6 አባ ጊዶን ዲዛ ቢታ ቆጶሮሴ ጌቲቲዛ ዴሬዮ ሃ ጋፃፔ ሄ ጋፃ ጋካናስ ካንሉ ከዚዲ ጳፋ ጌቲቲዛሶ ጋኪሺን ኢሲ አይሁዳ አሳ ሽን ማርኔ ዋርዶ ናቤ ባር-ዬሱሳ ጌቲቲዛ አስ ዴሚዳ። 7 ኢዚካ ኢሲ ሳርጎሳ ጳወሎሳ ጌቲቲዛ ዋዝናማ ዴሬ አይሲዛይሳራ ኢሲፌ ዴስ። ሃ ዴሬ አይሲዛ አዴዚ ያሳ ቃላ ሲያና ኮይዲ ባርናባሲኔ ሳወሌ ዪይጊሲዴስ። 8 ማርዚ ኤሊማሲ ባ ሱንሳ ቢርሼላ ማላ ዴሬ አይሲዛይሲ አማኖንታ ማላ ቋጶናስ ኮይዲ ኢስታራ ኤቁቲዴስ። 9 ጳወሎሳ ጌቲቲዳ ሳወሌይ ዪሎ አያናይ ኢዛን ኩሚን ማርዛ ቲሺ ሂስቲ ዪሊዲ፤ 10 “ኔዮ ዪሎቴላ ኡባስ ሞርኬዘ! ጌኔይኔ ኢታቴሉ ኔናን ኩሚዳይሶ ሃይሶ ዳቡሎሳ ናወ! ጎዳ ሱሬ ኦጌ ጌላሴላፌ ሽምፒኪ? 11 ሄኮ ሃዒ ጎዳ ኩሼይ ኔ ቦላ ዴስ። ኔ ቆቃና፤ ሃኒፌ ጉዬ አዋ አርሼ ፖፖ ኢሲኖካ ቤያካ” ጊዴስ።

ሄራካ ሻሩማይኔ ቋማይ ኢዛ ቦላ ዋዲዴስ። ኩሼ ኦይኪ ባና ካሌላናዴ ኮሺ ያኔ ሃኔ ጊዴስ። 12 ዴሬ አይሲዛይሲ ሃ ሃኒዳ ዮዮዛ ቤዪዲ ጎዳ ጊሽ ሲዪዳ ቲሚርቲን ማላሌቲዲ አማኒዴስ።

* 13:1 ኔጌሬይ ላቲኔ ቃላ ጊዲሺን ቢርሼላይ ካሬላ ጉሳ።

ባርናባሲኔ ሳወሌይ ጲሲዲያ ጌቴቲዛ ዳሬን

13 ጳውሎስኔ ኢዛራ ዲዛይቲ ጳፋፔ ዳንዲዲ ጲንፊሊያ ጌቴቲዛሶን ዲዛ ጴርጌኔ ጌቴቲዛሶ ማርካቤን ጌሊ ቢዳ፤ ዮሃንሲ ኢስታፌ ቫኬቲዲ ጉዬ ዬሩሳላሜ ሲሚዳስ። 14 ኢስቲ ጊዲኮ ጴርጌኔፔ ዳንዲዲ ጲሲዲያ ጊዶን ዲዛ ጌዴ ኣንፆኪያ ቢዳ፤ ሳምባታ ጋላስ ኣይሁዲታ ዋሳ ኬል ጌሊ ኡቲዳ። 15 ሙሴ ዋጋ ማፃፋቲኔ ናቤታ ማፃፋቲ ናባቤቲዳፔ ጉዬ ኣይሁዲታ ዋሳ ኬል ሃላቃቲ “ኑ ኢሻቶ! ኢንቴስ ሃይሳ ኣሳ ዘራና ቃላይ ዲኮ ሃሳይቲ” ጊዲ ኢስታኮ ኣሴ ዬዲዳ።

16 ጳውሎስካ ዳንዲ ኤቂዲ ባ ኩሹራ ማላቲዲ “ኢንቴኖ ኢስራዔሌ ኣሳቶ! ቃሴካ ኢንቴኖ ያሳስ ያዪዛ ኣይዛቤቶ! ሲዪቲ። 17 ሃ ኢስራዔሌ ዳሬ ያሳይ ካሴ ኑ ኣዋታ ዶሪዳስ፤ ኢስቲ ጊብቋ ዳሬን ዲሺን ኢስታ ቶቁ ቶቁ ሂስቲዳስ። ባ ዋልቃማ ቄሴራ ሄፔ ኢስታ ኬሲዳስ። * 18 ኦይዱ ታሙ ላይል ኩሜል ኢስታ ባዞ ቢታን ዳንዳዪዳስ። †* 19 ካናኔ ቢታን ዲዛይታ ላፑን ካዋታ ጳይሲዲ ኢስታ ቢታ ባ ዳሬታስ ጋዴ ሂስቲ ላቲሲዳስ። * 20 ሄሲ ዉሪ ፖሌቲዳይ ኦይዱ ቋታኔ ኢቻሹ ታሙ ላይላታ ጊዶና። ሄሳፌ ጉዬ ናቤ ሳሚላ ዋዴ ጋካናስ ኢስታ ፒርዲዛ ዳናታ ኢሚዳስ። *

21 “ሄሳፌ ጉዬ ዳሬይ ባ ቦላ ካዋ ካዋፋና ማላ ሳሚላ ዋሲዳስ፤ ያሳይካ ቢኒያሚ ባጋፌ ቂሴ ና ሳዖሌ ኢስታስ ኢሚዳስ። ኢዚካ ኢስታ ኦይዱ ታሙ ላይል ሃሪዳስ። * 22 ሳዖሌ ቫሪዳፔ ጉዬ ዳዉቲ ካዋሊዳስ፤ ኢዛ ጊሽ ታ ዋዝና ማላ ሃኒዛይሳኔ ታ ኮዩዳይሳ ዉርሲ ኦሊዛ ኢሴዬ ና ዳዉቲ ታ ዳማዲስ፣ ጊዲ ዳዉቲ ጊሽ ያሲ ማርካቲዳስ። * 23 ያሲካ ባ ጫቆ ቃላል ሃ ኣዳዛ ዜሬፋፌ ኣስ ኣሽዛይሳ ዬሱሳ ኢስራዔሌስ ኤሂዳስ። 24 ዬሱሲ ያናፔ ካሴ ዮሃንሲ ኢስራዔሌ ዳሬይ ዉሪ ማርቴፋን ጌሊዲ ፃማቂታና ማላ ሳባኪዳስ። * 25 ዮሃንሲ ባ ከቴቲዳይሳ ፖሎ ቦላ ዲሼ ታ ኢንቴስ ኦና ሚሳታዚና? ታ ከቴቲዳይሳ ጊዲኬ

* 13:17 ኬሳ 1:7፤ 12:51 † 13:18 ዳንዳዪዳስ ኢሲ ኢሲ ጌሻ ማፃፋቲ ኢስታ ሎዔሊ ኦይኪዳስ ጌቴስ። * 13:18 ታይ 14:34፤ ዛሬ 1:31 * 13:19 ዛሬ 7:1፤ ኢያ 14:1 * 13:20 ዳኔ 2:16፤ 1ሳሚ 3:20 * 13:21 1ሳሚ 8:5፤ 10:21 * 13:22 1ሳሚ 13:14፤ 16:12፤ ማዛ 89:20 * 13:24 ማር 1:4፤ ሉቃ 3:3

ሃራይ አቶሺን ታ ኢዛስ ቶሆ ጫማ ኪሬ ቢርሻናስ ቤሶንታይሲ ታፔ ጉዬራ ያና፣ ጊደስ። *

26 “እንቴኖ አብራሃሜ ዜሬላፌ ዬሌቲዳ ኑ እሻቶ! ቃሴካ እንቴ ጊደንካ ያሳስ ያዪዛይቲ ወሪ ሃይሲ አቶቴላ ኪታይ ኪቴቲዳይ ኑስ ኡባታሳ! 27 ዬሩሳላሜ አሳቲኔ ኢስታ ሃላቃቲ ዬሱሳ ኤሪቤቴና፤ ጊደ አቲን ኢስቲ ኢዛ ቦላ ፒርዲዳ፤ ሄሳንካ ሳምባታን ሳምባታን ናባቤቲዛ ካሴ ናቤታ ቃላይ ኢዛ ቦላ ፖሌቲደስ። 28 ኢዛ ሃይቆስ ጋሊዛ ኢሲ ጋሶካ ኢስቲ ዴሞንታ ኣጊኮካ ጰላዎሲ ኢዛ ቦላ ሃይቆ ፒርዳ ፒርዳና ማላ ዋሲዳ። * 29 ኢዛ ጊሽ ዓፊቲዳይሳ ኢስቲ ወርሲ ፖሊዳፔ ጉዬ ኢዛ ካቂቲዳ ሚላ ቦላፌ ጋዴን ዋሊዲ ዲፎን ሞጊዳ። * 30 ጊደ አቲን ያሲ ኢዛ ሃይቆፔ ዴንሊደስ። 31 ጋሊላፔ ዬሩሳላሜ ጋካናስ ባናራ ዲዛይታስ ዳሮ ዋዴ ቤቲደስ፤ ሄይቲካ ሃዲ ኢዛ ጊሽ ዴሬታስ ማርካታ። *

32 “ኑካ ካሴ ያሲ ኑ አዋታስ ጫቂዳ ሚሺራቾ ቃላ እንቴስ ሳባኮስ። 33 ዬሱሳ ኪቲዲ ኢስታስ ጫቂዳ ቃላ ኑስ ኢስታ ናይታስ ፖሊደስ፤ ሄሲካ ማዛሙሬ ማዓፋን ናምዓንሶ ሽምፖን ‘ኔ ታ ናዛ፤ ታ ኔና ሃቕ ዬላዲስ’ ጌቲቲ ዓፊቲደስ። * 34 ቃሴካ ኢዚ ዋቆንታይሳኔ ያሲ ኢዛ ሃይቆፔ ዴንሊዳይሳ ሻኪ ኤራና ማላ ‘ኣንጄቲዳይሳኔ ኣማኔቲዳ

ዳወቲ ኣንጅ ታ እንቴስ ኢማና፣ ጊደስ። *

35 ሄሳ ጊሽ ሃራሶንካ

‘ኔ ጌሻይ ሃይቂ ዋቃና ማላ ኔ ኮያካ’ ጌስ። *

36 “ዳወቲይ ባ ዋዴን ያሳ ሽኔ ማላ ኦሊዳፔ ጉዬ ሃይቂደስ፤ ካሴ ባ አዋታራ ሞጌቲን ኢዛ አሾይ ዋቂደስ። 37 ያሲ ኢዛ ሃይቆፔ ዴንሊዳይሲ ኢዚ ጊዲኮ ዋቂቤና። 38 ሄሳ ጊሽ ታ እሻቶ! ናጋራስ ማሮቴሊ ቤቲዛይ ዬሱሳ ባጋራ ጊዲዳይሲ እንቴስ ሳባኬቲዳይሳ ኤሪቴ። 39 ኢዛ ኣማኒዛዳይ ወሪ ካሴ ሙሴ ዋጋ ባጋራ ዴሞንታ ዲሎቴላ ዴማና። 40-41 ሄሳ ጊሽ ካሴ ናቤቲ

* 13:25 ዮሃ 1:20፤ ማፋ 3:11፤ ማር 1:7፤ ሉቃ 3:16፤ ዮሃ 1:27 * 13:28
 ማፋ 27:22-23፤ ማር 15:13-14፤ ሉቃ 23:21-23፤ ዮሃ 19:15 * 13:29 ማፋ
 27:57-61፤ ማር 15:42-47፤ ሉቃ 23:50-56፤ ዮሃ 19:38-42 * 13:31 ሃዋ
 1:3 * 13:33 ማዛ 2:7 * 13:34 ኢሳ 55:3 * 13:35 ማዛ 16:10

ኢንቴሮ ቂጳሳዊቶ ፆሊቴ፤ ማላሌቲቴ፤ ጳጳቴ፤

ኢንቴሶ ኦኒካ ዮቲን አማናናሰ ኢንቴና ሜቲዛ ሚሽ
ታ ኢንቴ ዋዴን ኦፋና፣ ጊዳ ቃላይ ኢንቴ ቦላ ጋኮንታ ማላ
ናጌቲቴ” ጊዴሰ።

42 ጳውሎሲኔ ባርናባሲ አይሁዳታ ዋሳ ኬፋፌ ኬዚሽን አሳይ
ኢሰታ ሄሳ ኢስቲ ዮቲዳ ቃላ ካሊዛ ሳምባታ ጋላሰ ዛሪ ዮታና
ማላ ዋሲዴሰ። 43 ሺቆይ ላሌቲዳፔ ጉዬ ዳሮ አይሁዳቲኔ
አይሁዳታ አማኖን ጌሊዲ ያሴ ጎይኒዛ አሳቲ ጳውሎሳኔ ባርናባሳ
ካሊዲ። ጳውሎሳንቲካ ኢሰታ ቆፍሲሽ ኢስቲ ያሳ ኪያቴላን ሚኒ
ዳና ማላ ዞሪዳ።

44 ካሊዛ ሳምባታ ጋላሰ ካታማ አሳፔ ጉላቲ ፃላላ አቲን
ዳሪዛ ባጋይ ዉሪ ጎዳ ቃላ ሲያና ሸቂዴሰ። 45 አይሁዳቲካ ዳሮ
ዴሬ ቤዪዲ ቃናቴቴላን ኩሚዳ። ጳውሎሳ ሃሳያ ኤቂቴሽ ኢዛ
ጫዪዳ።

46-47 ጳውሎሲኔ ባርናባሲ ባቦንታ ፃላቴላን “ያሳ ቃላይ ኮይሮ
ኢንቴሶ ዮቲታናሰ ቤሴሰ። ጊዳ አቲን ኢንቴ ቃላ ለቂዴታ። ኢንቴሶ
ሜርና ዴያይ ቤሶንታይሳ ኢንቴርካ ኢንቴ ቦላ ፒርዲዳ ጊሽ ሃዒ
ኑኒ ጌዴ አይዛቤታኮ ባና ኮዮሰ። ቃሴካ ጎዳይ ኑና ንሳሰ አቶቴላ
ቃላ ቤታ ጋቻ ጋፋና ማላ ታ ኔና አይዛቤታሰ ፖዖ ሂሰታ ኪታዲሰ፣
ጌ አዛዚዴሰ” ጊዳ።

48 አይዛቤቲ ሄሳ ሲይዲ ዳሮ ኡፋዬቲዳ። ጎዳ ቃላሲካ ቦንቾ
ኢሚዳ። ሜርና ዴያሰ ጊጌቲዳ ዴሬይ ዉሪ አማኒዴሰ። 49 ጎዳ
ቃላይ ሄራን ዲዛ ዴሬ ኡባሶ ጋኪዴሰ። 50 አይሁዳቲ ቃሰ
አያና ሃኖን ካሴፔ ሚኒዛይታኔ ዲሳን ቦንቹቲዳ ማጫሳታ ሄሳሶካ
ካታማን ዲዛ ጊታ አሳታ ዴንፌሊዲ ጳውሎሳ ቦላኔ ባርናባሳ ቦላ
ጎዴቴሊ ዴንፌዲ ባ ዴሬፔ ኬሲ ጎዲዳ። 51 ጳውሎሲኔ ባርናባሲ
አሳይ ኢሰታ ኢፂዳይሳ ቤሳናሰ ባ ቶሆ ቦላ ዲዛ ጉዲላ ፒቲዲ
ኢቆኒዮኔ ጌቲቲዛሶ ቢዳ። * 52 አማኒዛይቲ ኡፋዴሳኒኔ ፂሎ
አያናን ኩሚዳ።

14

ጳውሎሲኔ ባርናባሲ ኢቆኒዮኔን

1 ኢቆኒዮኔን ጳውሎሲኔ ባርናባሲ ኢሲፌ አይሁዳታ ዋሳ ኬፌ
ጌሊዲ። ሄንካ ኢስቲ አሳ ሎዔል ታማርሲዳ ጊሽ ጊሪኬ አሳፔኔ
አይሁዳ አሳፔ ዳሮይ አማኒዴሰ። 2 ሄንኮ አማኖንታ አይሁዳ

* 13:51 ማቶ 10:14፤ ማር 6:11፤ ሉቃ 9:5፤ 10:11

አሳይ አይዛቤታ ኢስታ ቦላ ዴንፊሊዲ አሳይ አማኒዛይታ ኢፃና ማላ ኦሊዴስ። ³ ጳውሎስኔ ባርናባሲ ጎዳ ጊሽ ፃላቴላራ አሳስ ዮቴሼ ሄን ዳሮ ዋዴ ጋምዒዳ። ጎዳይካ ኢስቲ ዮቴዛ ኢዛ ቃላ ጌታ ማላታራኔ ዋልቃማ ኦሶን ቆንጨሲ ማርካቲዴስ። ⁴ ካታማ አሳይ ባ ጌዶን ናምዑ ኬዚ ሻኬቲዲ ባጋይ አይሁዳታ ባጋ ባጋይ ጳውሎሳንታ ባጋ ጌዲዴስ።

⁵ ሄ ዋዴ አይሁዳቲኔ አይዛቤቲ ባና ካሌሊዛይታራ ኢሲፌ ጌዲዲ ኢስታ ዋይሳናሲኔ ሹቻን ጫዳናስ ኮይዳ። ⁶ ኢስቲካ ሄሳ ኤሪዳ ማላ ሊስቲራኔ ዴርቤኔ ጌቴቲዛሶ ጌዴ ሊቃዶኒያ ካታማታኔ ሄ ሄራን ዲዛ ዴሬ ባቃቲዳ። ⁷ ሄንካ ሚሺራቾ ቃላ ሳባኮ ዶሚዳ።

ጳውሎስኔ ባርናባሲ ሊስቲራኔ ዴርቤኔን

⁸ ሊስቲራን ዬሌቶሳፔ ባ ቶሆራ ሃሙቲ ኤሮንታ ኢሲ ቶሆ ሲላ አዴይ ዴስ። ⁹⁻¹⁰ ሄሳዴይ ጳውሎሲ ሳባኪሺን ኡቲ ሲዬሰ፤ ጳውሎሲካ ኢዛኮ ቲሺ ሂስቲ ያሊዲ አዴዛ ፓላና አማኖይ ኢዛ ቦላ ዲዛይሳ ቤዪዲኔ ቃላ ቶቁ ሂስቲዲ “ሲቲ ጋዳ ኔ ቶሆን ኤቃ!” ጌዴስ። አዴዚ ሄራካ ጉፒ ዴንዲዲ ሃሙሐ ኦይኪዴስ።

¹¹ አሳይ ጳውሎሲ ኦሊዳይሳ ቤዪዲ ሊቃዶኒያ ቃላራ “ኤቃ ያሳቲ አስ ሚሳቲዲ ሃ ኦኮ ዋዲዳ” ጌዲ ዋሲዴስ። ¹² ባርናባሳ “ዲያ” ጌዳ ጳውሎሳካ ሃሳዪዛ ዋናይ ኢዛ ጌዲዳ ጊሽ “ሄርሜኔ” ጌዳ። ¹³ ካታማፔ ኢሲ ባይንዳሶን ዲዛ ዲያ ጌቴቲዛ ኤቃ ኬላ ቄሴይ ኮርማታኔ ፃፃቲ ጊጌዳ ጨሽ ጌዴ ካታማ ጌሊዛ ኦጌ ቦላ ኤፊዲ ዴሬዛራ ኢሲፌ ጌዲዲ ጳውሎሳሲኔ ባርናባሳስ ያርሻና ኮዪዴስ።

¹⁴ ሃዋሬቲ ባርናባሲኔ ጳውሎሲ ሄሳ ሲዪዳ ማላ ባ ማይያ ዳኪዲ ጌዴ ዴሬዛ ጌዶ ዋዲዳ፤ ባ ቃላ ቶቁ ሂስቲዲ ሂዝጊዳ፤ ¹⁵ “ሃይቶ አሳቶ! ሃይሳ አዛስ ኦፊቲ? ኦካ አንቲ ማላ አሳኮ! አንቲካ ቃሴ ሃይሳ ሜላ ሃዳ ዮፖፔ ሃኪዲ ሳሎኔ ሳዓ፤ አባካ፤ አባታ ጌዶን ዲዛይታ ወርሲ ሜዲዳ ዴፖ ያሳኮ አንቲ ሲማና ማላ አንቲስ ሚሺራቾ ቃላ ሳባኮስ። * ¹⁶ ኢዚ ካሴ አዲዳ ዬሌቴላይኔ ዴሬይ ወሪካ ባ ኮይዳ ማላ ሃናናስ ዬዲ ቤሲዴስ። ¹⁷ ጌዶ አቲኑ ያሲ ሳሎፔ ኢራኔ ሄሳሶካ ካሊ ካዲዛ ዋዴታ አሚዲ አንቲ ዋዝና ካላኒኔ ኡፋይሳ ኩንሊዴስ፤ ኡፋይሳካ አንቲና ካልሊዲ ሎፖ ኦሶን ባና ማርካይ ባይንዳ አጊቤና” ጌዳ። ¹⁸ ሄሳ ወርሲ ሃሳዪዲ አሳይ ኢስታስ ያርሾንታ ማላ ዋይዲ ዲጊዳ።

* **14:15** ኬሳ 20:11፤ ማዛ 146:6

19 አይሁዳቲ ቃስ አንጾኪያፔኔ ኢቆኒዮኔፔ ዪዳ አሳይ አሳ ዘሪዲ ጳውሎሳ ሹቻን ጫዳና ማላ አማንሉዳ። ጳውሎሳካ ሹቻን ጫዲዲኔ ሃይቂዳስ ጊ ጎቺዲ ካታማፔ ጌዴ ካሬ ኬሲዳ።
20 ጊዶ አቲን አማኒዛይቲ እዛ ዩዩ አጂ ናጊሺን ጳውሎሲ ዴንዲዲ ጌዴ ካታማ ጌሊዴስ። ዋንቴላ ጋላስ ባርናባሳራ ኢሲፌ ዴርቤኔ ጌቴቲዛሶ ቢዳ።

ጳውሎሲኔ ባርናባሲ ሶሪያን ዲዛ አንጾኪያ ሲሚዳ

21 ጳውሎሲኔ ባርናባሲ ዳርቤን ሚሺራቾ ቃላ ሳባኪዳ ዳር አሳ አማንሉዳፔ ጉዬ ጌዴ ሊስቲራ፥ ኢቆኒዮኔኔ አንጾኪያ ሲሚዳ።
22 አማንዛይታ ዋዝና ሚንሌላሼ ኢስቲ አማኖን ሚኒ ዳና ማላ ዘሪሹ “ኑ ያሳ ካዎቴላ ጌላናስ ዳር ሜቶ ጊዶራ አጳናስ ኮሼስ” ጊዳ። 23 ሄሳፌ ጉዬ ዲማ ዲማ ዋሳ ኬላታን ጨማታ ዶሪዳፔ ጉዬ ያማኒኔ ዋሳን አማኔቲዳ ጎዳስ ሃዳራ አሉ ሲሚዳ።
24 ጲሲዲያሪ አጂዲ ጲንፊሊያ ሲሚዳ። 25 ጴርጌኔን ቃላ ሳባኪዲ ዲጌ አፃሊያ ጌቴቲዛሶ ዋጂዳ። 26 አፃሊያፔካ ሃሲ ጋካናስ ኢስቲ አሉዳ ኦሶዛ ሃዳራ ኢስታስ አሜቲዳ ካታማ ሶሪያን ዲዛ አንጾኪያ ማርካቤን ጌሊዲ ሲሚዳ።
27 ሄ ጋኪዳ ማላ ዋሳ ኬላ አሳ ወርሲ ሺሺዲ ያሲ ኢስታራ አሉዳይሳ ቃሴካ አይዛቤታስ አማኖ ፔንጌይ ዋኒ ዶዬቲዳኮኔ ወርሲ ዮቲዳ። 28 ሄን አማኒዛይታራ ዳር ዋዴ ጋምዒዳ።

15

ዬሩሳላሜ ዲላታ

1 ኢሲ ኢሲ አሳቲ ዩሁዳፔ ዲጌ አንጾኪያ ዋጂዲ “እንቲ ሙሴ ዋጋ ማላ ቃፃሬቶንታ አጊኮ ኦኒካ አታናስ ዳንዳዬኬታ” ጊዲ አማኒዛይታ ታማርሶ ዶሚዳ። * 2 ሄሲካ ጳውሎሳኔ ባርናባሲ ጌታ ፓላማኒኔ ኦቫ ጊዶ ጌልሉዴስ፤ ሄሳ ጊሽ ጳውሎሲኔ ባርናባሲ ሃራ ኢሲ ኢሲ አማኒዛ አሳታራ ዬሩሳላሜ ኬዚዲ ሃ ዮዶዛ ጊሽ ጨማታኔ ሃዋሬታ ኦይቻና ማላ ጌቴቲዴስ።

3 ሄሳ ጊሽ ዋሳ ኬላያ ኢስታ ዬሩሳላሜ ባና ማላ ኪቲን ኢስቲ ፒንቄሪኔ ሳማሪያራ አጂ ቢሼ ሄን ዲዛ አሳ አይዛቤቲ አማኖን ሲሚዳይሳ ዮቲዳ፤ ሄ ዋዴ አማኒዛይቲ ሄሳ ሲይዲ ኬሂ ኡፋዬቲዳ። 4 ኢስቲ ዬሩሳላሜ ጋኪን ዋሳ ኬላ አሳይ ሃዋሬቲኔ ጨማቲ ኢስታ ሞኪ ኤኪዳ፤ ኪቴቲ ቢዳይቲካ ያሲ ኢስታራ ጊዲዲ አሉዳይሳ ወርሲ ኢስታስ ዮቲዳ። 5 ፋርሳዌታ ባጋ አሳታፔ

* 15:1 ሉዌ 12:3

አማኒዳ ኢሲ ኢሲ አሳቲ ዴንዲዲ “አይዛቤቲ ቃፃፊታናሲኔ ሙሴ ዋጋ ናጋና ማላ ኢስታስ ዮታናስ ቤሴስ” ገዴ።

6 ሃዋሬቲኔ ጨማቲ ሄ ዮዮዛ ገደ ሎዔል ያላናስ ሸቂዳ። 7 ዳሮ ፓላማፔ ጉዬ ጴፅሮሲ ዴንዲ ኤቂዲ፥ “ታ ኢሻቶ! ጉላ ዋዴፔ ካሴ ያሲ ታና ኢንቲ ገደፌ ዶሪዲ አይዛቤቲ ታ ዱናፔ ሚሺራቾ ቃላ ሲይዲ አማናና ማላ ኦሊዳይሳ ኢንቲ ኤሬታ። 8 አሳ ዋዝና ኤሪዛ ያሲ ኩስ አሚዳይሳ ማላ ኢስታስካ ደሎ አያና አሚዲ ኢስታ ባስ ኤኪዳይሳ ማርካቲዴስ። * 9 ኢስታ ዋዝናካ አማኖን ጌሺዲ ኩ ገደኒኔ ኢስታ ገደን አይኮ ሻኮካ ኦሊቤና። 10 ሄሳ ገሽ ኩ አዋቲኔ ኩካ ቶካናስ ዳንዳዮንታ ቃምባራ አማኒዛይታ ቶሳናስ ኢንቲ አዛስ ያሴ ፓጩቲ? 11 ኩ አቲዳይ ሊኬ ኢስታሶካ ጎዳ ዬሱሳ አጾ ኪያቲላን ገዲዳይሳ አማኖስ” ገዴስ።

12 ሸቂዳ አሳይ ወሪካ ጮው ጊን ባርናባሲኔ ጳውሎሲ ያሲ ኢስታ ባጋራ አይዛቤታ ገደን ኦሊዳ ገታ ማላታታ ገሽ ዮቲሺን ማላሌቲዲ ሎዔል ሲዬዴስ። 13 ኢስቲ ዮቲ ወርሲሺን ያቆቤይ ዴንዲ ኤቂዲ ሂዝገዴስ “ታ ኢሻቶ! ታ ገዛይሳ ሲዬቲ፤ 14 ያሲ አይዛቤታፔ ባስ ገዳና ዴሬ ካሴቲዲ አዚ ዋስቲ ያይጊ ዋሊዳኮ ሰሞኒ ኩስ ሎዔል ዮቲዴስ። 15 ካሴ ናቤታን ሂዝጊ ዓፌቲዳ ቃላይ ሃይሳራ ጋጌስ።

16 ሃይሳፌ ጉዬ ታ ሲማዳ
 ላሌቲዳ ዳወቲ ኬሌ ኬፃና፤
 ላሌቲዳይሳ ዛራ ኤሳና፤ ዛራዳካ ኬፃና።

17 ሄሲካ አቲዳ አሳይ ጎዳ ኮያና ማላኔ
 ታ ሱንላን ያይጌቲዳ አይዛቤቲ ታና ኮያና
 ማላ ጌስ ወርሲ ኦሊዳ ያሲ፤ 18 ሃይሳ ኮይሮፔካ ኤርሲዳ ያሲ ታና፤ ገዴስ።

19 “ሄሳ ገሽ ሃ ያሳኮ ሲሚዳ አይዛቤታ ኩ ሜቶሶንታ ማላ ሃይሲ ታ ባጋራ ታስ ቃሾ። 20 ገደ አቲን ኤቃስ ያርሼቲዲ ቱኒዳ ካል ሞፒቲ፤ ላይማፔ ሃኪቲ፤ ባወቲ ሃይቂዳ ሜሄ አሾ ሞፒቲ፤ ሱል ኡዮፒቲ ገዲ ኩ ኢስታስ ዓፋና ቤሴስ። * 21 ሙሴ ዋጋይ ገዲኮ ቤኒሶፌ ሳምባታ ሳምባታ ጋላስ አይሁዳታ ዋሳ ኬላን ናቤቤቲሼኔ ካታማይ ዲዛሶን ሳባኬቲሼ ዴስ” ገዴስ።

ሃዋሬታፔ አማኒዛ አይዛቤታስ ዓፌቲዳ ዳብዳቤ

* 15:8 ሃዋ 10:44 * 15:20 ኬሳ 34:15-17፤ ሉዊ 18:6-23

22 ሄ ዋዴ ሃዋሬቲኔ ጨማቲ ኩሜላ ዋሳ ኬላ አሳራ ጊዲዲ ባ ጊዶፌ ኢሲ ኢሲ አሳታ ዶሪዲ ጳውሎሳራኔ ባርናባሳራ ጋሊ አንጾኪያ ዬዳናሰ ቃቸዳ። አማኒዛ አሳ ጊዶፌ ዋናቲዛይታ ባርሳባሳ ጌቲቲዛ የሁዳኔ ሲላሴ ዶሪዳ። 23 ኢስታ ኩሼን አሚ ዬዲዳ ዳብዳቤዚ “ኢንቲ አሻታ፤ ሃዋሬታ፤ ጨማታ፤ አይዛቤታ፤ አማኒዳ አንጾኪያኒኔ ሶሪያን፤ ኪልቂያንካ ዲዛ አማኒዛይታስ ኑ ሳሮካይ ኢንቲና ጋኮ።

24 “ኢሲ ኢሲ አሳቲ ኑ፤ ጊዶንታ ባ ባጋራ ኑ አቻፌ ቢዲ ባ ሃሳያን ኢንቲ ዋዝና ያኔ ሃኔ ቃሊዳይሳኔ ኢንቲና ቡልባኪዳይሳ ኑ ሲዪዶስ። 25 ሄሳ ጊሽ ጉላ አሳታ ዶሪዲ ዶሴቲዳ ባርናባሳራኔ ጳውሎሳራ ኢንቲኮ ዬዳናሰ ኑ ወሪካ ቃላ ጋጊዶስ። 26 ኢስቲ ጎዳ ዬሱስ ኪርሰቶሳ ጊሽ ባ ሼምፖ አሊ አሚዳይታ። 27 ሄሳ ጊሽ ኑ ኢንቲስ ፃፊዳይሳ ኢስቲ ኢንቲስ ባ ዲናራ ሎዔሊ ዮታና ማላ የሁዳኔ ሲላሴ ኢንቲኮ ዬዲዶስ። 28 ሃይታ ኢንቲስ ኮሺዛ ዮጾታ፤ ሃራ ዴፆ ቶሆ ኑ ኢንቲ ቦላ ዋላንታ ማላ ኑሲኔ ዲሎ አያናሰ ሎፆ ሚሳቲ ቤቲዴስ። 29 ሄሲካ ኢንቲ ኤቃስ ሹኬቲዳ አሾ፤ ሱላፌ፤ ባወቲ ሃይቂዳ ሜሄ አሾ፤ ላይማ፤ ኢንቲ ሃካና ማላ፤ ኢንቲ ሃይታ ሚሳቲዛይታ፤ ሃኪኮ ኢንቲስ ሎፆ፤ ሳሮን ዲቲ” ጌስ።

30 ኪቲቲዳ አሳቲ ዋይዘቲዲ ዲጌ አንጾኪያ ዋዲዳ፤ ሄን አማኒዛይታ ወርሲ ሺሺዲ ኤሂዳ ዳብዳቤዚ ኢስታስ አሚዳ። 31 ዴሬይካ ናባቢዲ ሚንፊሊዛ ቃላን ኡፋዬቲዴስ። 32 የሁዳይኔ ሲላሴ ናቤታ ጊዲዳ ጊሽ ዳሮ ዞሪዲ አማኒዛይታ ሚንፊሊዳ። 33 ሄን ጉላ ዋዴ ጋምዒዲ አማኒዛ አሳይ ዋይዚን ጉዬ ባና ኪቲዳይታኮ ሲሚዳ። 34 ሲላሴ ቃስ ሄን አታናሰ ኮዪዴስ። * 35 ጳውሎሲኔ ባርናባሲ ሃራ ዳሮ አሳታራ ጊዲዲ ጎዳ ቃላ ታማርሲሼኔ ሳባኪሼ አንጾኪያን ጋምዒዳ።

ጳውሎሲኔ ባርናባሳ ሻኬቲል

36 ጳውሎሲ ጉላ ዋዴ ጋምዒዲ ባርናባሳ “ኑ ካሴ ጎዳ ቃላ ዮቲዳ ኡባ ካታማታ ቢዲ አማኒዛይቲ አይ ማላ ዲዛኮኔ አኔ የዪ ቤዮስ፤ ዴንዳ” ጊዴስ። 37 ባርናባሲካ ማርቆሳ ጌቲቲዛ ዮሃኒሲ ኢስታራ ባና ማላ ኮዪዴስ። 38 ጳውሎሲ ቃስ ኢዛ ኤኪ ባናሰ ኮይቤና፤ ጋሶይካ ካሴ ማርቆሲ ኢስታፌ ሻኬቲዲ ጲንፊሊያ ጊዛሶን ጉዬ አቲዲ ኢስታራ ኦሶስ ሲንሸ ኬዘንታ አጊዳ ጊሻሳ። * 39 ሂስቲን ዳሮ ፓላማይ ኢስታ ጊዶን ሜዴቲዳ

* 15:34 ኢሲ ኢሲ ጌሻ ማፃፋቲ ፓይዶ 34 ቦላ ዲዛ ቆፋ ጉጃቲና። * 15:38 ሃዋ 13:13

ጊሽ ባ ጊዶን ሻኬቲ ዎዲዳ፤ ሄሳ ጊሽ ባርናባሲ ማርቆሳ ኤኪዲ ማርካቤን ጌሊዲ ቆጶሮቤ ቢደስ። ⁴⁰ ጳውሎስ ቃስ ሲላሴ ደሪደስ። አማንዛይቲካ ጳውሎሳ ጎዳ አቶ ኪያቴላስ ሃዳራ ኢሚዳፔ ጉዬ ኢዚ ኢስታፌ ሻኬቲዲ ቢደስ። ⁴¹ አማንዛይታ ሚንፊሊሽ ሶሪያራ ኪልቂያራ አዲ ቢደስ።

16

ዊምቶሲ ጳውሎሳራኔ ሲላሴራ ኢሲፌ ጊዲደስ

¹ ጳውሎስ ዳርቤኔ ጌቲቲዛሶኔ ሊስቲራ ጋኪዲ ኢዛ አዋይ ጌሪኬ አስ፡ አዪያ ቃስ አይሁዳ አስ ጊዲዳ ዊምቶሳ ጌቲቲዛ ኢሲ አማንዛይ ሄን ዳሚደስ። ² ኢዚካ ሊስቲራኔ ኢቆኒዮን አማንዛ አሳ አቻን ሎዎ ማርካቴላ ዲዛዴ። ³ ጳውሎሲካ ዊምቶሳ ባናራ ኤኪ ባናሶ ኮዪደስ። ሄሳ ጊሽ ሄ ሄራን አይሁዳታ ጊሽ ጊዲ ዊምቶሳ ቃፃሪደስ። ጋሶይካ አይሁዳቲ ዊምቶሳ አዋይ ጌሪኬ አስ ጊዲዳይሳ ኤሪዛ ጊሻሳ።

⁴ ኢስቲ ኢሲ ካታማፔ ሃራ ካታማ አዲ አዲ ቢሼ ሃዋሬቲኔ ዬሩሳሌሜ ዋሳ ኩላ ጨማቲ ዬዲዳ ከታ አሳይ ኤኪዲ ናጋና ማላ አማንዛ አሳስ አሚ አሚ አዲዳ። ⁵ ዋሳ ኩላ አሳይ አማኖን ሚኒ ሚኒ ቢደስ፤ ቃሴ አሳይካ ቆዳን ጋላስ ጋላስ ጉጃቲ ጉጃቲ ቢደስ።

ጳውሎስ ማቂዶኒያ ጊሽ ቤዪዳ አጁታ

⁶ ጳውሎሲኔ ኢዛራ ዲዛ ዛታቲ ቃላ ኢሲያን ሳባኮንታ ማላ ዊሎ አያናይ ዲጊዳ ጊሽ ፒርጊያራኔ ጋላቲያ ዳፌራ አዲ ቢዳ። ⁷ ኢስቲ ሚሲያ ጌቲቲዛሶ ጋካና ማቲሼ ቢቲኒያ ጌቲቲዛሶ ጌላና ቆፒን ዬሱሳ አያናይ ኢስታ ዲጊደስ። ⁸ ሄሳ ጊሽ ሚሲያራ አዲዲ ዊርዓዳ ጌቲቲዛሶ ዎዲዳ። ⁹ ኢሲ ማቂዶኒያ አሲ ኤቂዲ ጳውሎሳ ሃ ማቂዶኒያ ፒናዳ ኑና ማዳ ጊሺን ጳውሎሲ ኦማርስ አጁታን ቤዪደስ። ¹⁰ ኢዚካ ሄ አጁታ ቤዪዲ ያሲ ኑ ኢስታስ ሚሺራቾ ቃላ ዮታና ማላ ያይጊደስ ጊ ቃቺዲ ኑ ሄራካ ጌዴ ማቂዶኒያ ባና ኮዪደስ።

ፒሊጶሴን ሊዲያይ ጎዳ አማናዲስ

¹¹ ማርካቤራ ዊርዓዳ ጌቲቲዛሶፔ ዴንዲዲ ሲቲ ጊዲ ሳሞቲራቂ ጌቲቲዛሶ ቢደስ። ዎንቴላ ጋላስ ናጶሌ ጊዛሶ ሲንላ ሃሙላ ጉጃደስ። ¹² ሄፔካ ኦሮሜ አሳይ ቶራን ሃሪዳ ዳፌ ጊዲዳ

ማቀደኒያ ዳሬ ዋና ካታማ ጊዲዳ ፒሊጲሲየሴ ጌቴቲዛሶ ጌሊዶስ። ሄንካ ኡንዴና ዋዴ ኡቲዶስ።

13 ሳሞባታ ጋላስ ዋሳ ዋሲዛሶ ኮዪሼ ካታማ ጌሊዛሶ ፔንጌ ኬዚዲ ዱጌ ሻፋ ዋዶስ፤ ኦ ሄን ኡቲዲ ሺቂ ዲዛ ማጫሳስ ቃላ ዮቲዶስ። 14 ቃላ ሎዔሲ ሲዪዛ ማጫሳታፔ ኢሲ ሊዲያ ጌቴቲዛራ ኢዛካ ያሴ ጎይንዛሮኔ ቲያዲሮኔ ካታማፔ ያዳ ዘዖ ሃሬ ማይዖ ዛልዒዛሮ ጳዉሎሲ ዮቲዛ ቃላ ኢዛ ዋዝናን ዋላ ሲያና ማላ ጎዳይ ኢዚ ዋዝና ዶዪዴስ። 15 ኢዛኔ ኢዚሶ አሳይካ ዓማቂቲዳፔ ጉዬ ኢዛ ኢሰታ ታ ያሴ አማኒዲ ኢንቲ ቱሙ ኤሪዳ ጊዲኮ ሃ ታሶ ዪዲ ጉላ ዋዴ ዲሺቴ ጋዳ ኢሰታ ሚንላ ዋሳዱስ።

ጳዉሎሲኔ ሲላሲ ቃሾ ኬላን

16 ኢሲ ጋላስ ኦ ዋሳሶ ቢሺን ካዮ ካዮታ ማርቲዛ ኢሲ ጋራዴ ና ዲዛሮ ኦና ዴማዱስ። ኢዛካ ባ ማርቲላን ባና አይሲዛይታስ ዳሮ ሚሽ ጌልላዉስ። 17 ሃና ጋራዴ ናያ ጳዉሎሳኔ ኦና ካላ ካላ “ሃይቲ አሳቲ ኢንቴስ ኢንቴ አታና ኦጌ ዮቲዛይቲ ዋጋ ያሳ አሳንቻታ” ጋ ጋ ዋሳዱስ። 18 ሄሳካ ዳሮ ጋላስ ሺራ ሺራ ጋዱስ። ጊዶ አቲን ጳዉሎሲ ሃ ኢዚ ቃላን ዳሮ ሜቶቲዳ ጊሽ ኢዚኮ ሲሚዳ ኢዚ ዱናራ ሃሳዪዛ ቱና አያናዛ “ኔ ኢዚፔ ኬዛና ማላ ታ ኔና ጎዳ ዬሱስ ኪርሰቶሳ ሱንላን አዛዛይስ” ጊዴስ። ሄ አያናይ ሄራካ ዬጊ ኢዚፔ ኬዚዴስ።

19 ኢዛ አይሲዛ አሳቲ ኢሰታስ ሚሼ ዴሚዛ ኦጌይ ዱዲን ኢሰታ ኡፋይሲ ቃንጻቲዳይሲ ኢሰታስ ጌሊን ጳዉሎሳኔ ሲላሲ ኦይኪዲ ቢታራ ጎቺዲ ዋናቲ ዲዛሶ ጊያ ጊዶ ኤፊዳ። 20 ዴሬ አይሲዛ ዋናታኮ ሺሺዲ “ሃይቲ አሳቲ ባስ አይሁዳ አስ ጊዲ ኡቲዲ ኦ ካታማ ቡላኬቴስ፤ 21 ቃሴ ኦ ኦርሜ አሳቲ ኤካናስ ዋይኮ ኦላናስ ኦስ ቤሶንታ ዋጋ ኦ አሳ ጊዶን ላሌቴስ” ጊዳ።

22 ዴሬይካ ኢሲ ቦላ ጊዲዲ ጳዉሎሳ ቦላኔ ሲላሲ ቦላ ዴንዲዴስ። ዴራ አይሲዛይቲ ጳዉሎሳንታ ማይዖ ቃሪ ኤኪዲ ዱርቃራ ቆፃና ማላ አዛዚዳ። 23 ኢታ ቡካ ቡኪዲ ጌዴ ቃሾ ኬላን ዬጊዳ። ቃሾ ኬላ ናጊዛይሲካ ኢሰታ ሎዔሲ ናጋና ማላ አዛዚዳ። 24 ኢዚካ ሄሳ ማላ ሚኖ አዛዘ ኤኪዲ ቃሾ ኬላስ ዋና ጊዶ ኪፊሌ ጌልሊዲ ኢሰታ ቶሆ ጊታ ዱሩማራ ሺሺ ቃቺዴስ።

25 ጊዲ ጊዶላ ጊዲሺን ጳዉሎሲኔ ሲላሲ ዋሳኒኔ ማዛሙራን ያሳ ጋላቲሺን ቃሾ አሳይ ኢሰታ ዬላኔ ጋላታ ኤዘጊ ሲዪዴስ።

26 ሃሳዓይ ባይንዳ ዲንጋቲ ቃሾ ኬላ ዓጾፔ ቃሊዛ ሚኖ ቢታ ቃሊ ሃኒዴስ፤ ሄራካ ቃሾ ኬላ ፔንጌቲ ዶዬቲዳ። ቃሼቲዳ ኡባ

አሳ ቃሾይ ቢርሼቲዳስ። 27 ቃሾ ከላ ናጊዛይሲ ጲስኮፌ ቤጊዲ ቃሾ ከላ ፔንጌቲ ዶያ ዲዛይሳ ቤዪዲ ቃሾ አሳይ ወሪ ከሲ ኤኪዳ ሚሳቲን ባና ዋጃና ማሻ ሾዲዳስ። 28 ጳውሎሲ ቃስ ባ ቃላ ጾቄ ሂስቲዲ “ኑ ወሪ ሃን ዶስ! ኔ ቦላ አይኔ ኢታ አሶፋ” ጊ ዋሲዳስ።

29 ቃሾ ከላ ናጊዛይሲ ፆምፔ ዋሲ ኤኪዲ ጌዴ ጊዶ ጉፒ ጌሊዳስ፤ ኮኮርሼ ጳውሎሳ ቶሆ ቦላኔ ሲላሴ ቶሆ ቦላ ከንዲዳስ። 30 ኢስታ ኤኪ ካሬ ከዚዲ “ሃ አሳቶ! ታ አታና ማላ አይ አሶ?” ጊዳስ።

31 ኢስቲካ ኢዛሰ “ኅዳ ዬሱሳ አማና፤ ኔካ ኔሶ አሳይካ ኢንቲ ወሪ አታና” ጊዳ። 32 ሄሳፌ ጉዬ ኢዛሰኔ ኢዛሰን ዲዛ አሳሰ ኡባሰ ኅዳ ቃላ ዮቲዳ። 33 ቃሾ ከላ ናጊዛይሲ ሄራካ ሄ ጋላሰ ቃማራ ኤፊዲ ኢስታ ማዲንላ ሜጪዳስ። ሄራካ ኢዚኔ ኢዛሰ አሳይ ወሪ ፃማቄቲዳ። 34 ቃሾ ከላ ናጊዛይሲካ ኢስታ ባ ከሌ ኤፊዲ ኢስታሰ ካላ አሊዳስ። ባሶ አሳ ኡባራ ያሳ አማኒዳ ጊሽ አዴዚ ዳሮ ኡፋዪዳስ።

35 ጋዴይ ዋንቲሺን ዳሬ አይሲዛይቲ “ሄይታ አሳታ ቢርሻ ዬዳ” ጊዲ ባ ሹሜታ ቃሾ ከላ ናጊዛይሳኮ ዬዲዳ። 36 ቃሾ ከላ ናጊዛይሲካ ኢስታሰ “ዳሬ አይሲዛይቲ ኢንቲ ቢርሼታና ማላ አዛዚዳ፤ ሄሳ ጊሽ ሃዲ ሳርን ከዚ ቢቲ” ጊዲ ጳውሎሳሰ ዮቲዳስ። 37 ጳውሎሲ ቃስ “ኑ ኦሮሜ ዬሌቲላ ጊዲሺን ፒርዳይ ባይንዳ ዳሬ ሲንላን ዱርቃራ ቡኪዲኔ ቃሾ ከላን ዬጊዳ። ሂስቲን ሃዲ ቃስ ኑና ቆታራ አሲ ኤርንታ ከሳና ኮዪዘ? ሄሲ ሃኔና፤ ኢስቲ ዪዲ ባርካ ቢርሼቶ!” ጊዳስ።

38 ሹሜቲ ሄ ኢዚ ጊዳ ቃላ ዳሬ አይሲዛይታሰ ዮቲዳ ኢስቲካ ጳውሎሲኔ ሲላሲ ኦሮሜ ዬሌታ ጊዲዳይሳ ሲይዲ ዳጋሚዳ። 39 ዪዲ ኢስታፌ ማሬቲላ ኦይቺዲ ዋይኔፔ ከሲዳ። ኢስቲ ሄ ካታማዮ አጊዲ ሃራሶ ባና ማላ ኢስታ ዋሲዳ።

40 ጳውሎሲኔ ሲላሲ ቃሾ ከላፌ ከዚዲ ሊዲያሶ ቢዳ። ሄንካ ዲዛ አማኒዛይቲ ኢስታ ዳሮ ሚንሌዲ ሄፔ ከዚ ቢዳ።

17

ጳውሎሲኔ ሲላሲ ታሶሎንቄን

1 ጳውሎሲኔ ሲላሲ አንፊጶላኔ አጶሎኒያ ጌቲቲዛ ዳሬራ አጲዲ ታሶሎንቄ ጌቲቲዛ ዳሬ ቢዳ። ሄንካ አይሁዳታ ዋሳ ከሌ ዳስ። 2 ጳውሎሲካ ኢዛሰ ዶሴ ጊዲዳ ማላ አይሁዳታ

ዋሳ ከሐ ጌሊደስ። ሄዡ ሳሚንታ ኩሜል ቃላፔ ኤኪ ኤኪ ኢስታራ ሃሳዬቲደስ። ³ ከርስቶሲ ዋዬ ኤካናሲኔ ሃይቂ ዴንዳናስ ቤሲዛይሳ ቆንጨሲ እማንሶን “ሃይሲ ታ ሳባኪዛ ዬሱሲ ኢዚ ከቲቲ ያና ጌቲቲዳይሳኮ!” ጌደስ። ⁴ እይሁዳታፔ ኢሲ ኢሲ እሳይ ባ ሲዩዳይሳ እማኒዲ ጳውሎሳራኔ ሲላሴራ ኢሲፌ ጌዲደስ። ቃሴካ ዳሮ ዳሬይ ያሴ ባቢዛ ጌሪኬታፔ ዳሮ ኤሬቲዳ ማጫሳቲ ባ ሲዩዳ ቃላን እማኒዲ ኢስታራ ኢሲኖ ጌዲዳ።

⁵ እይሁዳቲ ቃሴ ኢስታ ቃናቲዲ ጌያን ዲዛ ዋርዶ አሳታ ሺሺዲ ኩሜላ ዳሬዛ ኢስታ ቦላ ዴንፍሌዲ ካታማን ሺሮ ሜዲዳ። ጳውሎሳኔ ሲላሴ ሺሺዲ ዳራ ሲንላን ኤሳናስ ኢሲ ኢያሶኔ ጌቲቲዛይሳሶ ኮያናስ ኤሌሊ ቢዳ። ⁶ ጌዶ አቲን ኢስታ ኢያሶኔ ከላን ዴዋንታ አጊዳ ጊሽ ኢያሶኔኔ ሃራ እማኒዛ አሳታ ካታማ ዳናታ ሲንላራ ጎቺሼ “ሃይቲ አሳቲ ዳሬ ወርሲ ቡልዓኪ ካዒሺ ጋምዒዲ ቃሴ ሃዒ ሃ ዩዳ። ⁷ ኢያሶኔይካ ኢስታ ባ ከላን ዋሊደስ። ሃይቲ አሳቲ ወሪ ‘ዬሱሳ ጌቲቲዛ ሃራ ካዋይ ደስ’ ጌዲ ቁሳሬ ዋጋ ኤኬቴና” ጊሼ ዋሲዳ። ⁸ ዳሬይኔ ሄ ካታማ ዳናቲ ሄሳ ሲይዲ ባ ጌዶን ቡቄቲዳ። ⁹ ኢያሶኔኔ ሃራታካ ዋሴ ያይጊሲዲ ዬዲዳ።

ጳውሎሳኔ ሲላሴ ቤሪያን

¹⁰ እማኒዛይቲ ሄራካ ጳውሎሳኔ ሲላሴ ቃማራ ቤሪያ ዬዲዳ። ኢስቲካ ሄ ጋኪዳ ማላ እይሁዳታ ዋሳ ከሐ ጌሊዳ። ¹¹ ቤሪያ እሳይ ታሶሎንቄ አሳፔ አዲዲ እኬካራ ዲዛ አሳ። ጋሶይካ ሃይሲ ዮዖዚ ቱሜሻ? ጌ ጌዲ ጌኤሻ ማፃፋታ ቃላ ዋንቲን ዋንቲን ፒልጊ ያሊዲ ኡፋይሳን ኤኪደስ። ¹² ሄሳ ጊሽ ኢስታፌ ዳሮ እሳይ እማኒደስ። ቃሴካ ኢስታራ ቆዳን ዳሮቲ ቦንቹቲዳ ጌሪኬ ዳሬ ማጫሳቲኔ አዳቲካ እማኒዳ።

¹³ ታሶሎንቄን ዲዛ እይሁዳ አሳቲ ጳውሎሲ ያሳ ቃላ ቤሪያንካ ሳባኪዛይሳ ኤሪዳ ማላ ዳሬዛ ዴንፍላናስ ቃሴካ ጌዴ ኢስታኮ ቢዳ። ¹⁴ ሄ ዋዴ እማንዛይቲ ጳውሎሳ ኤሌሲዲ ጌዴ አባ አቺ ዬዲዳ። ሲላሴኔ ዒምቶሲ ሄን አቲዳ። ¹⁵ ጳውሎሳ ሞዩዚዳ አሳቲ ኢዛ አቲና ጋሊዳ። ቃሴካ ሲላሴኔ ዒምቶሲ ኢዛኮ ኤሌሊ ጋካና ማላ ጊዛ ኪታ ጳውሎሳፔ ኤኪዲ ሲሚዳ።

ጳውሎሲ አቴናን

¹⁶ ጳውሎሲ አቴናን ኢስታ ናጊሺን አቴና ካታማን ኤቃቲ ኩሚዳይሳ ቤዩዲ ዳሮ ሸኔቲደስ። ¹⁷ ሄሳ ጊሽ እይሁዳታ ዋሳ ከላን እይሁዳታራኔ ያሳስ ያዩዛ ጌሪኬ አሳራ ቃሴካ

ጊያይ ዲዛሶን ጋላስ ጋላስ ባናራ ጋጊዛ አሳራ ሃሳዬቲዳስ።
 18 ኤፌቆርሴኔ ኢስቶይኮ ጌቴቲዛ ኤራንቻታ ባጋ ጊዲዳይቲ
 ጳውሎሳኮ ሸቂዲ ኢዛራ ሃሳዬቲዳ ኢስታፌ ኢሲ ኢሲ አሳቲ
 “ሃይሲ ሎምዑ ሎምዓይ ኣይ ጋና ኮዪዜ?” ጊዳ። ባጋቲ ቃሴ
 ዬሱሳ ጊሺኔ ሃይቆፔ ኢዛ ዴንላ ሚሺራቾ ኢዚ ሳባኪሺን ሲይዲ
 “ሃይሲ ሃራ ኦራላ ኤቃታ ጊሽ ዮቲዛ ሚሳቲስ” ጊዳ።

19 ኢዛ ኦይኪዲ አሪኦስፋጎሴ ጌቴቲዛ ዴላታ ሲንሐ
 ኤፌዲ “ሃ ኔ ታማርሲዛ ኦራላ ቲሚርቲይ አዛኮኔ ኑ ኤራና
 ማላ ኔ ኮያይ?” ጊዳ። 20 ቃሴ ኔ ኑና ኑ ሃይላን ሲሲዛ ዮያይ
 ኑ ኤርንታ ኦራላ ጊዲዳ ጊሽ ኢዚ አዛኮኔ ኑ ኤራና ኮኖስ።
 21 አቲና አሳይ ኩሜሐ ቃሴካ ሃን ዲዛ ሃራ ዴላ አሳይካ ባስ
 ዋዴ አላናስ ኦራላ ዮያ ሃሳያኒኔ ሲሳን አቲን ሃራ ሚሻን አሌቲና።

22 ሄሳ ጊሽ ጳውሎሲ አሪኦስፋጎሴ ጌቴቲዛ ዴላታን ሸቂዳ
 ዴላ ሲንላን ኤቂዲ “ሃይቶ አቲና አሳቶ! ኢንቲ ቤቶ ሚሽ
 ወርሲ አማኒዛይታ ጊዲዳይሳ ታ ቤያይስ። 23 ታ ያኔ ሃ ዩዪሺን
 ኢንቲ ኢስታስ ጎይኒዛ ሚሻታ ታ ዪሊሺን ኤራቶንታ ያሴ’ ጌቴቲ
 ያፌቲዳይሳ ኢሲ ያርሾሶ ዴማዲስ፤ ሄሳ ጊሽ ሄሳ ኢንቲ ኤርንታ
 ጎዪኒዛይሳ ታ ኢንቲና ኤሪሳና። 24 ሃይሳ አላሜዛኔ ኢዛ ጊዶንካ
 ዲዛይሳ ወርሲ ሜዲዳ ያሲ ኢዚ ሳሎኔ ሳዓ ጎዳ። ሄሳ ጊሽ ኢዚ
 አሳ ኩሺን ኬፃቲዳ ኬላን ዴና። 25 ኢዚ አሳ ኡባስ ዴያኔ ሸምፖ፤
 ቃሴካ ሃራ ወርሲ ኢሚዛይሳ ጊዲዳ ጊሽ ኢዛስ ፓፌዛዚ ዶንታ
 ጊሽ ኢዚ አሳ ኩሺፔ ማዶ ኤኬና። 26 አሳ ዜሬሐ ወርሲ ኢሳዴፌ
 ሜዲዲ አሲ ቢታ ቦላ ዴና ማላ ኦሊዴስ፤ አሳይ ዴና ዋዴኔ
 ወርሴላ ዳስ ዋሊዴስ። 27 ሄሲካ አሲ ያሴ ኮይዲኔ ፒልጊዲ
 ዴማናኮኔ ጊዲ ዋሊዴስ፤ ሄሲ ሄሳ ጊዲኮካ ኢዚ ኑፔ ኢሲ
 ኢሳዴፌ ሃኪ ዲዛ ጊሽ ጊዴና። 28 ኑ ዴያ ዴሚዴይ፥ ዲዛይኔ
 ቃፃቲዛይ ኢዛና፤ ኢንቲ ዴሬን ዬሐ ኬሲዛ ኢሲ ኢሲ አሳቲ ‘ኑካ
 ኢዛ ናይታ’ ጊዳ ማላ።

29 “ሂስቲኮ ኑ ያሳ ናይታ ጊዲኮ ያሲ አሳ ኤራቲላን ሜዲ
 ኬሲዳ ዋርቃ ዋይኮ ቢራ ዋይኮ ሹቾ ሚሳቲስ ጊዲ ኑ ቆፓናስ
 ቤሴና። 30 ካሴቲዲ ያሲ ሃይሳ ማላ ሃናታ አሳይ ኤርንታ
 ኦሊዴይሳ ዳንዳያን ኦዲዴስ፤ ሃዒ ጊዲኮ አሲ ወሪ ባ ዲዛሶን
 ዲዛሶን ማርቲላን ጌላና ማላ አዛዜስ” ጊዴስ። 31 ኢዚ ባ
 ዶሲዴዴ ባጋሪ ቢታ ቦላ ያሎቲላን ፐርዳና ጋላስ ባሪ ዋሊዴስ።
 ኢዛካ ሃይቆፔ ዴንሊዲ አሳ ኡባስ ሃይሳ ቲማቲላ ኤሪሲዴስ።

32 ኢስቲካ ሃይቂዳይታ ዴንላ ጊሽ ሲዩዳ ማላ ኢሲ ኢሲ
 አሳቲ ኢዛ ቂዲዳ፤ ባጋቲ ቃስ “ሃይሳ ቃሴካ ኔፔ ሃራ ጋላስ ሲያና

ኮኖሰ” ገዳ። ³³ ሄራካ ጳውሎሲ ኢስታ ገደፌ ኬዚ ቢደሰ።
³⁴ ኢሲ ኢሲ አሳቲ ቃሴ ጳውሎሳ ካሊዳኔ አማኒዳ፤ ሄይታፔካ
 ዲኖናሲኖሳ ጌቲቲዛ ኣሪኖሰፋጎሴ ዱላታ ኬፋ አባሌ ገዲዳ
 ዴማሪሶ ጌቲቲዛ ማጫሳያኔ ሃራቲካ ኢሲፌ ዴቲሰ።

18

ጳውሎሲ ቆሮንቶሴን

¹ ሃሳፌ ጉዬ ጳውሎሲ አቴናፔ ዴንዲዲ ቆሮንቶሴ ካታማ
 ቢደሰ። ² ሄንካ ጳንዖሳን ዬሌቲዳ አቁላ ጌቲቲዛ አይሁዳ አሰ
 ዴማዴሰ፤ ኢዚካ አይሁዳቲ ወሪ ኦሮማፔ ኬዛና ማላ ቃላዎዶሳ
 ጌቲቲዛ ኦሮማ ካዎይ አዛዚዳ ማላ ባ ማቼኖ ጸርሲቁላራ
 ማታ ዎዴ ኢፃሊያ ዴሬፔ ዪዳይሳ ቤያናሰ ጳውሎሲ ሄ ኢስታኮ
 ቢደሰ። ³ ኢዚካ ኢስታሶ ዱንካኔ ሲኪዛዴ ገዲዳ ገሽ ኢስታ
 አቻን ኡቲዲ ዱንካኔ ሲኮን ጌሊደሰ። ⁴ ሳምባታ ሳምባታ ጋላሰ
 አይሁዳታ ዎሳ ኬፋን አዩሁዴታራኔ ጌሪኬ አሳታራ ሃሳዬቲሼ
 ኢስታ አማንፋናሰ ባፄቲደሰ።

⁵ ሲላሲኔ ፃምቶሲ ማቂድኒያፔ ዱጌ ኢዛኮ ዎዲን ጳውሎሲ
 ሳባኮን ሚኒዲ ዬሱሲ ኢዚ ኪርሰቶሳ ገዲዳይሳ አይሁዳታሰ
 ማርካቲደሰ። ⁶ ገደ አቲን ኢሰቲ ኢዛራ ኤቄቲዲ ኢዛ ጫዪዳ
 ገሽ ጳውሎሲ ባ ማይዎ ቆቆፊዲ “ታ ኢንቴፌ ፂሎ፤ ኢንቴ
 ፒርዴታናይ ኢንቴ ሞሮን ገዲዳ ገሽ ታ ኢንቴ ሱፋ ጎሜን
 ኦይሼቲኬ፤ ሄሳ ገሽ ታ ጌዴ አይዛቤታኮ ባይሰ” ገደሰ።

⁷ ሄፔ ኬዚዲ ቲቶሳ ኢኖሰዎሳ ጌቲቲዛ ያሴ ዎሲዛይሳሶ
 ቢደሰ፤ ሄ አዴዛ ኬፋይ አይሁዳታ ዎሳ ኬፋ አቻን ደሰ።

⁸ አይሁዳታ ዎሳ ኬፋ ሃላቃይ ቄሪሰጸሲ ባሶ አሳ ኡባራ ጎዳ
 አማኒደሰ፤ ጳውሎሲ ዮቲሺን ሲዪዳ ዳሮ ቆሮንቶሴ ካታማ አሳይ
 አማኒዲ ፃማቄቲደሰ።

⁹ ጎዳይ ቃማን አጁታን ጳውሎሳ “ባቦፋ፤ ዮታ፤ ጮሁ ጎፓ፤
¹⁰ ታ ኔናራ ዳይሰ፤ ኦኒካ ኔ ቦላ ዴንዲ ኔና ቆሃናሰ ዳንዳዬና፤
 ሃኖ ሃ ካታማይን ታሰ ዳሮ አሲ ደሰ” ገደሰ።

¹¹ ሄሳ ገሽ ጳውሎሲ ያሳ ቃላ አሳ ታማርሲሼ ኢሲ ላይሊኔ
 ባጋ ኢስታራ ኡቲደሰ።

¹² ጋልኖሳ ጌቲቲዛ ዴሬ አይሲዛይሲ አካያን ዲዛ ዎዴ
 አይሁዳቲ ኢሲፌ ገዲዲ ጳውሎሳ ቦላ ዴንዲዳ፤ ፒርዳ ዎምቦራ
 ሲንፉ ሺሺዲ፤ ¹³ “ሃይሲ አዴዚ ዎጋፔ ካሬራ አሳይ ያሳሰ ጎይናና
 ማላ አሳ ባሌሌሰ” ገደ።

14 ጳውሎሲ ሃሳያና ቡሮ ዲና ዶዩሺን ጋልዮሲ አይሁዳታ “አንቴኖ አይሁዳ አሳቶ! አንቴ ሺሺዳ የጋይ ዴሬ ዴንፊሉ ዋይኮ ዴሬ ጌታ ሜቶን ዩጊዛ የጋ ጊዲዳኮ ታ ዋዝናፔ ሲያናሺን።
15 ጊዶ ኣቲን አንቴ ፓላማይ ኢሲ ኢሲ ቃላታ ጊሺኔ ኢሲ ኢሲ ሱንላታ ጊሽ ቃሴካ አንቴ ዋጋ ጊሻሰ ጊዲዳ ጊሽ አንቴ ሄን አንቴ ባጋራ ወርሲቲ፤ ታ ሄሳ ማላ የጋ ፒርዳናሰ ኮዪኬ” ጊዴሰ።
16 ሄሳ ጊሽ ፒርዳ ዋምቦራ ሲንላፌ ኢሰታ ኬሲዴሰ። 17 ሄ ዋዴ ወሪካ አይሁዳ ዋሳ ኬላ ሃላቃ ሶስቲኔሴ ጌቲቲዛይሳ ኦይኪዲ ፒርዳ ኬላ ሲንላን ቡኪዳ፤ ጋልዮሲ ጊዲኮ ሄሳ ወዳንካ ዩጊቤና።

ጲርሲቂላ ኣቂላኔ አጲሎሳ

18 ሄሳፌ ጉዬ ጳውሎሲ ቆርንቶሴ ካታማን ዳሮ ዋዴ ጋምዒዴሰ። ሄፔካ አማኒዛ አሳይ ሞይዚን ጲርሲቂላራኔ ኣቂላራ ኢሲፌ ማርካቤን ጌሊዲ ሶሪያ ጌቲቲዛሶ ቢዴሰ፤ አዲና ዲዛይሳ ጋላናሰ ኪንኪራዖሴ ጌቲቲዛሶን ባ ሁዒ ሜዴቲዴሰ።
** 19 ኤፌሶኔ ጋኪዳ ማላ ጲርሲቂላኔ ኣቂላ ሄን አጋጊዲ ጳውሎሲ አይሁዳታ ዋሳ ኬሌ ጌሊዲ አይሁዳታራ ሃሳይቲዴሰ።
20 ባናራ ጋምዒና ማላ ኢሰቲ ኦይቺን ኢዚ “ኣካይ” ጊዲ ኢዲዴሰ። 21 ጊዶ ኣቲን ኢዚ ኢሰታፌ ሻኬቲሼ “ዖሳ ሼኔ ጊዲኮ ታ ሲማዳ ያና” ጊዴሰ፤ ኤፌሶኔፔ ዴንዲዲ ማርካቤን ጌሊዲ ቢዴሰ።

22 ቂሳሪያ ጌቲቲዛሶ ጋኪዳፔ ጉዬ ኬዚዲ አማኒዛይታ ሳሮ ጊዲ ሄፔ ኣንዖኪያ ዋዲዴሰ። 23 ኣንዖኪያን ጉላ ዋዴ ታኪዳፔ ጉዬ ሄፔ ዴንዲዲ ጋላቲያ ባጋራኔ ፊርጊያ ጌቲቲዛ ዴሬታራ ዩይ ኣዲዲ አማንዛይታ ሚንፊሊዴሰ።

24 ሄ ዋዴ ኢሲ ኢሰኪንዲሪያ ካታማን ዩሌቲዳ አጲሎሳ ጌቲቲዛ ኢሲ አይሁዳ ኣሲ ኤፌሶኔ ዩዴሰ፤ ኢዚካ ታማሪዳዴኔ ጌሻ ማፃፋታ ሎዒሊ ኤሪዛዴ። 25 ኢዚ ጎዳ ኦጌ ታማሪዳዴኔ ዩሱሳ ጊሽ ባላይ ባይንዳ ሃሳዪዛዴኔ ዊሎ ኣያናን ፀጌቲሼ ታማርሲዛዴ፤ ጊዶ ኣቲን ኢዚ ሎዒሊ ኤሪዛይ ዮሃኒሳ ዊንቃቲ ፃላላ። 26 ኢዚካ አይሁዳ ዋሳ ኬላን ባቦንታ ዮቶ ኦይኪዴሰ፤ ጲርሲቂላይኔ ኣቂላይ ኢዚ ጊዛይሳ ሲይዲኔ ኢዛ ጌዴ ባሶ ኤፌዲ ያሳ ኦጌ ኢዛ ካሲፔ ሎዒሊ ኤሪሲዴ።

27 አጲሎሲ ጌዴ ኣካያ ባናሰ ኮዪን አማኒዛይቲ ኢዛ ሚንፊሊዳ፤ ሄን ዲዛ አማኒዛ አሳይካ ኢዛ ሞኪ ኤካና ማላ

* 18:18 አዲና ጊዛይሳ ኢሲ ኢሲ ባጋ ጋሞላ ቃላን “ታሳላ ዋይኮ ጋላታሰ እሚቲዛ እሞታ” ጌቲሰ። * 18:18 ታይ 6:18

ኢዛስ ዳብዳቤ ፃፊዳ፤ ኢዚ ሄ ጋኪዳ ማላ ኢዛስ ዲዛ ኢሞታፔ ዴንዲዳይሳን ኣማኒዛይታ ዳር ማዲዛዴ ጊዲዴስ። 28 ጌሻ ማፃፋታ ያይሳ ሃይሳራ ጋሊ ማርካሲ ማርካሲ ዬሱሲ ኢዚ ከርሰቶሳ ጊዲዳይሳ ኣይሁዳታራ ዳር ፓላሜቲዲ ዴሬ ሲንፋን ኢስታ ላሊዴስ።

19

ጳውሎሲ ኤፌሶን

1 ኣጲሎሲ ቆርንቶሴን ዲዛ ዋዴ ጳውሎሲ ፑዴሃ ባጋ ዴሬራ ካንሊዲ ኤፌሶኔ ዩዲ ሄን ዲዛ ኢሲ ኢሲ ኣማኒዛ ኣሳታ ዴሚዲ 2 “ኢንቴ ኣማኒዳ ዋዴ ዒሎ ኣያና ኤኪዴቲ?” ጊዴስ፤ ኢስቲካ “ኤኪቤይኮ ሃራይ ኣቶሺን ዒሎ ኣያናይ ዲዛኮኔ ኑ ሲቤይኮ” ጊዲ።

3 ጳውሎሲካ ኢስታ “ሂስቲን ኢንቴ ኣዛን ፃማቄቲዴቲ?” ጊዴስ፤ ኢስቲካ ኢዛስ “ዮሃኒሳ ዒንቃታን ፃማቄቲዴስ” ጊዲ።

4 ጳውሎሲካ ኢስታስ “ዮሃኒሳ ዒንቃታይ ጊዲኮ ኣሳይ ማርቴፋን ሲሚዳይሳ ቤሲዛ ዒንቃታኮ! ዮሃኒሲ ባ ባጋራ ኣሳይ ኢዛፔ ጉዬራ ዩዛ ዬሱሳ ኣማናና ማላ ዮቲዴስ” ጊዴስ። *

5 ኢስቲካ ሄሳ ሲዩዳፔ ጉዬ ጎዳ ዬሱሳ ሱንፋን ፃማቄቲዴ።

6 ጳውሎሲካ ኢስታ ቦላ ባ ኩሼ ዋሊዳ ማላ ዒሎ ኣያናይ ኢስታ ቦላ ዋዲን ኢስቲ ዲማ ዴሬታ ቃላራ ሃሳዩዳ፤ ቲንቢቴካ ዮቲዴ።

7 ሄ ኣሳቲ ዉሪካ ታማኔ ናሞዑ ጊዲዛይታ።

8 ጳውሎሲ ኣይሁዳታ ዋሳ ኬሌ ጌሊዲ ያሳ ካዋቴፋ ጊሽ ሃሳዬቲሼኔ ኢስታ ኣማንሊሼ ሄሹ ኣጊና ኩሜላ ኦናሰካ ባቦንታ ኣሳስ ቆንጨሲ ዮቲዴስ። 9 ኢሲ ኢሲ ኣሳይ ፓላማ ዒንዒ ጊዲ ኣማናናስ ኮይቤና፤ ጎዳ ኦጌ ቆንጨን ኢዒዳ፤ ሄሳ ጊሽ ጳውሎሲ ኢስታ ኣጊዲ ሃራሶ ቢዴስ፤ ኣማኒዛይታካ ዲማ ሻኪ ኬሲዲ ዒራኖሴ ቲሚርቴ ኬፋን ጋላስ ጋላስ ኢስታራ ሃሳዬቲዴስ። 10 ሄሳ ማላ ኦሶን ናሞዑ ላይላ ጋሞዒዳ ጊሽ ኢሲያ ኣዉራጃን ዲዛ ኣይሁዳቲኔ ጊሪኬ ኣሳይ ዉሪ ጎዳ ቃላ ሲያና ዲንዳዩዴስ።

11 ያሲ ጳውሎሳ ባጋራ ዳር ማላሊሲዛ ማላታ ኣሊዴስ።

12 ማራቤ ዋይኮ ኢዛ ኣሳቴላ ቦቺዳ ጫርቃ ኤፊዲ ሃርጋንቻታ ቦቺኮ ሃርጌይ ዬዴስ፤ ቱና ኣያናቲካ ባ ኦይኪዳ ኣሳፔ ኬዜቴስ።

13 ዩዩ ዩዩ ኣሳፔ ዳይዳንሊ ኬሲዛ ኢሲ ኢሲ ኣይሁዳ ኣሳቲ “ጳውሎሲ ሳባኪዛ ዬሱሳ ሱንፋን ኢንቴ ኬዛና ማላ ኣዛዛይስ”

* 19:4 ማቶ 3:11፤ ማር 1:4፣7፣8፤ ሉቃ 3:4፣16፤ ዮሃ 1:26-27

ጊዲ ጎዳ ሱንፋ ቱና አያናቲ ኦይኪዳ አሳታ ቦላ ያይጋና ፓጪዳ።
 14 ኢሲ አይሁዳታ፤ ጊዲዳ ቄሴታ ሃላቃ አስቁዌሰ አቱማ ና ላፑናቲ ሄሳሶ አሏዳ።

15 ቱና አያናይካ “ታ ዬሱሳካ ኤራይሰ፤ ጳውሎሳካ ኤራይሰ ሽን አንቲ ቃስ ኦናንቲ?” ጊዴሰ።

16 ቃሴካ ቱና አያናይ ኢዛ ኦይኪዳይይ ጉፒዲ አሳታ ኦይኪዴሰ፤ ኢሰታ ቦላ ዋልቃቲዲ ዳሮ ሚኒን ማዲንዲዲ ኬላፊ ሜላ ካሎ ባቃቲዳ። 17 ሄሲካ ኤፌሶን ዲዛ አይሁዳታ አቻኒኔ ገሪኬ አሳ ኡባ አቻን ኤሬቲን ወሪካ ባቢዳ፤ ሄሳንካ ጎዳ ዬሱሳ ሱንፋ ቦንቹቲዴሰ። 18 አማኒዳ አሳፔ ዳሮይ ሸቂዲ ባ ኢታ ኦሶ ቆንጩን ፓዲዴሰ። 19 ማሮ ማሮቲዛይታ፤ ዳሮቲ ባ ማሮቲዛ ማፃፋ ሸሺዲ ዴሬ ሲንፋን ታማን ፀጊዳ፤ ማፃፋ ዋጋይ ሸሺ ቆዲን ኢቻሹ ታሙ ሺ ቢራ ማላ ጊዲዴሰ። 20 ሃይሳ ማላን ጎዳ ቃላይ ኬሂ ዲጪሼኔ ያኒ ያኒ ቢዴሰ።

21 ሃይሲ ወሪ ሃኒዳፔ ጉዬ ጳውሎሲ ማቂዶኒያሪኔ አካያ ባጋራ አዲዲ ዬሩሳላሜ ባናስ ቆፋ ቃቹዲ “ታ ሄ ጋኪዳፔ ጉዬ ታ ኦሮሜ ቃሴካ ቤያና ኮሼሰ” ጊዴሰ። 22 ባና ማዲዛይታ፤ ናምባታ ዲምቶሳኔ ኤሪሰዳሳ ጌዴ ማቂዶኒያ ጌቲቲዛሶ ከቲዲ ባስ ኢሲያ አወራጃን ጉፋ ዋዴ ሄን ዴዲዴሰ።

ኤፌሶን ዴንዲዳ ሸር

23 ሄ ዋዴ ጎዳ ኦጌ ጊሽ ዳሮ ሸርይ ሜዴቲዴሰ። 24 ዲሜዲሮሳ ጌቲቲዛ ኢሲ ቢራ ቆዲዛይሲ አርፄሚሴ ጌቲቲዛ ኤቃ ሚሲሌ ቢራፔ ሴሪሰ ሜዲ ሜዲ ሂላንቻታስ ዋዴ ሚሼ ዴሚሴሰ።
 25 ኢዚካ ሄ ሂላንቻታን ሄሳ ማላ ኦሶን አቂዛይታ ሃራ አሳታ ኢሲ ቦላ ሸሺዲ “ኣሶ! ሃይሲ ኦሶዚ ኦስ ሚሽ ኬሲዛይሳ አንቲ ኤሬታ፤ 26 ሃይሲ ጳውሎሳ ጌቲቲዛይሲ ኤፌሶን ፃላ ጊዶንታ ኩሜላ ኢሲያ አወራጃን ዲዛ ዳሮ ዴሬዛ አማንፋ አማንፋ ባሌዛዛይሳ አንቲ ወሪካ ቤዩዛይሳ ማላኔ ሲዩዛይሳ ማላ ‘ኣሳ ኩሼን ኦሴቲዳ ኤቃቲ ሙሌካ ያሴ ጊዴቴና’ ጊ ዮቴሰ።
 27 ሃይሳ ኦ ኦሶዛሰ ሎዖ ሱንፋ ሂራይሲዛይሳፊ ቦላራ ኩሜላ ኢሲያይኔ ኩሜላ አላሜይ ጎይኒዛ ዋጋ አርፄሚሴ ኤቃ ኬላይካ ጎዳይ ባይንዳይሳ ጊዳና፤ ቃሴካ ኬሂ ቶቁ ጊዳ ኢዚ ቦንቹይካ ካወያና” ጊዴሰ።

28 አሳይ ሄሳ ሲይዲ ኢታ ሃንቆ ሃንቁቲዲ “ኤፌሶኔ አርፄሚሳ ዋጋ ጌታ!” ጊዲ ዋሶ ዶሚዴሰ። 29 ሄራካ ኩሜላ ካታማይ ሸርቲዴሰ፤ ዴሬይካ ወሪ ኢሲ ቦላ ጊዲዲ ማቂዶኒያ አሳ

ገዲዳይታኔ ጳውሎሳራ ኢሲፌ ዩዩዛ ኢዛ ላጌታ ጋዩዮሳኔ አሪሰደርኮሳ ኦይኪዲ ዴሬይ ካሴ ካዲዛሶ ዋላን ጌሊዳ።
 30 ጳውሎሲካ ካሬ ኬዚዲ አሳ ሲንሐ ሺቃና ኮዩን አማኒዛይቲ ዲጊዳ። 31 ሄ አውራጃ ዳናታፔ ኢሲ ኢሲ ጳውሎሳ ላጌቲ ጳውሎሲ አሳይ ካሴ ካዲዛሶ ፃሊዲ ጌሎንታ ማላ አሰ ኪቲዲ ዋሲዳ።

32 ሺቁዳ አሳይ ኡንዔቲዲ ኢሳዴይ ኢሲ ሚሽ ሃሳዩሺን ሃራይ ቃስ ሃራ ሃሳዩሲኔ አሳይ ወሪ ዋሴቲሰ፤ ዳሪዛ ባጋ አሳይ አዛሰ ሄን ሺቁዳኮኔ ኤሬና። 33 አይሁዳ አሳይ ኢሰኪንዲርሳ ጌቲቲዛይሳ ዴራ ጊዶፌ ሱጌሬሐ ጌዴ ሲንሐ ኬሲዳ ዋዴ ኢሲ ኢሲ አሳቲ ባ ጊሽ ኢዚ ሃሳያና ማላ ዋሲዳ፤ ኢዚካ ኢሰታ ጊሽ ፓላሜታና ኮይዲ አሳይ ጮቡ ጋና ማላ ማላቲ ቤሲዴሰ። 34 ጊዶ አቲን ኢዚ አይሁዳ አሰ ገዲዳይሳ ኤሪዳ ዋዴ ወሪካ ኢሲ ቦላ “ኤፌሶኔ አርዲሚሳ ዋጋ፤ ጌታ!” ጊሼ ናሞቡ ሳቲ ማላ አሳይ ዋሲዴሰ።

35 ሄ ካታማሰ ዋና ፃፊይ አሳ ጮቡ ሂሰቲዲ “ኢንቲኖ ኤፌሶኔ አሳቶ! ጌታ አርዲሚሲ ኤቃ ኬሳይኔ ሳሎፔ ዋዲዳ ኢዚ ሚሲሌ ናጊዛይ ኤፌሶኔ ካታማ አሳ ገዲዳይሳ ኤርንታይ ኦኔ? 36 ሄሳ ጊሽ ሃይሲ ሃ ቱማይ ካዴታና ዳንዳዬቶንታይሳ ማላ ኢንቲ ጉሊ ዩሺ ቆፓናሲኔ ሎዱ ጋናሰ ቤሰሰ። 37 ሃይታ አሳታ ያሳ ኬላ ቦንቆንታ ዋይኮ ኦ ያሴ ገዲዳይሳ ቦላ ጫሻ ቃላ ዴንሐንታ ዲሺን ኢንቲ ኦይኪዲ ሃ ጋላናሰ ጮ ኤሂዴታ።

38 “ሄሳ ጊሽ ዲሞዲርሰኔ ኢዛራ ዲዛ ቢራ ሴሪሲ ኦሊዛ ሂላንቻቲ ኦና ቦላካ ሞቲዛ ዮጋይ ዲኮ ፒርዳ ኬላይ ኢሰታሰ ዶያ ዴሰ፤ ዳናቲካ ዴቲሰ፤ ኮዩዳዴ ሞታናሰ ዳንዳዬሰ። 39 ሃይሳፌ ሃራ ጋናሰ ኢንቲ ኮይኮ ዋጋይ ዲዛ ሺቆሶን ቤዬቶ። 40 ሄሲ አቲኮ ሃቶ ሃኒዳ ሺርይ ኦና ሞቲሶንታ ማላ ሂርጊሴሰ፤ ሞቶሰ ጋሊዛ ጋሶይ ባይንዳ ጊሽ ሃ ሃኒዳ ሺርዛ ጊሽ ኦ ኦይሹቲኮ ጋናዚ ኦሰ ዴና” ጊዴሰ። 41 ኢዚ ሄሳ ጊዳፔ ጉዬ ሺቆይ ላሊቲዴሰ።

20

ጳውሎሲ ማቂዶኒያኔ ገሪኬ ቢዴሰ

1 አሳይ ጮቡ ጊዳፔ ጉዬ ጳውሎሲ አማኒዛይታ ኢሲ ቦላ ያይጊዲ ኢሰታ ሚንሐሊዛ ቃላራ ዘሪዳፔ ጉዬ ኢሰታ ሳርኪዲ ማቂዶኒያ ባና ኬዚዴሰ። 2 ኢዚ አዲ ቢዛ ዴሬን ዲዛ አማኒዛ አሳ ሎዔላ ዘሪን ሚንሐሊሽ ገሪኬ ዴሬ ቢዴሰ። 3 ገሪኬን ሄሹ አገና ታኪዳፔ ጉዬ ማርካቤራ ሶሪያ ጌቲቲዛ ዴሬ ባናሰ

ቆፒዴስ ሺን አይሁዳ አሳቲ ኢዛ ቦላ ኢታ ኦፋና ዘሬቲዳይሳ ኤሪዲ ማቂዶኒያ ባጋራ ባና ቆፋ ቃቺዴስ።

4 ቤሪያፔ ጳሪዮሳ ና ሶጳዊርሳ፣ ታሶሎንቄፌ አሪስዊርኮሳኔ ሲኮንዶሳ፣ ዳርቤኔፔ ጋዪዮሲኔ ዊምቶሲ ኢሲያፔ ዊርፊሞሲኔ ቲቂቆሲ ጳወሎሳራ ኢሲፌ ቢዳ። 5 ሄይቲ ወሪ ኦፔ ካሴቲዲ ዊርዓዳን ኦና ናጊዳ። 6 ኦ ቃሰ ኡኬፋ ባዓለፔ ጉዬ ፒሊጲሲዮሴፔ ማርካቤን ኢስቲ ዲዛሶ ዊርዓዳ ጌቲቲዛሶ ኢቻሻንፋ ጋላስ ጋኪዲ ሄን ላፑን ጋላስ ጋምዒዴስ።

ጳወሎሲ ወርሴፋን ዊርዓዳ ቤይዴስ

7 ሳሚንታፌ ኮይሮ ዋጋ ጋላስ ኢሲፌ ካሐ ማናስ ኦ ሺቂ ዲሺን ጳወሎሲ ዋንቶ ባናስ ኮሺዛ ጊሽ ሺቂዳ አሳስ ቃላ ዮቲሺን ኢዚ ዮዋዛ ሌላ ጊዶሐ ጋካናስ አዲሲዴስ። * 8 ቦላ ፎቄን ዳሮ ፖይይ ዲዛሶን ኦ ሺቂዴስ። 9 አወፃኪሴ ጌቲቲዛ ኢሲ ናቲፋ ናይ ማስኮቲ ቦላ ኡቲ ዲሺን ጳወሎሲ ዮዋዛ አዲሲዳይሳፌ ዴንዲዳይሳን ኢዛ ጴስኮይ ኤኪ ቢዴስ፤ ዋልቃማ ጴስኮን ያኔቲዲ ቦላ ሄቫንሶ ፎቄፔ ዱጌ ኩንዲን አሳይ ዴንፊዛ ዋዴ ሃይቂዲ ቤቲዴስ። 10 ጊዶ አቲን ጳወሎሲ ዱጌ ዋዴዲ ናዛ ቦላ ሆኪ ኢዲሚዲኔ “ሃይቂቤና ፓዖ ዴስ፣ ዳጋሞፍቴ!” ጊዴስ። 11 ጳወሎሲ ሄሳፌ ፑዴ ፎቄ ኬዚዲ ኡኬፋ ሜንፊዲ አማኒዛይታራ ሚዴስ፤ ጋዴይ ዋንታና ጋካናስ አሳታራ ሃሳዬቲሺ ጋምዒዲ ቢዴስ። 12 አሳይካ ሃይቆፔ ፓዊዳ ናዛ ጌዴ ኢዛሶ ኤፊዲ ወሪካ ኡፋዬቲዴስ።

ጳወሎሲ ዊርዓዳፌ ሚሊዲኔ ጌቲቲዛሶ ቢዴስ

13 ኦ ጳወሎሳ ማርካቤን ጌልፋና ኮይዳ ጊሽ ካሴቲዲ ማርካቤን አሶሳ ጌቲቲዛሶ ቢዴስ፤ ኦ ሄሳ አሊዳይ ጳወሎሲ አሶሳ ጋካናስ ቶሆራ ባና ኮይዳ ጊሻሲኔ ኦ ጌዴ ሲንሐ ባና ማላ ኢዚ አዛዚዳ ጊሻሳ። 14 ኦ ኢዛራ አሶሳን ጋጊዲ ኢዚ ማርካቤን ጌሊን ኢዛራ ኢሲፌ ሚዲሊኔ ቢዴስ። 15 ዋንቲፋ ጋላስ ሄፔ ዴንዲዲ ሲንፋራ ዲዛ ኪዖሴ ጌቲቲዛሶ ጋኪዴስ፤ ቃሴ ዋንቲፋ ጋላስ ሳሞሴ ጌቲቲዛሶ ፒኒዲ ሄፔ ዋንቲፋ ጋላስ ሚሊዳ ጋኪዴስ። 16 ጴንፃቆስቲ ጌቲቲዛ አይሁዳታ ፓዚጋ ባዓሌ ባስ ዳንዳዬቲዳ ማላ ቦንቻና ዬሩሳላሜን ቤታና ኮይዲ ኢዚ ኢሲያን ዋዴይ አጼንታ ዲሺን ኤፌሶኔ አጼ ባናስ ኮይዴስ። ኢሲያን ኢዛስ ዋዴይ አጼንታ ማላ ኤፌሶኔ ዬጊ አፋና ኮይዴስ።

* 20:7 “ሳሚንታፌ ኮይሮ ጋላሳን” ቄራ ኦማርስ ዋጋይ ዋንታናዉ ጉሳ።

ኢዚ ሄሳሉ ኦፋና ኮዪዳይ ጳንፃቆስቴ ባዓሌስ ዬሩሳሌምን ቤታናስ ኮይዳ ገሻሳ።

ጳውሎሲ ኤፌሶን ዋሳ ኬላ ጨማታራ ወርሴላ ሞይዞ ሳርካ ሳርኬቲዴስ

17 ጳውሎሲ ሚሊፃፔ ኤፌሶን ዋሳ ኬላ ጨማታ ኣሴ ከቲዲ ያይጊሲዴስ። 18 ኢስቲካ ዪን ጳውሎሲ ኢስታ “ታ ኢሲያ ጌሊዳ ጋላሳፌ ሃ ሲሚን ኡባ ዋዴ ታ ኢንቴናራ ዋና ዋና ዴዒዳኮን ኢንቴ ኤሬታ። 19 ኣይሁዳቲ ታ ቦላ ኣሳ ዴንሲዲ ሂሊዳ ጌዶን ዳሮ ሜቶይ ታ ቦላ ጋኪኮካ ታ ኩሜላ ኣሽኬቴላራን ኣፋንላራ ጎዳስ ኦላዲስ። ጮ ዴንባንካ ኢንቴ ኢንቴሶን ታ ኢንቴና ታማርሳሼ ጎዒዛይሳ ወርሳ ኢንቴስ ዮታዲስ ኣቲን ኢንቴና ጎዒዛ ሚሻፌ ኣይኮካ ኣሻቤኬ። 20-21 ኣይሁዳ ኣሳታ ጊዲንካ ጊሪኬ ኣሳ ጊዲንካ ማርቲላን ጌሊዲ ያሳኮ ሲማና ማላኔ ጎዳ ዬሱሳን ኣማናና ማላ ሎዔላ ዮታዲስ።

22 “ሃዒካ ታ ሄ ጋኪሺን ታ ቦላ ኣዚ ጋካናኮን ኤሪኬሺን ያሎ ኣያናይ ታና ኣዛዚዳ ማላ ዬሩሳሌም ባይስ። 23 ሄን ዲማ ዲማ ታና ቃሽይኔ ሜቶይ ናጊዛይሳ ያሎ ኣያናይ ታስ ዮቲዴስ። 24 ጊዶ ኣቲን ጎዳ ዬሱሲ ታስ ኢሚዳ ዋላ ዋፃ ወርሳና ጋካናሲኔ ኦሶ ታ ፖላና ጋካናስ ታኒ ታ ሼምፖስ ሚሼቴኬ፤ ታስ ኢሜቲዳ ኦሶይካ ያሳ ሚሺራቾ ቃላ ዮቶኮ። *

25 “ሃዒ ጋካናስ ታ ኢንቴ ጊዶን ሲሜሬታሼ ያሳ ካዋቴላ ሳባካዲስ፤ ሲማ ሃይሳፌ ጉዬ ኢንቴፌ ኦኒካ ሙሌ ታ ኣይፌሶ ቤዮንታይሳ ታ ኤራይስ። 26 ሄሳ ጊሽ ኢንቴፌ ኢሳዴይካ ጳይኮ ታ ኦይሼቶንታይሳ ሃቶ ታ ኢንቴና ኤሪሳይስ። 27 ኣይሲ ጊኮ ታ ያሳ ቆፋ ወርሳ ኢንቴስ ዮታዲስ ኣቲን ኣይኮካ ታ ዮቶንታ ኣሺዳይሲ ዴና። 28 ያሎ ኣያናይ ኢንቴና ያሳ ዶርሳታ ሄማናስ ሹሚዴስ፤ ሄሳ ጊሽ ኢንቴ ሁዔሲኔ ያሳ ዶርሳታስ ናጌቴቴ፤ ጎዳይ ባ ሱላን ዋዚዳ ዋሳ ኬላዮ ናጌቴ። 29 ታ ቢዳፔ ጉዬ ያሳ ዶርሳታስ ሚቼቶንታ ኢታ ኣሳቲ ኢንቴ ጋርስ ጌላናይሳ ታ ኤራይስ። 30 ሄሳላካ ኢሲ ኢሲ ኣሳቲ ኢንቴ ጊዶፌ ዴንዲዲ ጌላ ዮፆ ኢንቴና ታማርሲዲ ኣማኒዛ ኣሳፔ ዳሮታ ጌዴ ባኮ ዛራና። 31 ሄሳ ጊሽ ኢንቴና ኢሳ ኢሳ ሄሹ ላይላ ቃማኔ ጋላስ ኣፋንፃ ዞሪዳይሳ ዩሺ ቆፒቴኔ ናጌቴቴ።

32 “ሃዒካ ኢንቴና ያሳስ ሚንሲ ኤሳናሲኔ ኣማኒዛይታ ጊዶን ኢንቴስ ላታሶ ኢማናስ ዴንዳዪዛ ኢዛ ኣቶ ኪያቴላ ቃላስ ታ ሃዳራ

* 20:24 2፻፵ 4:7

አማዲስ። 33 ታ ኦና ቢራካ ዋርቃ ዋይኮ ማይያ አሞታቤኬ። 34 ታ ታ ኩሼን አላ አላዳ ታስ ማዳታዳ ታናራ ዲዛዪታካ ማዲዲይሳ አንቴካ ኤሬታ። 35 ‘ሃ ኤኪዛዴፌ ጌዴ አሚዛዴይ አንጃቲዳዴ’ ጊዛ ጎዳ ዩሱሳ ቃላ ኑ ዩሺ ቆፒዲ ኑርካ ኑ ኩሼራ ኑ ኦሊ ዴሚዲ ሃራ ዳቡራንቻታ ጌዴ ማዳናስ ኑስ ቤሲዛይሳ ታ አንቴና ዳሮ ዴማ ዴማ ኦጌራ ቤሳዲስ” ጊዴስ።

36 ሄሳፌ ጉዬ ጳውሎሲ ኡባ አሳራ ጉልባቲዲ ዋሲዴስ።
37 አሳይ ወሪ ዩኪዲ ጳውሎሳ አዲሚ ኦይኪዲ ዩሪዴስ።
38 ሃራፔካ ኢስቲ ዳሮ ሚሼቲዳይ ኢዚ “ሃይሳፌ ጉዬን አንቴ ናሞዓንሉ ታና ቤዬኬታ” ጊዳ ጊሻሳ፤ ሄፔካ ኢዛ ማርካቤኮ ጋካናስ ሞይዚዳ።

21

ጳውሎሲ ዩሩሳላሚ ቢዴስ

1 ኑ አስታፌ ሻኬቲዲኔ ማርካቤን ጌሊዲ ሰቲ ጊዲ ቆሴ ጌቲቲዛ አባ ጊዶን ዲዛ ዴሬ ቢዶስ፤ ዋንቲላ ጋላስ ሃራ ኤርዶሴ ጌቲቲዛ አባ ጊዶን ዲዛ ዴሬ ጋኪዶስ። ሄፔካ ኢሲ ጳዲራ ጌቲቲዛ ካታማ ቢዶስ። 2 ሄን ጌዴ ፒንቄ ጌቲቲዛሶ ቢዛ ማርካቤ ዲዛሮ ዴሚዲኔ ኢዚን ጌሊዲ ቢዶስ። 3 አባ ጊዶን ዲዛ ቆጶሮሴ ጌቲቲዛ ዴሬፔ ሃዲርሳ ባጋን ዩጊዲ ሶሪያ ጌቲቲዛ ዴሬ ቢዲ ዓርሴ ጌቲቲዛ አባ አቻን ዲዛ ዴሬ ቢዶስ፤ ሄሳስ ጋሶይ ማርካቤያ ባ ጫኔቲዳ ጫና ሄን ዋላናስ ኮሺዛ ጊሻሳ። 4 ሄን አማንዛይታ ኮዩ ዴሚዲ ኢስታራ ላፑን ጋላስ ጋሞዲዶስ፤ ኢስቲካ ዒሎ አያና ካሌሉን ጳውሎሳ “ዩሩሳላሚ ቦፓ” ጊዲ ዮቲዳ። 5 ኑ ሄን ጋሞዳና ዋይይ ወሪን ኢስታፌ ሻኬቲዲ ኑ ኦጌ ቢዶስ። ኢስቲ ወሪ ባ ማቼታራኔ ባ ናይታራ ኢሲፌ ካታማፔ ካሬ ከዛና ጋካናስ ኑና ሞዩዚዳ፤ አባ አቻን ኑ ወሪ ጉልባቲዲ ዋሲዳፔ ጉዬ ዴንዲዲ ኢሶይ አሳራ ሳርኬቲዲ ሻኬቲዶስ። 6 ሄሳፌ ጉዬ ኑ ማርካቤን ጌሊን ኢስቲ ጌዴ ባሶ ሲሚዳ።

7 ኑ ዓርሴፔ ዴንዲዲ ጌዴ ጲዒላማይሴ ጌቲቲዛሶ ጋኪዶስ። ሄንካ አማኒዛ አሳራ ጋጊዲ ሳርኬቲዲ ሄን ኢስታ አቻን ኢሲ ጋላስ ጋሞዲዶስ። 8 ዋንቲላ ጋላስ ሄፔ ከዚዲ ቁሳሪያ ጌቲቲዛሶ ቢዶስ፤ ቁሳሪያን ላፑን ዳቆኔታፔ ኢሳ ዋንጌላዌ ጲልጶሳሶ

ጌሊዲ ኢዛ አቻን ሽምፒዶስ። * 9 ኢዛስ ናቤ ጊዲዳ ኦይዱ ጌሎንታ ጌላዖ ናይቲ ዳቲስ።

10 ዳሮ ጋላስ ኑ ሄን ጋምቢን ኢሲ አጋቦሳ ጌቲቲዛ ናቤይ ዩሁዳ ዳሬፔ ዩዳስ። 11 ሄ ናቤይ ኩኮ ሸቂዲኔ ጳውሎሳ ዳንጮ ኤኪዲ ባ ቶሆኔ ባ ኩሼ ቃቺዲ “ዊሎ አያናይ ሃይሳ ዳንጫ ጎዳ ዩሩሳላሜን ዲዛ አይሁዳ አሳቲ ሃይሳሶ ቃቺዲ አይዛቤታስ አሏ ኢማና ጌስ” ጌዳስ።

12 ሄሳ ሲይዲ ኑካ ኑናራ ዲዛ አሳይካ ጳውሎሲ ዩሩሳላሜ ቦንታ ማላ ዋሲዶስ። 13 ቃስ ጳውሎሲ “ኢንቲ አይሲ ዩኪ ዩኪዲ ታ ዋዝና አዛስ ሜንጮቲ? ታኒ ጎዳ ዩሱሳ ሱንላ ጊሽ ዩሩሳላሜን ቃሾ ፃላላ ጊዶንታ ሃይቃናስካ ጊቤታዲስ” ጌዳስ።

14 ኢዚ ኑ ዘሬ ኤኮንታ ኢዲን “ሂስቲኮ ጎዳ ሸኔይ ሃኖ” ጊዲ አጋጊዶስ።

15 ኑ ሄን ጉላ ጋላሳታ ጋምቢዳፔ ጉዬ ኑ ሚሽ ወርሲ ገገሲዲ ኤኪ ዩሩሳላሜ ቢዶስ። 16 ቂሳሪያን ዲዛ ኢሲ ኢሲ አማንዛይቲ ኑናራ ኢሲፌ ዩዳ፤ ኢስቲካ ኑኒ ሚናሶኔ ኬላን ዳና ማላ ኑና ኢዛስ ካሌሊዳ፤ ሚናሶኒ ካሌቲዲ አማኒዳ ቆጸርሴ ዳሬ አሳ።

ጳውሎሲ ዩሩሳላሜን ያቆቤ ቤዩዳስ

17 ኑ ዩሩሳላሜ ጋኪዳ ማላ አማንዛይቲ ኑና ኡፋይሳን ሞኪ ኤኪዲ። 18 ዋንቴላ ጋላስ ጳውሎሲ ኑናራ ያቆቤኮ ቢዳስ፤ ሄ ዋዴ ዋሳ ኬላ ጨማቲ ሄን ዳቲስ። 19 ጳውሎሲ አሳ ወርሲ ሳርሊዳፔ ጉዬ ያሲ ኢዛ ባጋራ አይዛቤታ ጊዶን ኦሊዳይሳ ወርሲ ኢሲኖ አሾንታ ዮቲዳስ።

20 ሄሳ ሲይዲ አሳይ ወሪ ያሴ ጋላቲዳስ፤ ጳውሎሲካ “ኑ አሻዞ ዳሮ ሺያን ቆዴቲዛ አማኒዛይቲ አይሁዳታ ጊዶን ዲዛይሳኔ ወሪካ ሙሴ ዋጋ ዋዝናፔ ናጊዛይታ ጊዲዳይሳ ኔካ ኤራሳ።

21 ኔኒ አይዛቤታ ጊዶን ዲዛ አይሁዳታ “ኢንቲ ናይታ ቃፃሮፔቲ ዋይኮ ዋጋታ አሶፍቲ ጋዳ ኔ ታማርሲዳ አሳይ ሙሴ ዋጋ ሻራና ማላ አሌስ ጊዛ ዋሬ አሳይ ሲይዳስ። 22 ሂስቲን ሃቢ አዜ ሎዖይ? ሃቢ ኔ ዩሳ አሳይ ሲዮንታ አገና። 23 ሄሳ ጊሽ ኑ ኔና ጊዛይሳ አላ፤ ኑ አቻን ታሳላ ጋላና ዩዳ ኦይዱ አሳቲ ዳቲስ።

* 24 ኔ ኢስታ ኔናራ ኤካዳ ኢስታራ ጊዳዳ ኔና ጌሻ፤ አሳቲ ባ ሁዔ ሜዴታና ማላኔ ያሳ ኬላን ኢሜቲዛ ሙጮታ ሚሻ ኔ ኢስታስ ቃንፃ፤ ኔ ሄሳሶ ኦሊኮ ኔ ቦላ ዋሬቲዳይሲ ወሪ ሜላ ጊዲዳይሳኔ ኔካ ሙሴ ዋጋ ፖላ ናጊዛዴ ጊዲዳይሳ አሳይ ወሪ

* 21:8 ሃዋ 6:5፤ 8:5 * 21:23 ታይ 6:13-21

ኤራና። 25 ሂንኮ አይዛቤታ፤ አማኒዳይታ ጊሽ ጊዲኮ ‘ኤቃሰ ሹኬቲዲ ቱኒዳይሳ ሞፒቴ፤ ሱሊካ ኡዮፒቴ፤ ባወታ ሃይቂዳ ሜሄ አሾ ሞፒቴ፤ ላይማፌ ሃኪቴ’ ጊዲ ጨማቲ ቃቺዳ ቃላ ዳብዳቤ ፃፊዲ ኑ ኢሰታሰ ዩዲደሰ።” *

26 ሄሳፌ ጉዬ ጳውሎሲ ሄ ኦይዱ አሳታ ባናራ ኤኪዲ ዋንቴላ ጋላሰ ኢሰታራ ባና ጌሺዳሰ፤ ኢሰቲ ጌዪዛ ጋላሳቲ አፑን ጋላሲኮኔ ኢሳዳ ኢሳዳ ጊሽ ኢሜቲዛ ሚሽ ኢሚዛ ዋዴይ አይዴኮኔ ኤሪሳናሰ ያሳ ኬሌ ጌሊዳሰ።

ጳውሎሲ ያሳ ኬላን ዲሺ ኦይኬቲዳሰ

27 ላፑን ጋላሰ ኩማና ማቲሺን ኢሲያ ዴሬፔ ዪዳ አይሁዳ አሳይ ጳውሎሳ ያሳ ኬላን ቤዪዲ ዴራ ኢዛ ቦላ ዴንፊሊዲ ኢዛ ኦይኪዳ። 28 “ኢሰራዔል አሳቶ! ኑና ማዲቲ! ኑ አሳኔ ኑ ዋጋ ሃይሳ ኑ ዲዛሶዛ ጫዪኔ ዴሬይ ዲዛሶን ኡባን አሳ ታማርሲዛይሲ ሃይሲ ኢዛኮ! ሄሲካ ጊዴና ጊዲ አይዛቤታ ያሳ ኬሌ ጌልሊዲ ሃይሳ ጌሻ ሶዛ ቱኒሲዳሰ” ጊሽ ዋሲዳ። 29 ኢሰቲ ሄሳ ጊዳ ጋሶይ ሃይሳፌ ካሴ ኤፌሶኔ ዩሌታ ጊዲዳ ዒርፊሞሳ ኢዛራ ኢሲፌ ካታማ ጊደን ቤዪዳ ጊሽ ኢዛ ጳውሎሲ ያሳ ኬሌ ኤኪ ጌሊዳ ሚሳቲዳ ጊሻሳ። *

30 ኩሜላ ካታማይ ባ ጊደን ሺርቲዳሰ፤ ዴሬይ ወሪ ኢሲፌ ዋዒ ኮይዲ ጳውሎሳ ኦይኪ ኤኪዲ ያሳ ኬላ ጊቤፌ ጎሹቺ ኬሲዳሰ፤ ያሳ ኬላ ፔንጌቲ ሄራካ ጎርዴቲዳ። 31 አሳይ ጳውሎሳ ዋዳና ኮዪሺን “ዩራሳላሜ ዲዛ ኩሜላ ዴሬይ ባ ጊደን ሺርቲዳሰ” ጊዛ ኪታይ ኦርሜ ዋታዳራታ አዛዚዛይሳኮ ጋኪዳሰ። 32 ሄሳ ጊሽ ኢዚ ዋታዳራታኔ ማቶ ሃላቃታ ካሌሊዲ ኤሶን ዋዒሺ አሳይ ዲዛሶ ቢዳሰ፤ አሳይ ኦላንቻታ አዛዚዛይሳ ቤዪዲ ጳውሎሳ ቡካ አጊዳ።

33 ማቶ ሃላቃዚ ኢዛኮ ሸቂዲ ጳውሎሳ ኦይኪዲ ናሞቡ ሳንሳላታን ቃሼታና ማላ አዛዚዲ ኢዚ ኦናኮኔ አይ ኦሊዳኮኔ ኤራናሰ ኢዛ ኦይቺዳሰ። 34 ዴሬይካ ባ ጊደን ባጋይ ሄሳ፤ ባጋይ ሃይሳ ጊዳሰ፤ ማቶ ሃላቃዚ ዴሬዛ ዋሶፔ ዴንዲዳይሳን ቱማይ አዋይሳኮኔ ኤራናሰ ዳንዳዬቶንታ ኢዒን ጳውሎሳ ጌዴ ዋታዳራቲ ዲዛሶ ኤፋና ማላ አዛዚዳሰ። 35 ጳውሎሲ ፑዴ ቶቃሶ ጋኪሺን ዴሬይ ዳሮ ሃንቆን ኢዛ ቦላ ሜቶ ጋላናሰ ኮይዳ ጊሽ ዋታዳራቲ

* 21:25 ሃዋ 15:29 * 21:29 ሃዋ 20:4

ኢዛ ሃሼን ቶኪ ኤፊዳ። 36 ዳሬይካ “ኢዚ ሃይቆ! ሃይቆ” ጊ ዋሲሼ ኢዛ ካሊዳስ።

ጳውሎሲ ባና አሻና ማዲዛ የጾ የቲዳስ

37 ዋታዳራቲ ጳውሎሳ ባ ዲዛሶ ጌልላና ማቲሺን ጳውሎሲ ዋታዳራታ ኣዛዚዛይሳ “ታ ኔስ ኢሲ ሚሽ የታና ማላ ደሳይ?” ጊዳስ። ማቶ ሃላቃዚካ “ኔ ጌሪኬ ቃላ ኤራይ?” 38 ሂስቲን ሃሊ ማታ ዳሬ ጊደን ማቶ ዳንፊሊዳ ሸምፖ ዋጂዳ ኦይዱ ሺ ኣሳ ኤካዳ ባዞ ባቃቲዳ ጊብፄ ኣዳዚ ኔና ዲኪ?” ጊዳስ።

39 ጳውሎሲካ “ታኒ ኪልቂያ ጊደን ዳር ኤሬቲዳ ፃርሴሴ ካታማን ዩሌቲዳ ኣይሁዳ ኣሳ፤ ሃይሳ ኣሳስ ታና የቻርኪ” ጊዳስ።

40 ኢዚ ሃሳያና ማላ ኤር ጊን ጳውሎሲ ጶቃሶን ኤቂዲ ኣሳይ ጮቡ ጋና ማላ ባ ኩሼራ ማላቲዳስ፤ ኣሳይ ጮቡ ጊን ኢስራዔሌታ ቃላራ፤

22

1 “ታ ኢሻቶ! ታ ኣዋቶ! ታ ቦላ ዋርዶ ዋሊዳይሳስ ታ ኢንቴስ ኢሚዛ ዛር ሲዩቲ!” 2 ኢዚ ኣይሁዳታ ቃላራ ሃሳዩሺን ሲይዲ ካሴፔ ኣሳይ ጮቡ ጊዳስ፤ ጳውሎሲካ ሃሳያ ጉጂዲ ሂዝጊዳስ።

3 “ታኒ ኪልቂያ ጊደን ዲዛ ፃርሴሴ ካታማን ዩሌቲዳ ኣይሁዳ ኣሳ፤ ታኒ ዲጪዳይ ጊዲኮ ሃኒን ዩሩሳላሜና፤ ታ ኑ ኣዋቶ ዋጋ ወርሳ ጋማልያሌፔ ሎዔላ ታማራዲሴኔ ኢንቴ ሃቕ ኦሊዛይሳሶ ያሳስ ሱሬ ዋዝናፔ ኦሳሼ ዳዒዲስ። * 4 ሃይሳ ሃ ኦጌዛ ካሊዛ ኣሳታ ኡባ ዋጃና ጋካናስ ጎዳሊዛ ኣሳኮሺን፤ ማጫታኔ ኣዳታ ቃቻ ቃቻ ቃሾ ኬሌ ዩዲዛዳኮሺን። 5 ሃይሲ ዉሪ ቱሙ ጊዲዳይሳ ቄሴታ ሃላቃቲኔ ዳሬ ጨማቲካ ዉሪ ታስ ማርካታና፤ ሃራይ ኣቶሺን ዳማስቆን ዲዛ ኣማኒዛ ኣሳ ቃቻ ዩሩሳላሜ ኤሃዳ ቃፃይሳናስ ዳማስቆን ዲዛይታስ ፃፊቲዳ ዳብዳቤ ቄሴታ ሃላቃታፔኔ ዳሬ ጨማታፔ ኤካዲስ።

ጳውሎሲ ኪርስቶሳ ዋስቲ ኣማኒዳኮ የቲዳስ

(ሃዋ 9:1-19፤ 26:12-18)

6 “ታኒ ዳማስቆ ቢሺኒኔ ካታማ ጌላና ማቲሺን ሴታ ጋላስ ታ ቆፖንታ ዲሺን ሳሎፔ ዋልቃማ ፖፖይ ታና ዩይ ኣጂ ፖዒዳስ። 7 ሄ ዋዴ ታኒ ቢታ ቦላ ኩንዳዳ ሳዉሌ! ሳዉሌ! ኔ ታና ኣዛስ

* 22:3 ሃዋ 5:34-39

ጎዳይ? ጊዛ ቃላ ሲያዲሰ። 8 ታካ ‘ጎዶ ኔ ኦኔ?’ ጋዲሰ፤ ኢዚካ ‘ታ ኔኒ ጎዲዛ ናዚሬቲ ዬሱሳ’ ጊዴሰ። 9 ታናራ ኢሲፌ ዲዛ ኣሳቲ ፖዞዛ ቤዪዳ ኣቲን ኢዚ ታናራ ሃሳዪሺን ቃላ ሲይቤቲና። 10 ታካ ‘ጎዶ ታ ኣይ ኦዶ?’ ጋዲሰ። ጎዳይካ ‘ዴንዳዳ ዳማሰቆ ባ፡ ኔ ኦፋናይሳ ኢሰቲ ኔሰ ሄን ዮታና’ ጊዴሰ። 11 ፖዞዛ ያልቄቲላ ዳርፔ ዴንዲዳይሳን ታ ያላናሰ ዳንዳያቤኬ፤ ታናራ ዲዛ ኣሳቲ ታ ኩሼ ኦይኪ ጎቹዲ ታና ዳማሰቆ ጋሊዳ።

12 ሃናኒያ ጌቲቲዛ ኢሳዴይ ሄን ዴሰ፤ ሃናኒያይ ዳማሰቆን ዲዛ ኣይሁዳታ ኣቻን ዳር ጋላቲቲዳይሳኔ ዋጋ ቦንቹዛ ኣሳ። 13 ኢዚ ታ ኣቶ ሸቄ ኤቁዲ ‘ታ ኣሻ ሳዉሌ ኔ ኣይፌይ ቃሴካ ያሎ’ ጊዴሰ፤ ሄራካ ታ ኣይፌይ ኢዛ ያሊዴሰ። 14 ኢዚካ ታና ‘ኑ ኣዋንታ ያሲ ኔ ኢዛ ሼኔ ኤራና ማላ፤ ኢዛ ያሎዛ ኔ ቤያና ማላኔ ኢዚ ጊዛይሳ ኔ ሲያና ማላ ኔና ካሴቲ ዶሪዴሰ። 15 ኢዚ ሄሳ ኦሊዳይ ኔ ቤዪዳይሳኔ ሲዪዳይሳ ኣሳ ኡባ ሲንፋን ኢዛሰ ኔ ማርካታናሳ። 16 ሂሰቲን ሃዒ ኣዛሰ ጋምዓይ? ዴንዳዳ ኢዛ ሰንሰ ያይጋዳ ፃማቄታ፤ ኔ ናጋራፔካ ሜጤታ’ ጊዴሰ። 17 ሄሳፌ ጉዬ ታ ዬሩሳላሜ ሲማዳ ያሳ ኬፋን ዋሲሺን ኣጂታይ ታሰ ቤቲዴሰ። 18 ጎዳይካ ታሰ ቆንጪዲ ‘ኔ ታ ጊሽ ኢማና ማርካቲላ ኢሰቲ ኤኮንታ ጊሽ ኔ ጋምዖንታ ዳሼ ዬሩሳላሜፔ ኤሌላ ኬዛ!’ ጊዴሰ። 19 ታካ ኢዛሰ ‘ጎዶ ታ ኣይሁዳታ ዋሳ ኬፋቲ ዲዛሶ ባዳ ኔና ኣማኒዛይታ ኡባ ቃቻዳ ኢሰታ ቡኪዳይሳ ባ ባጋራ ኢሰቲካ ኤሬቲሰ። 20 ኔ ጊሽ ማርካቲዛ ኢሰቲፋናሴ ኣሳይ ዋጂዛ ዋዴ ታካ ሄ ዋጂዛ ኣሳታ ኣቻን ኤቃዳ ኢሰቲ ዋጂዛይሳ ታካ ዶሳዲሴኔ ዋጂዛይታ ማይዖካ ናጋዲሰ’ ጊዴሰ። * 21 ጎዳይካ ‘ሃሆን ዲዛ ኣይዛቤታኮ ታ ኔና ኪቲዛ ጊሽ ዴንዳዳ ባ!’ ጊዴሰ።

ጳውሎሲ ኦርሜ ዴሬ ኣሰ ጊዲዳይሳ ቆንጪሲዴሰ

22 ኣሳይ ሂኖ ጋካናሰ ጳውሎሳ ሃሳያ ዋዝናፔ ሎዔሊ ሲዪሼ ኣጊዲ ባ ቃላ ጵቁ ሂሰቲዲ “ሃይሳ ማላ ኣሲ ኑ ቢታፌ ጳዮ፤ ሃይሳ ማላ ኣሲ ኑ ቢታን ሼምፖራ ዳናሰ ቤሴና” ጊሼ ዋሲዴሰ። 23 ኣሳይ ዋሲሼ ባ ማይዖ ቃሪ ቃሪ ወፂሼኔ ቢታ ፑዴ ሳሎ ጳርጪዴሰ። 24 ማቶ ሃላቃዚ ሄሳ ቤዪዲ ጳውሎሳ ዋታዳራቲ ዲዛሶ ጌልፋና ማላ ኣዛዚዴሰ፤ ዴሬይካ ኢዛ ቦላ ኣዛሰ ሄሳ ማላ ዋሲዛኮ ኤራና ማላ ኢዛ ጋራፊዲ ፓዲሳና ማላ ኣዛዚዴሰ። 25 ጊዶ ኣቲን ዳፎን ዋዲ ቃቹዲ ኢዛ ጋራፋና ጊጌቲሺን ጳውሎሲ ባ ኣቻን ኤቁዳ ኢሲ ማቶ ሃላቃሰ “ኦርሜ ኣሰ ፒርዳይ ባይንዳ

* 22:20 ሃዋ 7:58

ጋራፋናስ እንቴስ ፊቃዴይ ዲዜ?” ጌዴስ። ²⁶ ማቶ ሃላቃይ ሄሳ ሲዪዳ ማላ ጌዴ ሃላቃታ አዛዚዛይሳኮ ቢዲ “አይ ኦፋና ጋይ? ሃይሲ አዴዚ ኦሮሜ አሳኮ!” ጌዴስ። ²⁷ ሄሳ ገሽ ሃላቃታ አዛዚዛይሲ ጳውሎሳኮ ሸቂዲ “እኔ ታስ ዮታ፥ ኔ ኦሮሜ አሴ?” ጌዴስ፤ እዚካ “ኤ ታ ኦሮሜ አሳ” ጌዴስ። ²⁸ አዛዚዛይሲካ “ታ ኦሮሜ አሳ ጌዳናስ ዳሮ ሚሼ ቃንፃዳ ሻማዲስ” ጌን ጳውሎሲ “ታኒ ጌዲኮ ኦሮሜን ዬሌታዲስ” ጌዴስ። ²⁹ ሄሳ ገሽ እዚ ማራማራናስ ጊጌቲዳ አሳቲ ሄራካ እዛ አቻፌ ሃኪዳ፤ አዛዚዛይሲካ እዚ ኦሮሜ አስ ሳንሳላታን ቃቺዳይሳ ዩሽ ቆፒዲ ባቢዴስ።

ጳውሎሲ አይሁዳታ ዱላታ ሲንል ሸቂዴስ

³⁰ ዋንቴላ ጋላስ አዛዚዛይሲ አይሁዳቲ ጳውሎሳ ሞቲዛ አይፌ ዮገይ አዛኮኔ ኤራናስ ኮዪዴስ፤ ቄሴታ ሃላቃቲኔ አይሁዳታ ሻንጎ ዱላታ አሳይ ወሪ እሳዴይካ አቶንታ ኩሜል ሸቃና ማላ አዛዚዴስ፤ ጳውሎሳካ ቃሾፔ ቢርሺዲ ሸቂዳ አሳ ሲንል ሸሺ ኤሲዴስ።

23

¹ ጳውሎሲ ዱላታ አሳ ቲሺ ሂስቲ ፃሊዲ “ታ አሻቶ! ሃኙ ጋካናስ ታ ያሳ ሲንላን ሎጾ ቆፋራ ዳይሲ” ጌዴስ። ² ቄሴታ ሃላቃ ሃናኒያይ ቃሴ ጳውሎሳ ዱናን ሾጫና ማላ እዛ አቻን ኤቂዳይታ አዛዚዴስ። ³ ሄራካ ጳውሎሲ ሃናኒያ “ሃይሶ አኖራ ቲዬቲዳ ኬላዘ! ኔናካ ያሲ ሾጫና፤ ዋጋራ ፒርዳና ኡታዳ ዋጋይ ባይንዳ ታና ሾጫና ማላ አዛዛይ?” ጌዴስ። *

⁴ ሄ ዋዴ ሄን ዲዛ አሳይ ጳውሎሳ “ያሳ ቄሴታ ሃላቃ ጫያይ?” ጌዴስ። ⁵ ጳውሎሲካ እስታስ “ታ አሻቶ! እዚ ቄሴታ ሃላቃ ጌዲዳይሳ ታ ኤራቤይኬ። ጋሶይካ ኔ ዴሬ ሃላቃ ቦላ ኢታ ቃላ ጎፓ ገዛይሲ ፃፌቲዴስ” ጌዴስ። *

⁶ ጳውሎሲ ሄን ዲዛ አሳፔ ባጋይ ሳዱቃዊታ፥ ባጋይ ፋርሳዊታ ጌዲዳይሳ ኤሪዲኔ “ታ አሻቶ! ታ ፋርሳዊፔ ዬሌታዲሲኔ፤ ታካ ፋርሳዊ፤ ሄኮ ሃዒ ታ ፒርዴታና ሸቂዳይ ሃይቂዳይቲ ዴንዳናይሳ ታ ኡፋይስ ኦሊዛ ገሻሳ” ጌዲ ባ ቃላ ቶቄ ሂስቲዲ ዱላታ አሳ ሲንላን ዮቲዴስ። *

* ^{23:3} ማቶ 23:27-28 * ^{23:5} ኬሳ 22:28 * ^{23:6} ሃዋ 26:5፤ ፒሊ 3:5

7 ጳውሎስ ሄሳ የቲዳ ማላ ፋርሳዌታ ጊደኒኔ ሳዱቃዊታ ጊደንካ እሺ ዳንዲን ዱላታይ ናሞዑ ሻኬቲ ዋጂዳስ። 8 ጋሶይካ ሳዱቃዊቲ “ሃይቂዳይታስ ዳንሊ ዳና፤ ኪታንቻይካ ባዋ፤ አያናይካ ዳና ገዛይታ፤ ፋርሳዌቲ ቃሴ ሄይቲ ወሪካ ዳቴስ” ገ አማኒዛይታ። *

9 ሄሳ ዋዴ ዳሮ ሸሮይ አሳ ጊደን ሃኒዳስ፤ ፋርሳዌታ ባጋታ ጊዱዳ ኢሲ ኢሲ ሙሴ ዋጋ ታማሪዛይቲ ዳንዲዲ “ኡ ሃይሳ አዳዛ ቦላ አይኮካ ኢታ ሚሽ ዳሚቤኮ፤ አያናይ ዋይኮ ኪታንቻይ ኢዛስ የቲዳ ጊዳና፤ ኑ አይ ኤሪዞኒ?” ጊዱ ፓላሜቲዳ።

10 ፓላማይ ሚኒ ሚኒ ቢዳ ጊሽ አሳይ ጳውሎሳ ታርሼሬልንታ ማላ ባቢዱ ሃላቃታ አዛዚዛይሲ “ዱጌ ዋጂዱ ጳውሎሳ አሳ ጊደፌ ሃ ኬሲ ኤኪ ዪዱ ጌዴ ዋታዳራቲ ዲዛሶ ኤፊቴ!” ጊዱ ዋታዳራታ ሃላቃታ አዛዚዳስ። 11 ዋንቴሳ ጋላስ ሌላ ጊደል ጎዳይ ጳውሎሳ አቻን ኤቂዱ “አይኮይ ባ ኔ ዩሩሳላሜን ታስ ማርካቲዳይሳል ኦሮሜንካ ኔ ታስ ማርካታናስ ቤሴስ” ጊዳስ።

ጳውሎሳ ዋጃናስ አሳይ ማቄቲዳስ

12 ጋዴይ ዋንቲን አይሁዳ አሳቲ ሸቄቲዱ “ኡ ጳውሎሳ ዋጅንታ ዲሼ ካል ሞኮ፤ ሃሊካ ኡየኮ” ገ ጫቄቲዳ። 13 ሄሳ ሄ ማቆዛን ኢሲፌ ጊዱዳ አሳ ቆዳይ ኦይዱ ታማፌ ቦላራ ዳስ። 14 ኢስቲካ ቄሴታ ሃላቃታኦ ዴሬ ጨማታኮ ቢዱ ኢስታስ “ኡ ጳውሎሳ ዋጅንታ ዲሼ ካል ሞንታ ማላ ሚንሊ ጫቄዳስ። 15 ሄሳ ጊዱዳ ጊሽ እንቴ ዴሬ ጨማታራ ዞሬቲዱ ኢዛ ኬሂ ማራማሪዛ ሚሳቲዱ ኢስቲ እንቴስ ጳውሎሳ ኤሃና ማላ አዛዚዛይሳ ኦይቺቲ፤ ኑካ ኢዚ ሃ ሃኖ ጋካናፔ ካሴቲዱ ኢዛ ዋጃና ጊጌቲዳስ” ጊዳ።

16 ጊደ ኣቲን ኢሲ ጳውሎሳስ ሚቺ ናይ ሄሳ ኢስታ ማቆዛ ሲዪዳ ጊሽ ዋታዳራቲ ዲዛሶ ቢ ጌሊዱ የዖዛ ጳውሎሳስ የቲዳስ። 17 ጳውሎሲካ ማቶ ሃላቃታፔ ኢሳ ባኮ ያይጊዱ “ሃይሲ ናዚ ዋታዳራታ አዛዚዛይሳስ የቲዛ የዖይ ዲዛ ጊሽ ጌዴ ኢዛኮ ኤፋ” ጊዳስ። 18 ማቶ ሃላቃይ ናዛ ዋና አዛዚዛይሳኮ ኤኪ ጌሊዱ “ቃሼቲዳ ጳውሎሲ ታና ባኮ ያይጊዱ ሃይሲ ናዚ ኔስ የቲዛ የዖይ ዲዛ ጊሽ ታ ኢዛ ኔኮ ሺሻና ማላ ታና ዋሲዳስ” ጊዳስ።

19 አዛዚዛይሲካ ናዛ ኩሼ ኦይኪ ኤኪዱ ሃራሶ ፖቂዱ “ኔ ታስ የታናይሲ ኣዜ?” ጊዱ ኢዛ ዱማ ኦይቺዳስ።

* 23:8 ማቶ 22:23፤ ማር 12:18፤ ሉቃ 20:27

20 ናዚካ “እይሁዳ አሳቲ ጳውሎሳ የጾዛ ሎዔሊ ማራማሪዛዴ ሚሳቲሲዲ ዋንቶ ኔ ኢዛ ኢስታስ ሺሻና ማላ ኦይቻናስ ቃቺ ዋሊዳ። 21 ጊዶ አቲን ኔ ኢስታስ ኤሮ ጎፓ፤ ጋሶይካ ‘ኑ ኢዛ ዋጵንታ ዲሼ ካል ሞኮ ሃሊካ ኡዮኮ’ ጊዲ ጫቄቲዳይቲ ኦይዱ ታማፌ ቦላ ጊዲዛ እሲ ኢዛ ዋጵናስ ኦጌ ቦላ ዙጌስ፤ ሃዒ ኢስቲ ናጊዛይ ኔ ዛሮ ፃላላ” ጊዴስ።

22 እዛዚዛይሲካ “ኔ ሃይሳ ታስ ዮቲዳይሳ ሃራ ኦናካ ኤሪሶፋ” ጊዲ ናዛ ሞጼዚዴስ።

ጳውሎሲ ዴሬ ሃሪዛ ፊልኪሴ ሲንል ሺቂዴስ

23 ሄሳፌ ጉዬ ዋታዳራታ እዛዚዛይሲ ማቶ ሃላቃታፔ ናምዓታ ያይጊዲ “ቃማፌ ሄቩ ሳቲ ጊዲሺን ቂሳሪያ ጌቲቲዛሶ ባና ማላ ናምዑ ዪቲ ዋታዳራታ፡ ላፑን ታሙ ቶጋንቻታኔ ናምዑ ዪቲ ቶራ አሳ ጊጊሲቲ፤ 24 ጳውሎሳሲካ ፓራ ጊጊሲዲ ዴሬ ሃሪዛ ፊልኪሴኮ ሎጾን ጋካና ማላ ኦሊቲ” ጊዴስ።

25 ዳብዳቤ ሂዝጊ ፃፊዴስ፤ 26 “ዴሬ ሃሪዛ ቦንቾ ፊልኪሴስ፡ ቃላዋዶሳ ሉሲዮሳፔ፤ ሳሮይ ኔስ ጊዶ። 27 ሃይሳ እዴዛ እይሁዳ አሳቲ ኦይኪ ዋጵና ጊሺን ኢዚ ኦሮሜ እሲ ጊዲዳይሳ ታ ጋካ ኤሪዳ ጊሽ ዋታዳራታራ ጋካዳ አሻዲስ። 28 ኢስቲ ኢዛ አዛስ ሞቲዛኮኔ ታ ኤራና ኮያዳ ዴሬ ዲላታኮ ሺሻዲስ። 29 ኢስቲ ኢዛ ቦላ ሺሺዳ ሞቶይ ባ ዋጋ ጊሽ ጊዲዳይሳ ኤራዲስ፤ ጊዶ አቲን ኢዛ ሃይቆስ ዋይኮ ቃሾስ ጋሊዛ ሚሺ ዴና። 30 ሃይሳ እዴዛ ዋጵናስ አሳይ ማቄቲዳይሳ ታ ሲያዳ ሄራካ ሲዪዳ ማላ ኔኮ ዬዳዲስ፤ ሞቲዛይቲካ ሄን ኔ ሲንፋን ባ ሞቶ ሺሻና ማላ ኢስታስ ዮታዲስ” ጊዴስ።

31 ሄሳ ጊሽ ዋታዳራቲ ባ እዛዜቲዳ ማላ ጳውሎሳ ቃማራ ኤፊዲ እንቲጳዒሮሴ ጌቲቲዛሶ ጋሊዳ። 32 ዋንቲፋ ጋላስ ቶጋንቻቲ ጳውሎሳራ ባና ማላ ኦሊዲ ኢስቲ ቃስ ጉዬ ሶ ሲሚዳ። 33 ቶጋንቻቲ ጌዴ ቂሳሪያ ጋኪዲ ዳብዳቤዛ ዴሬ ሃሪዛይሳስ አሚዲ ጳውሎሳ ኢዛ ሲንል ሺሺዲ። 34 ዴሬ ሃሪዛይሲ ዳብዳቤዛ ናባቢዲኔ ጳውሎሳ “ኔ አዋ ዴሬፔ ያዲ?” ጊ ኦይቺዴስ። ኢዚ ኪልቂያ ዴሬ አስ ጊዲዳይሳ ኤሪዲ፤ 35 “ኔና ሞቲዛይቲ ዪሺን ታ ኔ ዮዮ ሲያና” ጊዴስ፤ ሄርዶሳ ጊቤ ጋፋን ኢዚ ናጌታና ማላ እዛዚዴስ።

24

እይሁዳ አሳይ ጳውሎሳ ሞቲዴስ

1 ኢቻሹ ጋላሳፌ ጉዬ ቁሴታ ሃላቃ ሃናኒያይ ኢሲ ኢሲ ጨማታራኔ ፃርፀሎሳ ጌቲቲዛ ፃባቃራ ቁሳሪያ ቢዳስ፤ ኢስቲዛ ዳሬ አይሲዛ ፊልኪሴኮ ሸቂዲ ጳውሎሳ ሞቲዳ። 2 ጳውሎሲ ያይጌቲ ሸቂን ፃርፀሎሲ ኢዛ ሂዝጊ ሞቲዳስ “ቦንቾ ፊልኪሴ! ኑ ኔ ባጋራ ዳሮ ሳሮቴል ዳሚዶስ፤ ኔ ሎዎ አይሶንዛ ኑ ዳሬስ ሎዔቴሊ ቤቲዳስ።

3 “ሄሳ ኔ ሎዎ አሶዛ ኑ አዋን ጊዲን አይዳካ ቶቁ ጊዳ ቦንቾራኔ ጋላታራ ኤኮስ። 4 ታ ሃዒ ኔና ጋምዒሶንታኔ ዳቡሪሶንታ ቃንፋራ ኔስ ዮቲዛይሳ ኪያቴፋን ኔ ኑ ጊዛይሳ ሲያና ማላ ዋሶስ።

5 “ሃይሲ አዳዚ ኑስ ኢታ ሃርጌ ጊዲዳስ፤ አላሜን ዲዛ አይሁዳታ ኡባ ቦላ ሜቶ ሜዴስ፤ ናዚራዌ ጌቲቲዛ ዋርዶ አሳታ ዋና ካሌሊዛዳይ ኢዛኮ። 6 ኢዚ ያሳ ኬል ቱኒሳና ጊሺን ኑ ኢዛ ኦይኪዶስ። [ኑ ዋጋ ማላ ኑ ኢዛ ቦላ ፒርዳና ቆፒዶስ። 7 ጊዶ አቲን ዋታዳራታ ሃላቃታ አዛዚዛይሲ ሉሲዮሲ ጋኪዲ ኑ ኩሼፔ ኢዛ ዋልቃራ ዋሊ ኤኪዳስ። 8 ኢዛ ሞቲዛ አሳይካ ኔኮ ያና ማላ አዛዚዳስ።] ሃይሲ ኑ ኢዛ ቦላ ሺሺዳ ሞቶዚ ወሪ ቱሙ ጊዲዳይሳ ኔ ኔ ባጋራ ኢዛ ኦይቻ ጋካናስ ዳንዳያሳ” ጊዳስ።

9 ሂንኮ አይሁዳ አሳቲካ “ኤ ሃይሲ ዮዖዚ ወሪካ ቱሙኮ” ጊዲ አማኔቲዳ።

ጳውሎሲ ባና አሻና ኦጌ ሜዲዳስ

10 ዳሬ አይሲዛ ፊልኪሴይ ጳውሎሲ ሃሳያና ማላ ባ ኩሼራ ማላቲ ቤሲዳስ፤ ጳውሎሲካ “ኔ ዳሮ ዋዴሶፔ ሃይሳ ዳሬዛ አይሲዛዳ ጊዲዳይሳ ታ ኤሪዛ ጊሸ ታ ቦላ ሸቂዳ ሞቶዛስ ታ ኔስ ኡፋይሳ ዛሮ ሸሻይስ። 11 ታ ያሳስ ጎይናናስ ዬሩሳላሜ ቢን ሃቺ ታማኔ ናምዑ ጋላሳፌ ዳሮንታይሳ ኔ ኔ ባጋራ ኤራናስ ዳንዳያሳ። 12 ያሳ ኬፋን ጊዲን አይሁዳታ ዋሳ ኬፋን ዋይኮ ካታማ ጊዶን ታ ኦናራካ ፓላሜቲሺን ዋይኮ ዳሬ ጊዶን ሜቶ ሜዲሺን ታና ዳሚቤቲና። 13 ሃዒ ታ ቦላ ኢስቲ ሺሺዳ ሞቶዛስ አይ ማርካካ ሸሻናስ ዳንዳዬቲና።

14 “ጊዶ አቲን ታ ኔስ ቆንጨሳና ኮዩዛይ ኢስቲ ዋርዶ ጊዛ ጎዳ ኦጌራ ኑ አዋንታ ያሳስ ጎይናይሲኔ ሙሴ ዋጋኔ ናቤታ ማፃፋን ፃፊቲዳይሳካ ኡባ አማናይስ። 15 ኢስቲካ ኡፋይስ ኦሊዛ ማላ ታካ ናጋራንቻቲኔ ያሎቲ ሃይቆፔ ዳንዳናይሳ ያሳን አማኔታይስ። 16 ሄሳ ጊሸ ያሳ ሲንፋኒኔ አሳ ሲንፋን ሲዴይ ባይንዳ ሃናይ ታስ ዳና ማላ ኡባ ዋዴ ሚናይስ።

17 “ታ ዩሩሳሌም ሕዝብ ታስ ዳሮ ላይህ ገደዳቴ ጉዬ ታ ዴሬ አሳስ ማዶ ሚሼኔ ያሳስ አሜቲዛ ሚሼ ኤካ ያዲስ። 18 ታና ኢስቲ ያሳ ኬላን ዳሚዳይ ታ ሄሳ ጋሊሺና፤ ሄ ዋዴ ታ ጌይዛ ዋጋ ፖሊሺን ታናሩ ዳሮ አሲ ዳና፤ ኦሺኔ ሺሮይካ ዳና። 19 ገደ አቲን ኢሲያፔ ዩዳ ኢሲ ኢሲ አይሁዳ አሳቲ ዳቲስ፤ ኢስታሲካ ታና ዋቶስ ጋሊዛዚ ዲዛ ገዲኮ ኔ ሲንላን ታና ዋቲቶ። 20 ሄሳፌ ጉዬ ታ ዲላታ ሲንላ ሺቂኮ ታ ኦሊዳ ቆሆይ ዲኮ ሄ አሳቲ ዮቲቶ። 21 ታና ሃይሳስ ጋሊዳ ጋሶይ ታ ኢስታ ገደን ኤቃዳ ‘ሃይቂዳይታስ ዳንላ ዳስ ጋ ዮቲዳ ገሽ ሃች ፒሮዳስ አንቴ ሲንላ ሺቃዲስ’ ታ ጋዳ ቃላ ቆቁ ሂስታ ዮታዲስ አቲን ሃራ ታ ኦሊዳ ሚሺ ዳና” ገደስ። *

22 ፊልኪሴይ ጎዳ ኦጌ ሎዔሊ ኤሪዛ ገሽ “ዋታዴሬታ ሃላቃታ አዛዚዛይሳ ሉሲዮሲ ዩዛ ዋዴ ታ አንቴ ዮዖዛ ገሽ ቃሾ ገዲዛ ዮዖ አማና” ገዲ ኢስታ ዩዲዳስ። 23 ጳውሎሳ ናጊዛ ማቶ ሃላቃይ “ኢዛ ዳሮ ዋይሶንታ ሎዔላ ናጋ፤ ኢዛ ላጌቲ ኢዛስ ኮሺዛ ሚሺ ኤኪ ዩኮ ዲጎፋ” ገደስ።

ጳውሎሲ ፊልኪሴይ ዲሩሲላ ሲንላ ሺቂዳስ

24 ጉላ ዋዴፔ ካሊዲ ፊልኪሴይ አይሁዳ አስ ገዲዳ ባ ማቼዮ ዲሪሲላራ ዩዳስ፤ ጳውሎሳካ ያይገዲ ዩሱስ ኪርስቶሳን አማኖ ገሽ ኢዚ ዮቲሺን ሲይዳስ። 25 ጳውሎሲ ዊሎቴላ ገሽ፣ አሲ ባርካ ባና ሃሮ ገሺኔ ቡሮፔ ያና ፒሮዳ ገሽ ዮቲን ፊልኪሴይ ባቢዲ “ሃሲ ኔ ባ፤ ሃራ ዋዴ ታስ ገሺሺን ታ ኔና ያይጋ ኤካና” ገደስ። 26 ፊልኪሴይ ጳውሎሳፔ ጉሶ ኤካናስ ኡፋይሲ ኦሊ ናገዳ ገሽ ዳሮ ዋዴ ጋካናስ ያይገ ያይገ ሃሳይሲዳስ።

27 ናዎፐ ላይላፌ ጉዬ ጳርቂዮሳ ፊስዖሲ ፊልኪሴ ኦላን ሹሜቲዳስ፤ ፊልኪሴይ አይሁዳታ ኡፋይሳናስ ኮይዲ ጳውሎሳ ቃሾሶን አጋገደስ።

25

ጳውሎሲ ባ ዮዖዛ ኦሮሜ ካዎይ ቤያና ማላ ኦይቺዳስ

1 ፊስዖሲ ባ አይሲዛ ዴሬ ቂሳሪያ ጌሊዲ ሄቹ ጋላስ አቂቲዲ ሄፔ ዩሩሳሌም ቢዳስ። 2-3 ሄን ዲዛ ቄሴታ ሃላቃቲኔ ኢሲ ኢሲ አይሁዳታ ገደፌ ገታ ገታ አሳቲ ጳውሎሳ ቦላ ባ ዋቶ ሺሺዳ፤ “ጳውሎሳ ሃ ዩሩሳሌም ኤሂዲ ኑስ ሎዖ ኦሶ ኦላርኪ!” ገዲ

* 24:21 ሃዋ 23:6

ዎሲዳ፤ አስቲ ሄሳ ገዳይ ጳውሎሳ ናገዲ ኦጌ ቦላ ዎጃናስ ኮይዳ ገሻሳ። ⁴ ገደ ኣቲን ፊስቦሲ “ጳውሎሲ ቁሳሪያን ቃሾ ኬላን ናጌቴስ፤ ታካ ሃዒ ኤሌ ሲማዳ ሄ ኢዛኮ ባና።” ⁵ ኢንቴ ገደፌ ዳናቴሊ ዲዛይቲ ታናራ ቁሳሪያ ቤቶ፤ ጳውሎሲ ኦሊዳ ቆሆይ ዲዛ ገዲኮ ሄን ሞቲቶ” ገደሰ።

⁶ ፊስቦሲ ኦሱቸን ዎይኮ ታሙ ጋላሳፌ ዳሮንታ ዎዴ ኢስታራ ጋምዒዳፔ ጉዬ ቁሳሪያ ቢዴስ፤ ሄ ጋኪዳ ማላ ዎንቴላ ጋላስ ፒርዳ ዎምቦራ ቦላ ኡቲዲ ጳውሎሳ ኢዛኮ ሸሻና ማላ ኣዛዚዴስ። ⁷ ጳውሎሲ ኢዛ ሲንሐ ሸቂን ዬሩሳላሜፔ ዪዳ ኣይሁዳቲ ጳውሎሳ ገደሊዲ ማርካይ ባይንዳ ዳር ዴዎ ሞቶ ኢዛ ቦላ ሺሺዳ።

⁸ ጳውሎሲካ “ታኒ ኣይሁዳ ዎጋ ቦላ ገዲን ያሳ ኬላ ቦላ ዎይኮ ኦሮሜ ካዎ ቁሳሬ ቦላካ ጋሊዳ ቆሆይ ዴና” ገዲ ኢስታ ዎቶዛ ሻሪዛ ዛሮ ኢስታስ ኢሚዴስ።

⁹ ገደ ኣቲን ፊስቦሲ ኣይሁዳታ ኡፋይሳናስ ኮይዲ ጳውሎሳ “ኔ ዬሩሳላሜ ባዳ ሃይሳ ዮዎዛ ሄን ታ ሲንላን ፒርዴታና ኮያይ?” ገደሰ። ¹⁰ ጳውሎሲ ቃሴ ሂዝገዲ ኢዛስ ዛሪዴስ “ሄኮ ታ ፒርዴታናስ ታስ ቤሲዛ ቁሳሬ ፒርዳ ዎምቦራ ሲንላን ኤቃዲስ፤ ነካ ሎዒላ ኤሪዛ ማላ ታ ኣይሁዳታ ቦላ ኦሊዳ ኣይኮ ቆሆይካ ዴና።” ¹¹ ታ ቆሂዳ ገዲኮ ዎይኮ ታና ሃይቆስ ጋሊዛ ቆሆ ታ ኦሊዳ ገዲኮ ታ ሃይቆፔ ኣታና ገኬ፤ ገደ ኣቲን ኢስቲ ሺሺዛ ሞቶይ ሜላ ሃዳ ገዲኮ ኦኒካ ታና ኢስታስ ኣሊ ኢማናስ ዳንዳዬና፤ ታካ ታ ዮዶይ ቁሳሬ ሲንሐ ሸቃና ማላ ‘ዪገባይኔ’ ጋዲሰ።”

¹² ሄሳ ዎዴ ፊስቦሲ ባና ዙሪዛይታራ ሃሳዬቲዲ “ኔ ቁሳሬኮ ‘ዪገባይኔ’ ገዛ ገዲኮ ቁሳሬኮ ባንዳሳ” ገደሰ።

ጳውሎሲ ኣገርጳ ሲንሐኔ ባርኒቄ ሲንሐ ሸቂዴስ

¹³ ጉላ ጋላሳታፔ ጉዬ ካዎ ኣገርጳይኔ ባርኒቄይ ፊስቦሳ “ሃሹ ሎዎን ያዳሳ” ገደ ሞካናስ ጌዴ ቁሳሪያ ቢዳ። ¹⁴ ኢስቲ ሄን ዳር ጋላስ ኡቲዳ ገሺ ፊስቦሲ ጳውሎሳ ዮዎዛ ካዎ ኣገርጳስ ሂዝገ ዮቲዴስ “ፊልኪሴይ ቃሾ ኬላን ዬጊ ኣገዳ ኢሳዴይ ሃን ዴስ።” ¹⁵ ታ ዬሩሳላሜን ዲዛ ዎዴ ቄሴታ ሃላቃቲኔ ኣይሁዳታ ጨማቲ ሃ ኣዴዛ ዮዶ ታኮ ኢሂዲ ታ ኢዛ ቦላ ፒርዳና ማላ ኦይቲዳ። ¹⁶ ታ ቃሴ ‘ሞቲቲዳዴይ ሞቲዛይታ ሲንላን ኤቄዲ ባና ሞቲዛ ዮዶዛስ ቤሲዛ ዛሮ ኢሞንታ ዲሺን ሞቲቲዳዴ ኣሊ ኢሞይ ኦሮሜ ካዎቲላስ ዎጋ ገዴና’ ጋዳ ዛራዲሰ።

¹⁷ “ሄሳ ገሺ ኢዛ ሞቲዛይቲ ሸቂቲዲ ዪዳ ማላ ሄራካ ዎንቴላ ጋላስ ፒርዳ ዎምቦራን ኡታዳ ጳውሎሳ ታ ሲንሐ ሸሻና ማላ

አዛዛዲስ። 18 ኢዛ ሞቲዛይቲ ኢዛ አቻን ኤቂዳ ዋዴ ኢስቲ ኢዛ ቦላ ሺሺዳ ሞቶይ ታ ባጋራ ኢዚ ኢታ ኦሶንታ አገና ጋዳ ቆፒዳ ማላ ገዲቤና። 19 ገደ አቲን ኢስቲ ኢዛራ ሞቲቲዛይ ባ አማኖ ገሺኔ ጳውሎሲ ኢሲ ሃይቂዳይሳ ‘ፓፃ ዴስ’ ገዛ ዬሱሳ ገሽ ገዲዴስ። 20 ታካ ሄሳ ማላ የዎ ቆራ ያላናስ ታና ሜቲዳ ገሽ ጳውሎሳ ኔ ዬሩሳላሜ ባዳ ሄሳ የዎዛ ሄን ፒርዴታና ኮያይ?’ ጋዲስ። 21 ሂዝጊን ኢዚ ቃሴ የዎዚ ኦርሜ ካዎ ሲንላን ቤዬታና ማላ ኮይዲ ‘ታ የዎይ ቁሳሬ ሲንሐ ሺቃና ማላ ኦይቻይስ’ ገዳ ገሽ ኢዛ የዎ ቁሳሬኮ ታ ዬዳና ጋካናስ ኢዚ ቃሾ ኬላን ጋሞዳና ማላ አዛዛዲስ” ገዴስ።

22 አገርጳይ ፊስቦሳ “ታካ ኢዚ ገዛ ሲያና ኮያይስ” ገዴስ። ፊስቦሲካ “ዋንቶ ሲያንዳሳ” ገዴስ።

23 ሄሳ ገሽ ዋንቲላ ጋላስ አገርጳይኔ ባርኒቂይ ካዋቲ ማይዒዛ ማዮ ማይዒዲኔ ዳር ቦንቾራ ዋታዳራታ ሃላቃታራኔ ሄ ካታማን ዲዛ ገታ አሳታን አዛቤቲ ዪዲ ፒርዳ ኬሌ ጌሊዳ። ሄሳፊ ጉዬ ፊስቦሲ ጳውሎሳ ይይገሲዴስ። 24 ፊስቦሲ ሂዝገዴስ “ካዎ አገርጳ፣ ቃስ ኦናራ ዲዛ አሳቶ! አይሁዳ አሳቲ ወሪ ‘ሃይሲ አዴዚ ሃይሳፊ ጉዬ ፓፃ ዳና ቤሴና’ ገዲ ዋሲሼ ዬሩሳላሜንካ ሃንካ ኢዛ ቦላ ፒርዴታና ማላ ኢስቲ ታና ኦይቹዛይ ሃይሳ ኢንቲ ቤዪዛ አዴዛ ገሻሳ። 25 ታ ታ ባጋራ ኢዛ ሃይቆስ ጋሊዛ ኢሲ ባላካ ኢዛ ቦላ ዴማቤኬ። ኢዚ ‘ታ የዎይ ኦርሜ ካዎ ሲንሐ ሸቂ ቤዬቶ’ ገዳ ገሽ ታ ኢዛ ሄ ዬዳናስ ቃቻዲስ።

26 “ገደ አቲን ኢዛ ገሽ ታኒ ታ ጎዳስ ፃፋና ገዛ ኤሬቲዳ የዎይ ዴና፤ ሄሳ ገሽ ኢዛ ኢሲ ኢሲ ፓጩ ኦይሾታ ኦይቹኮ ታስ ፃፋናይሲ ዳናኮኔ ጋዳ ኢንቲኮ፣ ሃራፔካ ካዎ አገርጳ ኔኮ ሸሻዲስ። 27 ጋሶይካ ቃሾ አሲ ፑዴ ቦላቲዛ ሶቃ ዳናኮ ቢሸን ኢዚ ሞቲቲዛ የዎ ቆንጩሶንታ አጎይ አሳ ኤያ ኬሲዛይሲ ታስ ቤቲዴስ” ገዴስ።

26

ጳውሎሲ ካዎ አገርጳ ሲንላን የቲዳ የዎ

1 አገርጳ ጳውሎሳ “ኔኒ ኔ ገሽ ሃሳያናስ ዳንዳያሳ” ገዴስ። ጳውሎሲካ ባ ኩሼ ዴንሐዲ ዛር ሂዝጊ ኢሚዴስ። 2 “ካዎ አገርጳ! ታና አይሁዳቲ ሞቲዛ የዎ ኡባስ ሃቶ ታ ኔ ሲንላን ታና ማዳና ዛር ኢሚዛ ገሽ ታና ዳር ኡፋይሴስ። 3 ጋሶይካ ኔ

አይሁዳታ ዋጋኔ ኢስታ ፓላማ ኡባ ሎዔላ ኤራሳ፤ ሄሳ ጊሽ ኔ ታ ጊዛ ኡባ ዳንዳያዳ ሲያና ማላ ታ ኔና ዋሳይሰ።

4 “ታኒ ጉላ ናቱላ ዋዴፔ ደማዳ ዋና ዴዒዳኮ አይሁዳ አሳቲ ኤሬቱስ። ኮይሮፔ ሃዒ ጋካናሰ ታኒ ታ ዴሬ አሳ ጊዶኒኔ ዩሩሳላሚን ታ ዴዒዳ ዱሲ አሳይ ኤሬስ። 5 ቃሴካ ኢስቲ ማርካታና ኮይኮ ኑ አማኖ ጊሽ ታ ኬሃ ሚንላ ዋጋ ናጊዛ ፋርሳዌ ባጋ ጊዳዳ ጋምዒዳዴ ጊዳዳይሳ ኢስቲ ኮይሮፔ ዴንፊዱ ኤሬቱስ። * 6 ሃዒ ቃሴ ፒርዳሰ ታና ሃይሳን ኤሲዳይ ያሲ ካሴ ኑ አዋታስ አሚዳ ጫቆ ቃላ ኡፋይሳ ጊሻሳ። 7 ሃ ኡፋይሳኮ ጋካናሰ ኑ ዛርኬቲ ታማኔ ናምዒቲ ያሳ ጋላሲኔ ቃማ ጎይኒሽ ናጊዳ። ካዋ ኢንቱስ ሆላ! አይሁዳቲ ታና ሞቲዛይ ሃ ዮዖዛ ጊሻሳ። 8 ያሲ ሃይቂዳይታ ዴንፋናይሲ ዋኒዱ አይሁዳ ጊዳዳ ኢንቲ አቻን አማኔቲቤኔ?

9 “ታካ ታ ባጋራ ናዚሬቲ ዩሱሳ ሱንላሰ ኤቂታናሰ ቤሴስ ጋዳ ቆፓዲሰ ሸን፤ * 10 ታኒ ዩሩሳላሚን ኦፊዳይካ ሄሳኮሸን፤ ቄሴታ ሃላቃታፔ ታ ኤኪዳ ጎዳቱላራ አማኒዛይታፔ ዳርታ ቃሾ ኬላን ዩጊሳዲስ፤ ኢስታ ዋዴሽን ዋዴዛይታራ ኢሲፌ ዳይሰ። 11 ዳሮ ዋዴ አይሁዳታ ዋሳ ኬላቲ ዲዛሶን አዋንካ ኢስቲ ቃፃዬታና ማላኔ ባ አማኖ ካዳና ማላ ኦላዲስ፤ ኢስታ ቦላ ዳሮ ሃንቂታዳካ ኢሰራዔሌፔ ካሬን ዲዛ ሃራ ካታማታካ ባዳ አማኒዛይታ ጎዳዲስ።

ጳውሎሲ ኪርስቶሳኮ ዋኒ ሲሚዳኮ ዮቲዴስ

12 “ሃይሳ ሃ ዮዖዛስ ቄሴታ ሃላቃታፔ ኩማላ ጎዳቱሊኔ አዛዘ ኤካዳ ዳማስቆ ጌቲቲዛሶ ታ ቢሸን፤ 13 ካዋ ኢንቲስ ሆላ! ቡሮ ታ ኦጌን ዲሸን ጋዴይ ሴታ ጋላሰ ጊዳሸን አዋ አርሼ ፖዖፔ አዲዛ ፖዖ ቤያዲስ፤ ሄ ፖዖይ ታናኔ ታናራ ቢዛ አሳታ ዩይ አዲዱ ሳሎፔ ፖዒዴስ። 14 ኑ ወሪካ ቢታ ቦላ ኩንዲ ዲሸን አይሁዳታ ቃላራ ‘ሳወሌ! ሳወሌ! ታና አዛሰ ጎዳይ? ኔኒ ቃራ ማሻ ቦላ ኤቂኮ ኔርካ ኔና ቆሃሳ’ ጊዛ ቃላ ሲያዲስ።

15 “ታካ ‘ጎዳ! ኔ ኦኔ?’ ጋዲስ፤ ጎዳይካ ‘ታኒ ኔ፣ ጎዳዛ ዩሱሳኮ! 16 ሃዒ ዴንዳዳ ኔ ቶሆን ኤቃ፤ ታ ኔስ ቆንጨዳይ ኔ ታና ሃዒ ቤዩዳይሳኒኔ ሲንላፌ ታ ኔና ቤሳናይሳን ኔ ታሰ ማርካቲዛዴ ጊዳና ማላ ታ ኔና ሹማና ኮያዲስ። 17 ኢሰራዔሌ አሳ ኩሼፔኔ ታ ኔና ኢስታኮ ኪቲዛ አይዛቤታ ኩሼፔካ አሻና። 18 ኔ ኢስታ አይፌ ዶያና ማላኔ ዱማፔ ፖዖን ኬሳና ማላ ቃሴካ

* 26:5 ሃዋ 23:6፤ ፒሊ 3:5

* 26:9 ሃዋ 8:3፤ 22:4-5

ፃላዴስ ሃራቲዛሶፕ ያሳኮ ኔ ዛራና ማላ ኦፋና፤ ኢስቲካ ታና አማኒዳ ጊሽ ባ ናጋራፔ ማሬታና ቃሴ ዶራቲዳይታ ጊዶን ኢስቲ ላታ ጋዴ ዴማና፣ ጊዴስ።

ጳውሎሲ ባ ኦሶ ጊሽ ዮቲዴስ

19 “ሄሳ ጊሽ ካዎ አገርጳ! ሳሎፔ ታስ ኢሜቲዳ አጂታስ ታ አዛዜታዲስ። 20 ጊዶ አቲን ታ ካሴታዳ ዳማስቆን ዲዛ አሳ ካሌፋዳ ዬሩሳላሜኒኔ ዩሁዳ ዴሬን ኡባን ዲዛይታ ቃሴካ አይዛቤቲካ ናጋራ ኦገፔ ያሳኮ ሲሚዲ ማሬታና ማላ ኤሪሳዲስ፤ ኢስቲ ናጋራፔ ሲሚዳይሳ ቤሲዛዚ ኦፋና ማላ ታ ኢስታስ ዮታዲስ። * 21 ሄሳ ጋሶን አይሁዳቲ ታ ያሳ ኬፋን ዲሺን ታና ኦይኪዲ ዎቆና ኮይዳ። 22 ሃቺ ጋካናስካ ታስ ያሳፌ ማዶይ ፓጪ ኤሬና። ሄሳ ጊሽ ጉፋስካ ጊታስካ ማርካታሽ ሃይሳን ኤቃዲስ። ናቤቲኔ ሙሴይ ካሴቲዲ ሃይሳ ማላይ ሃናና ጊዳይሳ ዮቶፔ አቲን ታ ሃራ አይኮካ ዮታቤይኬ። 23 ኢስቲካ ዮቲዳይሲ ‘ዖሲ ከቲዳዴይ ሜቶ ቤያና። ሃይቆፔ ዴንዶን ኮይሮ ጊዲዲ አሲ አታና ፖፖ ኢስራዴሌ ዴሬሲኔ አይዛቤታስ ቆንጫና፣ ጊዛይሳ” ጊዴስ። *

24 ጳውሎሲ ሄሳ ዮቲሺን ፊስፖሲ “ጳውሎሳ! ሃዲ ኔ ጎዮንታ አጋካ፤ ኔ ዳሮ ታማሪዳይሲ ኔና ጎሺዴስ” ጊ ዋሲዴስ።

25 ጳውሎሲ ጊዲኮ አዛስ “ቦንቾ ፊስፖሳ! ታ ኔስ ቱማ ኤራዳ ዮታይስ አቲን ጎያቤይኬ። 26 ታ ኢዛ ሲንፋን ቆንጩራ ዮቲዳ ካዎይ ሃይሳ ዮፖዛ ኤሬስ፤ ሃይሲካ ቆታራ ኦፊቶንታይሳ ጊዲዳ ጊሽ ካዎይ ኤራናይሳ ታ አማኔታይስ። 27 ካዎ አገርጳ! ናቤታ አማናሳ ጊዲኪ? ኔ አማኒዛይሳ ታ ኤራይስ” ጊ ዛሪዴስ።

28 አገርጳይካ ጳውሎሳ “ሄኮ ኔ ታና ሃኖ ጉፋ ዎዴ ጊዶን አማንፋና ኮያሳ” ጊዴስ። 29 ጳውሎሲካ አዛስ ዛሪዲ “ጉፋ ዎዴን ጊዲንካ ዎይኮ ዳሮ ዎዴን ኔ ፃላ ጊዶንታ ዲሺን ሃቾ ታ ዮቲዳይሳ ሲዩዳይ ወሪ ሃኖ ታ ቃሼቲፋያ አታ ወሪካ ታ ማላ ጊዳና ማላ ታ ያሳ ዎሳይስ” ጊዴስ።

30 ሄሳፌ ጉዬ ካዎይ፥ ዴሬ አይሲዛይሲ፥ ባርኒቄይኔ ኢስታራ ኡቲዳ አሳይካ ወሪ ዴንዲዴስ። 31 ኢስቲ ሄፔ ኬዚ ቢሼ ባ ጊዶን “ሃይሲ አዴዚ ሃይቆስ ዎይኮ ቃሾስ ጋሊዛ ሚሼ አይኮካ ኦሊቤና” ጊዳ። 32 አገርጳይካ ፊስፖሳ “ሃይሲ አዴዚ ዮፖዛ

* 26:20 ሃዋ 9:20፥28-29 * 26:23 1ቆሮ 15:20፤ ኢሳ 42:6፤ 49:6

ቄሳፌስ ሺቆ ጎንታኮ አይኮ ዋሶይ ባይንዳ ሜላ ዬዴታናኮ ሺን”
ጊዴስ።

27

ጳውሎሲ ኦሮሜ ቢዴስ

¹ ኑኒ ፃላኔ ዴሬ ማርካቤን ባና ማላ ጌቴቲ ቃሹቲዳ ጊሽ ጳውሎሳኔ ሃራ ቃሹ አሳታካ ካዎ አወጊስዖሳ ዋታዳራታፔ ጊዲዳ ዩሊዮሳ ጌቴቲዛ ማቶ ሃላቃስ አሏ አሚዳ። ² ኢሲያ አባ አቻን ዲዛ ዴሬታ ቢዛ ማርካቤን ጌሊዲ ቢዴስ። ታሶሎንቄን ዲዛ ኢሲ ማቂዶኒያ አስ አሪስደርኮሳ ጌቴቲዛይሲ ኑናራ ዴስ።

³ ዋንቴላ ጋላስ ሲዶና ጊዛሶ ጋኪዶስ፤ ዩሊዮሲ ጳውሎሳስ ሎዖ ጊዲዳ ጊሽ ጳውሎሲ ባ ላጌታኮ ቢዲ አሳይ ኢዛስ ኮሺዛ ማዶ ኦላና ማላ ፒቃዴ አሚዴስ። ⁴ ሄፔ ዴንዲ ኑ ቢሺን ሲንላ ባጋራ ጫርኮይ ኑ ቦላ ጫርኪዛ ጊሽ አባ ጊዶን ዲዛ ቆጶርሴ ዴሬን ጌሜቲዲ ጌዴ ሲንሐ ቢዴስ። ⁵ ኪልቂያ ጊዛሶኔ ጰንፊሊያ ጌቴቲዛ ዴሬ አቻን ዲዛ አባ ፒኒዲ ሎቂያ ዴሬን ዲዛ ሙራ ጌቴቲዛ ካታማ ጋኪዶስ። ⁶ ሄን ማቶ ሃላቃይ ኢፃሊያ ዴሬ ቢዛ ኢስኪንዲሪያ ዴሬ ማርካቤ ዴሚዲ ኑና ኢዛን ጌልላዴስ።

⁷ ዳር ጋላስ ሎዲ ጊ ጊ ቢዲ ዳር ዋዬቲዲ ቃንዶሴ ጌቴቲዛ ካታማ አቺ ጋኪዶስ፤ ጫርኮይካ ኑ ሲንሐ ቦንታ ማላ ዲጊን ሳልሞና አቻራ አጁዲ ቃርፄሴ ጌቴቲዛ አባ ጊዶን ዲዛ ዴሬን ጌሜቲዲ ቢዴስ። ⁸ ዳር ዋዬቲዲ ላንቄ ላንቄ ኦይኪ ኑ አጁዳፔ ጉዬ ላሲያ ጌቴቲዛ ካታማ አቻን ዲዛ “ሎዖ” ጌቴቲዛ ማርካቤይ ኤቂዛሶ ጋኪዶስ። *

⁹ ኑ ቢዛ ኦጌ ቦላ ዳር ዳቡራን ዖማ ዎዴይ አጁዳ ጊሽ ሃዒ አባ ቦላ ባናስ ዳር ሜቶ ጊዲዳ ጊሽ ጳውሎሲ ባናራ ዲዛ አሳይ ናጌታና ማላ ሂዝጊዴስ፤ ¹⁰ “አሶ! ሃይሳፌ ኑ ካሊዲ ባና ቡሳይ ዳር ሜቶራ ዲዛይሲ ታስ ቤቴስ፤ ማርካቤዛን ዲዛ ጫናዛ ቦላኔ ማርካቤዛ ቦላ ፃላላ ጊዶንታ አሳ ሽምፖ ቦላካ ጊታ ቆሆይ ጋካና።” ¹¹ ማቶ ሃላቃይ ቃስ ጳውሎሳ ዞሬፔ ቦላራ ማርካቤዛ ላጊዛ ዋናዚኔ ማራካቤዛ ጎዳይ ጊዛይሳ ሲይዴስ። ¹² ሄ ማርካቤይ ኤቂዛሶይ ባልጎይ አጁና ጋካናስ ማርካቤስ ሎዖ ሽምፖሶ ጊዶንታ ጊሽ ዳሪዛ ባጋ አሳይ “ሃሙላ ሲንሐ ጉጃናስ ዳንዳዬቲኮ አዋ አርሼይ ወሊዛሶፔ ዱጌሃ ባጋራኔ ፑዴሃ ባጋራ

* 27:8 ላንቄ ጊዛይሲ አባ ጊዶን ዲዛ ቃርፄሴ ጋዖ ጉሳ።

ዲዛ ፊንቄ ጌቴተዛሶ ቃርፂሴ ማርካቤ ሼምፖሶ ኑ ጋኪዲ ባልጎ ሄን አሉስ” ጌዲ ባ ቆፋ ሺሺዲ።

አባ ቦላ ዳምባላይ ዴንዲዴስ

¹³ ዲጌሃ ባጋራ ጉላ ጫርኮይ ጫርኪሸን ቤዪዲ ኢስቲ ቆፒዳ ማላ ሃናና ሚሳቲን ባና ኬዚዳ፤ ማርካቤይ ኤቁዛሶፔ ባና ዴንዲዲ ቃርፂሴ አቸራ ላንቄ ላንቄ አይኪዲ አፂ ቢዳ።
¹⁴ ጌዶ አቲን ጉላ ዋዴፔ ጉዬ “አዋ አርሼይ ሞኪዛሶፔ ፑዴሃፔ ዪዛ ጎቴ ጫርኮ” ጌቴተዛ ኢታ ዋልቃማ ጫርኮይ አባ ጌዶን ዲዛ ዴሬዪፔ ዴንዲዲ ኢስታኮ አባ ጌዶ ዪዴስ። ¹⁵ ማርካቤዛ ጫርኮይ ሱጊን ጫርካራ ኤቁታናስ ዳንዳዮንታ ኢዲን ኑ ጮቡ ጌዲ ጫርኮይ ኤፊዛሶ ቢደስ። ¹⁶ ቄዳ ጌቴተዛ አባ ጌዶንኮ ዲዛ ዴሬ ዲዛሪን ጌማቲዲ ኑ ቢሸን ዳር ዋዬቲዲ ማርካቤዛ ቄሪ ዋጎሎዪን አይኪዲ ኤሳናስ ዳንዳዪደስ። ¹⁷ ማርካቤዛ ላገዛይቲ ቄሪ ዋጎሎዮ ማርካቤዛኮ ጎቺ ኬሲዲ ማርካቤዛ ዋዶሮራ ያዲዳ። ማርካቤዛካ ሲርቲሴ ጌቴተዛ አባ አጩይ ዳሪ ዲዛሶን ኩንዶንታ ማላ ባቢዲ ኢዛ ቦላ ዲዛ ሻራ ዋላዲ ጫርኮን ላጌቲ ቢዳ። ¹⁸ ጎቴ ጫርኮይ ሚኒ ቢዳ ጊሽ ዋንቲላ ጋላስ ማርካቤዛን ጫኔቲዳ ሚሻታ ኢሳ ኢሳ አባ ጌዶ ዩጌል አይኪዳ። ¹⁹ ሂቸንላ ጋላስ ማርካቤዛስ ኮሺዛ ሚሻታካ ባ ኩሼራ ኬሲ ኬሲ ዩጌዳ። ²⁰ ዳር ዋዴ ጋካናስ አዋ አርሼካ ያለንቲካ ቤዮንታ አጌዳ ጊሸኔ ጫርኮይካ ካሴፔ ሚኒ ሚኒ ቢዛ ጊሽ ሃይሳፌ ጉዬ ኑ አታና ዳንዳዮኮ ጊዛ ቆፋን ኡፋይስ ቃንዲደስ።

²¹ አሳይ ካል ሞንታ ዳር ጋላስ ኡቲዴስ። ሄሳ ጊሽ ጳውሎሲ አባ ጌዶን ኤቁዲ “ሃ አሳቶ! ኢንቲ ታ ጊዛይሳ ሲይዲ ቃርፂሴፔ ዴንዶንታኮ ሃ ቆሆይኔ ሃ ቆሆይ ኢንቲ ቦላ ጋኬናኮሺን። ²² ሃባካ ማርካቤዚ ያላ ቆሄታና አቲን ኢንቲፌ ኢሳዴ ሼምፖይካ ቆዩና። ሄሳ ጊሽ አይኮይ ባዋ፤ ባቦፍቲ ጋዳ ኢንቲና ዞራይስ። ²³ ቃማ ኦማርስ ታ ኢዛስ ጌዲዳ ታ ጎይኒዛ ያሳይ ከቲዳ ከታንቻይ ታ አቸን ኤቁዲ ²⁴ ‘ጳውሎሳ! ባቦፋ! ኔ ቄሳሬ ሲንላን ኤቃና ቤሴስ፤ ሄኮ ኔናራ ኢሲፌ ቢዛይታ ወርሲ ያሲ ኔ ጊሽ ሃይቆፔ አሻና፣ ጌዲ ታስ ዮቲዴስ። ²⁵ ሄሳ ጊሽ ኢንቲኖ ሃ አሳቶ አይኮይ ባዋ፤ ያሲ ታስ ሃይሳ ዮቲዳይሳ ፖላናይሳ ታ አማናይስ። ²⁶ ጌዲኮካ ሃይሲ ጎቴ ጫርኮዚ ጌዴ ኢሲ አባ ጌዶን ዲዛ ዴሬ አቺ ኤፊዲ ኑና ዩጋና” ጌዴስ።

²⁷ ታማኔ ኦይዳንላ ቃማ አንዲሪያ አባ ጌዶን ጫርኮይ ኑና ዋይሲሺን ቢሼ ሌላ ጌዶል ማርካቤዛ ላገዛይታስ አባፌ ቢታ

ቦላ ጋኪዳ ሚሳቲዳስ።^{† 28} ሄሳ ጊሽ አባ ጨማቴሌ ኤራናስ አባን ዩጊ ያሊዛ ዋዶሮ ኢስቲ ዩጊ ያሊሽን፤ አባ ጨማቴሌ ኦይዱ ታሙ ሜትሬ ከና ጊዲ ቤቲዳስ፤ ጋምዲሼ ሃዲካ ዩጊን ሄሹ ታሙ ሜትሬ ከና ጨማ ጊዲዳይሳ ዳሚዳ።²⁹ ኑ ዲዛ ማርካቤይ አባ ጋዖን ዲዛ ዛላ ሹቻራ ኢጨቶንታ ማላ ባቢዲ ማርካቤዛ፤ ጉዬ ባጋራ ማርካቤይ ቃዖንታ ማላ ናጊዛ ጳሺኬ ዱጌ አባ ጊዶ ዩጊዳ። ሄሳፌ ጉዬ ኢስታስ ቃማይ ዋንታና ማላ ዋሳ ኦይኪዳ።³⁰ ማርካቤዛ ላጊዛይቲ ማርካቤዛ፤ ከዚዲ ባቃታና ኮይዳ ጊሽ ማርካቤዛ፤ ሲንፋ ባጋራ ማርካቤ ናጊዛ ጳሺኬ ዩጊዛ ሚሳቲዲ ማርካቤዛ ቦላ ዲዛ ቄሪ ዋንሎዮ ዱጌ አባ ጊዶ ዩጊዳ።³¹ ሄሳ ዋዴ ጳውሎሲ ማቶ ሃላቃኔ ዋታዳራታ “ሃይቲ ማርካቤዛን ዲዛ አሳቲ ማርካቤዛ ቦላ ሼምፒዲ ኡቶንታ ኣጊኮ ኢንቴካ አታና ዳንዳዬኬታ” ጊዳስ።³² ሄሳ ጊሽ ዋታዳራቲ ዋንሎዮ ኦይኪዳ ዋዶሮዛ ቃንዲ ዩጊን ኢዛ አባ ቦላ ቶኬታና ማላ ዩዲ ኣጊዳ።

³³ ጋዴይ ዋንታና ጊሽን ወሪካ ካል ማና ማላ ጳውሎሲ ኢስታ ሂዘጊ ዋሲዳስ “ኢንቴ አዚ ሃናኔሻ ጊዲ ሂርጋን ካል ዋንታ ኣጊን ሃቺ ታማኔ ኦይዳንፋ ጋላሳ።³⁴ ሄሳ ጊሽ ኢንቴ ካል ማና ማላ ታ ኢንቴና ዋሳይስ። ኢንቴ ሚኮ ሚናና፤ ሙሊካ ኣይኮ ቆሆይካ ኢንቴ ቦላ ጋኪና” ጊዳስ።³⁵ ኢዚ ሄሳ ጊዳ፤ ጉዬ ካል ኤኪዲ ያሴ ጋላቲዲ አሳ ኡባ ሲንፋን ካል ሙስ ኦይኪዳስ።³⁶ ሄሳ ዋዴ ወሪካ ሚኔቲዲ ካል ሚዳ።³⁷ ማርካቤዛ ጊዶን ዲዛ አሳይ ወሪ ናምዑ ያታኔ ላቸን ታማኔ ኡሱፑና።³⁸ ወሪካ ሚ ካሊዳ፤ ጉዬ ማርካባን ጫኔቲዳ ጊሰቲዛ ዱጌ አባ ጊዶ ዩጊዲ ማርካቤዛ ዴዖ ካወሺዳ።

ማርካቤዚ ሜቂዳስ

³⁹ ጋዴይ ዋንቲን ባ ዲዛሶ ኤሪቤቴና። ጊዶ ኣቲን ኣጨይ ዲዛሶ አባ ኩርቁንፋ ዳሚዳ። ኢስታስ ዳንዳዬቲዛኮ ማርካቤዛ ሄ ሱጊ ሸሻና ቆፒዳ።⁴⁰ ማርካቤዛ ኦይኪዛ ጳሺኬ ቃንዲዲ አባ ጊዶ ዩጊዳ። ሄ ዋዴ ማርካቤ ላጊዛ ሚሻ ኦይኪዳ ዋዶሮታ ቢርሺዳ። ሃ ባጋራ ዲዛ ሻራ ጫርኮ ባጋ ጶቁ ሂስቲዲ ከዛና አባ ጋዖ ቢዳ።⁴¹ ጊዶ ኣቲን ማርካቤዚ ዳር ኣጨይ ኮሬቲ ኡቲዳይሳሳ ኢጨቲዲ ዱጌ ጉፋኒዳስ፤ ሲንፋ ቦላ ዱጌ ጉፋኒ ጳሺኬቲዲ ቃዖንታይሳ ጊዲዳስ። ቃስ አባ ዳምባላይ ዳርፔ ዴንዲዳይሳን ጉዬ ባጋራ ሜቂሬቴል ኦይኪዳስ።

[†] 27:27 ኣንዲርያ አባ ሜዲቲራኒያ ኣባፌ ኢሲ ባጋራ ዲዛ አባ።

42 ቃሾ አሳፔ አሳዴይካ አባን ዋዲዲ ኬሲ ኤኮንታ ማላ ዋታዳራቲ ዋዳና ቆፒዳ። 43 ማቶ ሃላቃይ ቃስ ጳውሎሳ አሻናሰ ኮይዳ ጊሽ ኢስታ ቆፋ ኤካና ኮይቤና። ጊዶ አቲን ሃሌ ዋዲ ኤሪዛይቲ ማርካቤዛፔ ዲጌ አባን ጉፒ ጉፒ ዋዲዲ ጌዴ ቢታ ቦላ ኬዛና ማላ አዛዚዴስ።

44 ሃንኮ አቲዳይቲ ሜቂ ዋዲዲ ሳንቃ ቦላ አባ ፒናና ማላ አዛዚዴስ፤ ሄሳሶ ሃኒዲ ዉሪካ ሳሮን አባ ጊዶፌ ቢታ ቦላ ጋኪዳ።

28

ጳውሎሲ ሜላዲያ ቢታን

1 ኑ ቢታይ ዲዛሶ ሳሮቴላን ጋኪዳፔ ጉዬ ኑ ጋኪዳ አባ ጊዶን ዲዛ ዴሬይ ሜላዲያ ጌቲቲዛ ዴሬ ጊዲዳሮ ኤሪዴስ። 2 ሄ ዴሬዬን ዲዛ አሳይ ዳሮ ማላሊሲዛ ኪያቴላ ኑስ ኦሊዴስ። ሄ ዋዴ አራይ ቡኪዳ ጊሽኔ ሜኅ ጊዲዳ ጊሽ ታማ ኤሊዲ ኑና ሞኪ ኤኪዳ። 3 ጳውሎሲ አፊራ ጊዛ ሚሊ ሺሺዲ ታማን ጉጂን ታማ ሴላፔ ዴንዲዳይሳን ሾሺ ኬዚዲ ኢዛ ኩሼ ቦላ ፃፃቲዴስ።

* 4 ማልታ አሳይ ሾሺ ጳውሎሳ ኩሼ ቦላ ፃፃቲዳይሳ ቤዪዲ “ሃይሲ አዴዚ ሸምፖ ዋዲዳዴ፤ ጋሶይካ አባ ዳምባላፔካ ኢዚ አቲዲ ዪኮካ ፒርዲዛ ያሳፌ ኬሲ ኤኪዲ ፓፃ ዳና ዳንዳይቤና” ጊዲ ባ ጊዶን ሃሳዬቲዳ 5 ጳውሎሲ ቃስ ሾሻ ዲጌ ታማን ቆቆፍ ዩጊዲ አይኮካ ሃኒቤና። 6 አሳይካ “አይዴፔ አይዴ ኢዛ አሳቴላይ ኪፃኔሻ፤ ዋይኮ ቆፖንታ ኩንዲዲ ሃይቃና” ጊዲ ናጊዴስ፤ ጊዶ አቲን ኢስቲ ዳሮ ዋዴ ናጊሺን ኢዛ ቦላ አይኮይኔ ሃናንታይሳ ቤዪዲ ባ ቆፋ ላሚዲ “ሃይሲ አዴዚ ያሳ!” ጊዴስ።

7 ሄ ኑ ዲዛሶ ማታን አባ ጊዶን ዲዛ ዴሬዮ አይሲዛ ፑፑልዮሳ ጌቲቲዛዴስ ጋዴይ ዴስ፤ ሄ አዴዚ ኑና ሞኪ ኤኪዲ ባሶን ሄቩ ጋላስ ጋካናሰ ሎዔሊ አማቲዴስ። 8 ሄን ፑፑልዮሳ አዋ ሚሻይኔ ጉሶ ሃርጌይ ሳኪን ኢቺዲ ዴስ፤ ጳውሎሲ ኢዛኮ ጌሊዲ ኢዛስ ዋሲዴሲኔ ኢዛ ቦላ ባ ኩሼ ዋሊዲ ፓሊዴስ። 9 ሄሲ ሄሳሶ ሃኒዳፔ ጉዬ ሄ ዴሬይን ዲዛ ሃራ ሃርጋንቻቲ ዪዲ ፓፃዳ። 10 አሳይካ ኑስ ዳሮ ሚሽ ኤሂዲ ኑና ቦንቺዛይሳ ኑና ቤሲዳ፤ ኑ ማርካቤን ባና ዴንዲን ኑስ ኮሺዛይሳ ማርካቤን ዉርሲ ጫኒዳ።

* 28:3 አፊራ ጊዛ ሚሊ ጊዛይሲ ኢሲ ኢሲ ጋዋ አሳቲ ቃይፃሬ፡ ሀንጄ ሚሊላ ጌቲስ።

ጳውሎስ ሚሊዊንቴ ኦሮሜ ቢደስ

11 ኑ ሚሊዊንቴ ሄዡ ኣገና ገምዒዳፕ ጉዬ ባልጎይ ኣቆና ገኣናስ ኣባ ገደን ዲዛ ዳሬዪን ገምዒዲ ኢስኪንዲሪያፕ ዪዛ ማርካቤን ጌሊዲ ባና ዳንዲደስ፤ ሄ ማርካቤዛ ቦላ ዲዮሲቆሮሳ ጌቴቲዛ ናምዑ ሜንቴ ኤቃታ ሚሲሊይ ደስ። 12 ጌዴ ሲራኩሴ ጌቴቲዛ ካታማ ጋኪዲ ሄን ሄዡ ጋላስ ገምዒደስ። 13 ሄፕ ኣባ ቦላራ ቢዲ ሬጊዮሜ ጌቴቲዛ ካታማ ጋኪደስ፤ ሄን ኢሲ ጋላስ ኣቀዲ ዲጌ ባጋራ ዪዛ ጫርኮይ ጫርኪዳ ገሽ ናምዒንሶ ጋላስ ፑቲዮሎሴ ጌቴቲዛሶ ቢደስ። 14 ሄን ኣማኒዛይታ ዴሚዲ ኢስታራ ኑ ላፑን ጋላስ ገኣናስ ኡታና ማላ ኑና ዋሲዳ። ሄፕ ቃሴ ኦሮሜ ቢደስ። 15 ኦሮሜን ዲዛ ኣማኒዛ ኣሳይ ኑ ገሽ ሲይዲ ኣፕዮሴ ጌቴቲዛ ጊያኔ “ሄዡ ኣቆሶታ” ጌቴቲዛሶ ገኣናስ ኑና ሞካና ዪዳ፤ ጳውሎሳይካ ኢስታ ቤዪዲ ያሴ ጋላቲዴሲኔ ሚኔቲዴስ።

ጳውሎስ ኦሮሜን

16 ኑኒ ኦሮሜ ጌሊዳ ዋዴ ጳውሎሳ ናጋናስ ኢሲ ዋታዳራይ ኢዛስ ኢሜቲን ጳውሎስ ባርካ ዳና ማላ ኢዛስ ፊቃዴይ ኢሜቲዴስ።

17 ሄዡ ጋላሳሬ ጉዬ ጳውሎስ ኦሮሜን ዲዛ ኣይሁዳታፕ ጊታ ኣሳታ ባኮ ዪይጊሲዴስ፤ ኢስቲካ ኢዛኮ ሸቂን “ታ ኢሻቶ! ታኒ ኢስራዔሌ ዴሬ ቦላኔ ኑ ኣዋታ ዋጋ ቦላ ኦሴዳ ኢሲ ቆሆይካ ዴና፤ ጊዶ ኣቲን ዬሩሳላሜን ታና ቃቺዲ ኦሮሜ ኣሳታስ ኣሉ ኢሚዳ።

18 ኦሮሜ ኣሳቲ ታና ቆሪ ኦይቺዳፕ ጉዬ ታና ሃይቆስ ጋሊዛ ሚሽ ዴሞንታ ኣገዳ ገሽ ቢርሺ ዬዳና ኮይዳ። 19 ጊዶ ኣቲን ኣይሁዳ ኣሳይ ታ ቦላ ኢሲ ዋሶይ ባይንዳ ዬዴቶንታ ማላ ኤቄቲን ታ ዮጆይ ቄሳሬ ሲንሐ ሸቄዲ ቤቶ ጋናስ ታስ ጊዴ ጊዲዴስ። ጊዶ ኣቲን ታኒ ታ ዴሬታ ሞቲዛ ጋሶይ ታስ ዴና። 20 ታ ቃሴ ሃዲ ኢንቴና ዪይጊሲዳይ ኢንቴና ቤያናሲኔ ሃኖ ኢንቴሶ ዮታናሳ። ሃይሳ ሳንሳላታን ታኒ ቃሼቲዳይ ኢስራዔሌ ናይታስ ኢሜቲዳ ኡፋይሳ ጋሶና” ጊዴስ።

21 ኢስቲካ ኢዛስ “ኔ ገሽ ዩሁዳ ዴሬፕ ያፌቲዳ ዴቢዳቤይ ኑና ጋኪቤና። ሃ ዪዳ ኣሳታፕ ኦኒካ ኔ ገሽ ኢታ ሃሳዪዳይ ባዋ።

22 ሃይሳ ኔ ካሊዛ ኣማኖዛ ገሽ ኣዋንካ ኣሳይ ኢታ ሃሳዪዳይሳ ኑ ኤሮስ። ሃሳ ገሽ ኔ ቆፋይ ኣዛኮኔ ኑ ሲያና ኮዮስ” ጊ ዛሪዳ።

23 ባሬ ኢዛስ ኢሚዲ ሃራ ጋላስ ኩሼ ኩሚዲ ኢዚ ዲዛ ኬሌ ዪዳ። ኢዚካ ማላዶፕ ኦማርስ ገኣናስ ያሳ ካዋቲላ ገሽ ማርካቲላን ባ ቆፋ ኢስታስ ቆንጨሲዴስ። ሙሴ ዋጋፔኔ ናቤታ

ማፃፃታፔ ፃዕሲ ፃዕሲ ዬሱሳ ጊሽ ኢስታሰ ቆንጨሲ ዮቲዴስ።
 24 ኢስታፌ ኢሲ ኢሲ አሳቲ ኢዚ ዮቲዳ ቃላ አማኒዳ፤ ባጋይቲ
 ቃስ አማኒቤቲና። 25 ኢስቲካ ባ ጊዶን ኢሶይ ኢሳራ ቆፋን ጋጎንታ
 ሻኬቲዳ፤ ጳዉሎሲ ዉርሴላን ዮቲሼ “ዒሎ አያናይ ናቤ ኢሳያሳ
 ባጋራ ካሴ ኢንቲ አዋታሰ ዮቲዳይሲ ቱማኮ! 26 ኢዚ ዮቲዳ
 ቃላይ፥

“ሃይሳ ዴራኮ ባዳ ኢንቲ ሲሲ ሲያና ሸን ዩሺ ቆፔኬታ፥
 አይፌራ ቤያና ሸን ዋዝናን ዋሐኬታ ጋዳ ዮታ።

27 ጋሶይካ ሄ አሳታ ዋዝናይ ሙሚዴስ፥
 ኢስታ ሃይሳይካ ቱሊዴስ፤
 ኢስታ አይፌይ ቆቂዴስ።

ሄሳሉ ሃናንታኮ
 ኢስቲ ባ አይፌራ ቤዪዲ
 ባ ሃይሳራ ሲይዲ ባ ዋዝናን ዩሺ ቆፒዲ
 ታኮ ሃ ሲማናኔ

ታካ ኢስታ ፓላናሺን” ጊዴስ።

28 “ሂስቲኮ ጾሲ አስ እሺዛ ከታይ አይዛቤታሰካ ከቲቲዳይሳ
 ኢንቲ ኤሪቲ፤ ኢስቲካ ኤሮ ጊዲ ኤኬቲሰ” ጊዴስ። 29 ጳዉሎሲ
 ሄሳ ዮቲዳፔ ጉዬ አይሁዳ አሳቲ ባ ጊዶን ዳሮ ፓላሜቲሼ ኬዚ
 ቢዳ። †

30 ጳዉሎሲ ከራቲዳ ኬላን ናምቡ ላይሐ ኩሜሕ ዴዒዴስ፤
 ባኮ ዪዛ አስ ዉርሲ ሞኪ ኤኪዴስ። 31 ጾሳ ካዋቲሐ ሳባኮን
 ጎዳ ዬሱስ ከርሰቶሳ ጊሽ ኦኒካ ኢዛ ዲጎንታ ፃላቴላራ አሳ
 ታማርሲዴስ።

† 28:29 ኢሲ ኢሲ ጌሻ ማፃፃታን ፓይዶ 29 ቦላ ዲዛ ቆፋይ ጉጃቲቤና።

lxx

ኦሪሳ ጩቆ ማፃፋ ንሞላ

New Testament in Gamo (ET:gmw:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022
dffa0cbb-5f77-5875-bf95-f4176677af45